

明文奇賞卷之二十八

史官陳仁錫明卿甫評選

書

上徐少湖翁師救荒愚見

楊繼盛

某以言得罪、宜絕口不言天下之事、但聞窮民病苦之
狀、若割心、肺、日、夜、憂、思、至、廢、寢、食、故、有、欲、默、而、不、容、忍
者、而夫子抱能受言之量、居能行言之位、而某極荷相
知、又有可言之機、寧容隱乎、謹陳救荒愚見、伏請尊裁
城中餓餒、死亡滿道、人人驚惶、似非太平景象、夫京師
之民、各有身役常業、何以頓至于死、而所死者皆外郡

就食之人也。蓋緣各處司民牧者無救荒之策之心。而京師有捨米捨飯減價賣米之惠。故皆聞風而來。當其事者又不肯盡心。鮮有實惠。故每凍餓以至於死。是以京師爲溝壑。誘外郡之民而填之也。救荒自有均平普遍之政。何必煦煦然爲此小惠。誘民以至於死乎。莫若行令各處撫按有司作急賑濟。然後出給告示諭以本處賑濟之故。使各歸鄉里。又將所捨之米預支二三十日。以爲回家盤費之資。則窮民有鄉井飽食之樂。京師無死亡道路之慘矣。連年豐稔。止有此歲之饑。一郡之粟自足以供一郡之食。特在上者區處之無其道耳。官

倉之粟可賑濟也。亦可價賣也。富室之粟可勸借也。亦可責令減價糶也。蓋官倉除備邊急緊不可動支外其餘有積至數十年將腐者合暫變賣收價到秋易新似爲兩便。富室有積粟至千萬石者皆坐索高價以邀重利。故米價至于騰踊。合依少定價裁抑之。又當以禮獎勸借。官給以帖。到秋償還。則米價自可日減。窮民自返故鄉矣。窮民旣無處辦米。或賣產傭工止可得錢。乃今分爲等類。定爲價數。則錢法紛亂而民益告病矣。夫錢法之行也。或朝貴而暮賤。或此處用而彼處不用。若有神以使之。雖市人亦不知其所以然也。其可以官法定

勿干權宜
之中懷經
久之策

之乎爲今之計當爲權宜之術不分等類不問大小俱
責令折筭通行其價數之多寡任從民便官府不得而
與焉則錢法可通而商民俱便矣米價騰踊日甚一日
今定爲官價以爲裁抑之術然在京師則有所不能行
者蓋各鋪戶之米俱貴價糴買非若外郡富家田內自
獲然今定爲輕價彼豈肯折本糴賣且各處販米者一
聞價輕孰肯再來外米不肯來內米不肯糴不知其將
來至於何如也如定米價亦俟春間販米至者多然後
議之北地旣荒全賴南米之來使河道沮滯則來者延
遲恐緩不濟事賊盜甚多或搶掠一船則後者聞風孰

肯再來今宜行令各河道官使開河之時先放米船行
一遇壅塞則遣官夫拽運一若轉運官糧然則米正月
終可到矣又行令各處地方官使嚴加巡捕防守護送
則販者無失米之憂所來者必多矣南米來者旣多又
憂米價之不減乎盜生於貧雖勢所必至然荒年而至
于盜起斯亦可憂矣聞各處撫按分付各屬官令其暫
寬治盜之法其意懼生變也以故各官於賊盜之獲俱
姑息寬縱之此端一開爲盜者衆貧者日至放肆富者
日不安生是民之爲盜雖起于年凶亦上之人有以教
之耳夫濟荒自有長策未聞教民爲盜以救之也况漸

明文音實 卷之二十一 三
不可長民不可逞恐提防一撤紀綱遂壞其變有不可
勝言者宜行令各處撫按有司使遇賊盜仍治之如法
則禁盜乃所以止盜而止盜正乃所以救荒也

與繼津兄書

承問足見兄爲國之忠樂善之誠弟不當阻抑之以隳
其向上之志但愚衷有見其不便者數條請上陳之備
採納焉此事部中允行而人皆避事蓋難其人而兄獨
勇往任之則爲衆悅服今本部旣束高閣而兄欲强行
堂官惡之同僚忌之此不便一也兄爲拯援小弟之
故讐家欲害而無由乃今自尋事幹是自居受害之淵

數此不便二也弟訪問宣大將官俱云地方狼狽已極
兵馬必難整飭所謂雖有善者無如之何兄欲任之萬
無成功之理昨何道長慨然有開海運之請一無成功
人皆笑之此不便三也到彼處行事凡有謀爲又先題
請兄自恃當道者果欣而允之乎抑或故阻其所爲乎
此不便四也許公之請必欲其駐劄陽和城兄無兵馬
之寄一遇有警軍將各守信地遺一空城虜或逼圍將
何以爲保身家之策此不便五也整飭兵馬責任甚重
萬一失事其責當與將領督撫等兄自恃其當道者肯
恕兄乎抑必加重于兄乎此不便六也細觀許多之疏

如此說來
示了事何
人爲公補

蓋恐一時失事。兵部叅劾。故扯兵部官在內。將欲謝擔
于兵部衙門。且又云責令容彼提調。則若彼之屬官者
勢機在彼。持握豈得自專。行事無事之日。受彼提制有
事之日。替彼頂缸。成功難必。禍害預知。此不便七也。夫
識時勢者在俊傑。此等時勢。兄識之久矣。而必欲爲此
者。蓋一念爲國之誠。故利害有所不暇顧耳。然欲幹天
下之事。當思其如何下手。如何收煞。事成如何。結果不
成。落何名目。歿生雖不計。必竟果不徒歿。不思之思之
又重思之。弟非阻兄忠貞之爲。若損友者。蓋真見事必
不可成故耳。况此時兄十分小心迴避。猶恐禍及何乃

自投禍機乎情出迫切不覺涕泣之道直述其事詞意不倫幸惟情亮

又

仰讀手教足見兄以天下爲已任敬羨敬羨宣大係天下安危弟豈不知使弟在部必爲兄之所爲者乃阻抑若此者何蓋以兄處最嫌疑之地耳兄老賊報復害人之巧入于至神者乎此弟之所甚慮而知已溺愛迫切之情如何能已此事在他人爲之如何不可而在兄爲之則甚不可况才尚有大展時節此時且歛鋒蓄銳俟時可爲則轟烈一場勿徒求盡其心而不計事之成否

公之愛
其身以有
爲也

皆○知○致○身○爲○忠○不○知○爲○天○下○愛○其○身○尤○爲○忠○之○大○者○請
兄更思

乞誅奸險巧佞賊臣疏

楊繼盛

方今在外之賊惟胡虜爲急。在內之賊惟嚴嵩爲最。胡虜者犬羊之盜。瘡疥之疾也。賊嵩者門庭之寇。心腹之害也。賊有內外。攻宜有先後。未有內賊不去而可以除外賊者。故臣請誅賊嵩。當在勦絕胡虜之先。敢以嵩之專政叛君之十大罪爲皇上陳之。我太祖高皇帝親見宰相專權之禍。遂詔天下罷中書丞相而立五府九卿分理庶政。殿閣之臣惟備顧問視制草。不得平章國事故載諸祖訓。有曰以後子孫作皇帝時臣下

有建言設立丞相者本人凌遲全家處死此其爲聖
子神孫計至深遠也及嵩爲輔臣儼然丞相自居挾
呈上之權侵百司之事凡府部每事之題覆其初惟先
呈稿而後敢行及今面稟而後敢起稿嵩之直房百官
奔走如市府部堂司嵩差人絡繹不絕事無大小惟嵩
主張一或少違顯禍立見及至失事又謝罪於人雖有
前丞相之專恣未有如斯之甚者是嵩雖無丞相之名
而有丞相之權有丞相之權而無丞相之干係以故各
官之陞遷未及謝恩先謝嵩矣蓋惟知事權出于嵩惟
知畏懼奉承於嵩而已此壞祖宗之成法一大罪也

即用此
御中公

權者人君所以統馭天下之具不可一日下移臣下亦不可毫髮僭踰。皇上令嵩票本蓋任人圖政之誠心也。豈意嵩一有票本之任遂竊威福之權且如皇上用一人嵩即差人先報曰我票本薦之也。及皇上黜一人嵩又揚言於衆曰此人不親附於我故票本罷之。皇上宥一人嵩即差人先報曰我票本救之也。及皇上罰一人嵩又揚言于衆曰此人得罪於我故票本報之。凡少有得罪于嵩者雖小心躲避嵩亦尋別本帶出。肯意報復陷害是嵩竊皇上之恩以市已之惠。假皇上之罰以彰已之威。所以羣臣感嵩惠甚於感

皇上之恩畏嵩之威甚於畏皇上之罰也用舍賞罰之權既歸于嵩大小臣工又盡附於嵩嵩之心膽將不日大且肆乎臣不意皇上之明斷乃假權于賊手如此也此竊皇上之大權二大罪也善則稱君過則歸已人臣事君之忠也書曰爾有嘉謨嘉猷則入告爾后於內爾乃慎之于外曰斯謨斯猷惟我后之德盖人臣以已之善而歸之于君使天下皆稱頌君之德不敢彰已之能以與君爭功也嵩于皇。上。行。政。之。善。每。事。必。令。子。世。蕃。傳。于。人。曰。皇。上。初。無。此。意。此。事。是。我。議。而。成。之。蓋。惟。恐。天。下。之。人。不。知。事。權。之。出。于。已。也。及。今。則。

臣英明獨斷故力陳

其懷權似

未有不怒

高者楊公不可謂諫

將聖論及嵩所進揭帖刻板刊行為書十冊名曰嘉靖疏議使天下後世皆知皇上以前所行之善盡出彼之揆置主張皇上若一無所能者人臣善則稱君之忠果若此乎此掩皇上之治功三大罪也皇上令嵩票本蓋君逸臣勞之意嵩乃令子世蕃代票恣逸子勞之為世蕃却又約諸乾兒子趙文華等羣會票擬結成奸黨亂政滋弊一票屢更數手機密豈不漏泄所以旨意未下滿朝紛然已先知之及聖旨既下則與前所講若合符契臣初見嵩時適原任職方司郎中江冕稟事於嵩曰昨御史蔡朴叅守備許實等失事

月李徐二
相皆無嫌
羽

本部覆本已具揭帖與東樓聞東樓已票送入未知何
如東樓者世蕃之別號也嵩云小兒已票罰俸內分兩
等甚有分曉 皇上定是依擬臣初甚疑及後 旨下
果如嵩言即臣所親見一事則其餘可知矣又前經歷
沈鍊劾嵩 皇上將本下大學士李本票擬本又熟憚
庸鄙奔走嵩門下爲嵩心腹感嵩之恩畏嵩之威倉皇
落鳧莫知所措差人問世蕃如何票世蕃乃同趙文華
擬票停當趙文華袖入遞與李本李本抄票封進此人
所共知也即劾嵩之本世蕃猶得票擬則其餘又可知
矣是嵩旣以臣而竊君之權又以子而並已之權百官

孰敢不服天下孰敢不畏故今京師有大丞相小丞相
之謠又曰北時父子二閣老他日一家盡獄囚蓋深恨
嵩父子並專權柄故耳此縱奸子之僭竊四大罪也邊
事之廢壞皆原於功罪賞罰之不明嵩爲輔臣以明功
罪以勵人心可也乃爲壟斷之計先自貪冒軍功將欲
令孫冒功于兩廣故先布置伊表侄歐陽必進爲兩廣
總督親家平江伯陳圭爲兩廣總兵鄉親御史黃如桂
爲廣東巡按朋奸比黨朦朧湊合先將長孫嚴效忠冒
兩廣奏捷功陞所鎮撫又冒瓊州一人自斬七首級功
造冊繳部效忠告病乃令次孫嚴鵠襲替鵠又告併前

效忠七首級功加陞錦衣衛千戶今任職管事有武選
司昺字十九號堂稿可查夫效忠嚴鵠皆世蕃子也隨
任秦養未聞一日離家至軍門乳臭孩童亦豈能一人
自斬七首級而假報軍功冒濫錦衣衛官爵以故歐陽
必進得陞工部尚書陳圭告病回京得掌後府印信
黃如桂得驟陞太僕寺少卿是嵩旣竊皇上爵賞之
權以官其子孫又以子孫之故陞遷其私黨此偏旣作
倣效成風蔣應奎等令子冒功打死發遣皆嵩有以倡
之也夫均一冒功也在蔣應奎等貪冒科道則効之在
嵩貪冒人所共知科道乃不敢効則嵩積威足以鎮天

下之口可知矣此冒朝廷之軍功五大罪也逆賊仇鸞總兵甘肅爲事革任嘉靖二十九年張達等陣亡正胡虜竊伺之時使嵩少有爲國家之心選一賢將胡虜聞知豈敢輕犯京師世蕃乃受鸞銀三千兩威逼兵部薦爲大將及鸞冒哈丹兒軍功世蕃亦得以此陞官廕子嵩父子彼時嘗自誇以爲有薦鸞之功矣及鸞權日盛出嵩之上反欺侮于嵩嘗自嘆以爲養虎遺患後又知皇上有疑鸞之心恐其敗露連累始不相合互相誹謗以泯初黨之迹以眩皇上之明然不知始而逆鸞之所以敢肆者恃有嵩在終而嵩與逆鸞之所

以相反者知 皇上有疑鸞之心故耳是勾虜背逆者
鸞也而受賄引用鸞者則嵩與世蕃也使非嵩與世蕃
則鸞安得起用雖有逆謀亦安得施乎進賢受上賞進
不肖受顯戮嵩之罪惡又出鸞之上矣此引背逆之奸
臣六大罪也嘉靖二十九年胡虜犯京深入失道歸路
已絕我軍奮勇正好與之血戰一大機會也兵部尚書
丁汝夔問計于嵩嵩宜力主勦戰以伸中國之威以紓
皇上之憂可也乃曰京師與邊上不同邊上戰敗猶可
掩飾此處敗 皇上必知莫若按兵不動任賊搶足便
自退回以故汝夔傳令不戰及 皇上拏問汝夔求救

于嵩嵩又曰雖是挈問我具揭帖維持可保無事蓋恐汝夔招出真情故將此言啜哄以安其心汝夔亦恃嵩平日有回天手段故安心不辯及汝夔臨刑始知爲嵩所誤乃大呼曰嚴嵩誤我矣此人所共知也是汝夔不出戰之故天下皆知爲嵩主張特皇上不知之耳此誤國家之軍機七大罪也黜陟者人君之大權非臣下可得專且私也刑部郎中徐學詩以論劾嵩與世蕃革任爲民矣嵩乃於嘉靖三十年考察京官之時恐嚇吏部將學詩兄中書舍人徐應豐罷黜荷蒙聖明洞察其奸將應豐留用夫應豐乃皇上供事內庭之用

嵩猶敢肆其報復之私則在內之臣遭其毒手者又何
可勝數耶戶科都給事中厲汝進以論劾嵩與世蕃降
爲典史矣嵩於嘉靖二十九年考察外官之時逼嚇吏
部將汝進罷黜夫汝進言官也縱言不當 皇上旣降
其官矣其爲典史則無過可指也嵩乃以私怨罷黜之
則在外之臣被其中傷陷害者又何可勝數耶夫嵩爲
小人故善人君子多與之相反嵩不惟罷其官又且曲
加之罪不惟罰及一身又且延及子弟以故善類爲之
一空此時計數正人君子能幾人哉是黜陟之權 皇
上持之以激勵天下之人心賊嵩竊之以中傷天下之

亦風餘韻
更爲可哂

善類此專黜陟之大柄八大罪也嵩既專權則府部之
權皆撓于嵩而吏兵二部大利所在尤其所專主者文
武官之遷陞不論人之賢否惟論銀之多寡各官之任
亦通不以報效 皇上爲心惟日以納賄賊嵩爲事將
官納賄於嵩不得不剝削乎軍士所以軍士多至失所
而邊方爲甚有司既納賄于嵩不得不濫取于百姓所
以百姓多至流離而北方之民爲甚一人專權天下受
害怨恨滿道含冤無伸人人思亂皆欲食嵩之肉 皇
上雖屢加撫恤之恩豈足以當嵩殘虐之害若非 皇
上德澤之深 祖宗立法之善天下之激變也久矣軍

民之心既怨恨思亂如是臣恐天下之患不在胡虜而在域中此失天下之人心九大罪也風俗之隆替係天下之治亂我朝風俗淳厚近古罕儷逆瑾用事始爲少變皇上即位以來躬行古道故風俗還古及嵩爲輔臣諂諛以欺乎上貪汙以率其下通賄慝懃者雖貪如盜蹠而亦薦用奔競踈拙者雖廉如夷齊而亦罷黜一人貪戾天下成風守法度者以爲固滯巧彌縫者以爲有才勵廉介者以爲矯激善奔走者以爲練事卑污成套牢不可破雖英雄豪傑亦入套中從古風俗之壞未有甚于此時者究其本源嵩先好利此天下所以

皆尚乎貪嵩先好諛此天下所以皆尚乎諂源之不潔
流何以清風俗不正而欲天下之治得乎此壞天下之
風俗十大罪也嵩有十大罪昭人耳目以皇上之聰
明固若不知者何哉蓋因皇上待臣下之心出於至
誠賊嵩事皇上之奸入於至神以至神之奸而欺至
誠之心無恠其墮于術中而不覺也臣再以嵩之五奸
言之知皇上之意向者莫過于左右侍從之臣嵩欲
托之以伺察聖意故先用寶賄結交情熟于皇上
宮中一言一動一起一居雖嬉笑歔歔之聲遊觀燕樂
之爲無不報嵩知之每報必酬以重賞凡聖意所愛

憎舉措嵩皆預知故得以遂逢迎之巧以悅皇上之心皇上見嵩之所言所爲盡合聖意蓋先有人以通之也是皇上之左右皆賊嵩之間諜此其奸一也通政司納言之官嵩欲阻塞天下之言路故令乾兒子趙文華爲通政司使凡章奏到文華必將副本送嵩與世蕃先看三四日後方纔進呈本內情節嵩皆預知事少有干於嵩者即先有術以爲之彌縫聞御史王宗茂劾嵩之本文華停留五日方上故嵩得以展轉據拾其故是皇上之納言乃賊嵩之攔路犬此其奸二也嵩旣內外彌縫周密所畏者廠衛衙門緝訪之也嵩則

令子世蕃將厰衛官籠絡強迫結爲兒女親家夫旣與之結親雖有忠直之士孰無親戚之情於賊嵩之奸惡又豈忍緝訪發露不然嵩籍江西去京四千餘里乃結親於此勢屬不便欲何爲哉不過假婚姻之好以遂其掩飾之計耳 皇上試問嵩之諸孫所娶者誰氏之女便可見矣是 皇上之爪牙乃賊嵩之爪葛此其奸三也厰衛旣爲之親所畏者科道言之也嵩恐其奏劾故於科道之初選非出自門下者不得與中書行人之選知縣推官非通賄門下者不得與行取之列考選之時又擇熟嫻圓融出自門下者方補科道苟有忠鯁節義

之氣者必置之部屬南京使知其罪而不得言言之而亦不真既選之後或入拜則留其飲酒或出差則爲之餞驢或心有所愛憎則唆之舉劾爲嵩使令至五六年無所建白便陞京堂方面夫既受嵩之恩又附嵩且有效驗孰肯言彼之過乎其雖有一二感 皇上之恩而欲言者又畏同類泄露孤立而不敢言而嵩門下之人每張大嵩之聲勢陰阻其敢諫之氣以故科道諸臣寧忍負于 皇上而不敢忤於權臣也是 皇上之耳目皆賊嵩之奴僕此其奸四也科道雖籠絡停當而部官有如徐學詩之類者亦可懼也嵩又令子世蕃將部官

之有才望者俱網羅門下或拔之鄉里或托之親識或
結爲兄弟或招爲門客凡部中有事欲行者先報世蕃
知故嵩得預爲之擺布各官少有怨望者亦先報世蕃
知故嵩得早爲之斥逐連絡蟠結深根固蒂合爲一黨
互相倚附各部堂司大半皆嵩心腹之人皇上自思
左右心腹之人果爲誰乎此真可爲流涕者也是皇
上之臣工多賊嵩之心腹此其奸五也夫嵩之十罪賴
此五奸以彌縫之識破嵩之五奸則其十罪立見噫嵩
握重權諸臣固從曰不足恠而大學士徐階負天下之
重望荷皇上之知遇宜深抵力排爲天下除賊可也

乃畏嵩之巧足以肆其謗懼嵩之毒足以害其身寧鬱
快終日凡事惟聽命于嵩不敢持正少抗是雖爲嵩積
威所劫然於皇上亦不可謂之不負也階爲次輔畏
嵩之威亦不足恠以皇上聰明剛斷雖逆鸞隱惡無
不悉知乃一向含容于嵩之顯惡固若不能知亦若不
能去此不過欲全大臣之體面姑優容之以待彼之自
壞耳然不知國之有嵩猶苗之有莠城之有虎一日
在位則爲一日之害皇上何不忍割愛一賊臣顧恐
百萬蒼生之塗炭乎況通來疑皇上之見猜已有異
離之心志如再賜優容姑待之恩恐致以前宰相之禍

天下臣民皆知其萬萬不可也臣前諫阻馬市謫官邊
方幸復今職 皇上旣以再生之恩賜臣臣安忍不捨
再生之身以報 皇上臣如不言又再有誰人敢言乎
伏望 皇上聽臣之言察嵩之奸羣臣予嵩畏威懷恩
固不必問也 皇上或問 二王令其面陳嵩惡或詢
諸閣臣諭以勿畏嵩威如果的實重則置以專權重罪
以正 國法輕則 諭以致仕歸家以全 國體則內
賊旣去外賊何憂其不除然除外賊者臣等之責而去
內賊者則 皇上之事臣感激無地故不避萬死

序

苑洛先生志樂序

楊繼盛

世之談經學者必稱六經然五經各有專業而樂則滅絕無傳論治法者必對舉禮樂然議禮者於天然不易之外猶深求立異可喜之說至於樂則廢棄不講全德之微風俗之敝恒必由之良可悲夫然律呂與天地相爲終始方其隱而未彰也天旣生哲人以作之則于其旣晦也天忍任其湮沒已乎闡明之責蓋必有所寄者先生自做秀才時便抱古樂散亡之憂當其歲試藩司聞諸督學虎谷王公云律呂之學今雖失傳然作之者

既出于吾人則在人亦無不可知之理特未有好古者
究心焉耳先生於是惕然省悟退而博極羣書凡涉于
樂者無不參考其好之之專雖發疽尋愈不知也既而
得其說矣於是有直解之著然作用之實未之悉也自
是苦心精思或脫悟於載籍之舊或神會于心得之精
或見是於羣非之中若天有以啟其衷者終而觀其深
矣於是有志樂之作曰志云者先生自謙之辭也非徒
志而已也是故律生聲鍾生律馬遷著之矣而律經聲
緯之遞變體十用九之明示則未之及也圍九分積八
百一十分班固著之矣而管員分方旋宮環轉乘除規

圖則未之及也。六十調八十四聲蔡子著之矣。而起調則例及正變全半子倍之交用調均首末長短相生之互見則未之及也。六變八變九變之用周禮載之矣。而以黃鍾祀天神以蕤賓祭地祇以太簇享人鬼一造化之自然以黃鍾一均之備布之於朝廷宮闈實古今之絕唱則又有出乎周禮之外者也。宏綱細目一節萬變信手拈來觸處皆合樂之爲道盡於是矣。志云乎哉。其於先儒世儒之圖論備錄不遺者是固先生與善之心然亦欲學者考見得失焉耳。方其始刻之日九鶴飛舞先生之庭者久之識者以爲是書感通所致觀仰秣出

聽之說則鶴之來舞也固宜而其得樂之正也此非其
明驗矣乎昔人謂黃帝制律呂與伏羲畫卦大禹叙疇
同功然卦疇得程朱數子而始著律呂得先生是書而
始明則其功當不在數子下豈曰小補云乎嗚呼太和
在成化宇宙間故先生所由生太和在弘治宇宙間故
是書所由始太和在嘉靖宇宙間故是書所由成則其
作誠不偶然也後之有志於樂者苟能講求而舉行之
則太和將在萬世之宇宙而先生之功至是爲益大矣
然不苦心以求之何以知是書之正不得其說而精之
又何以知盛之言不爲阿私也哉噫盛不敏雖學之而

未能也講求之責深有望於同志君子云

集張節婦冊葉詩文序

成天下之事功易立天下之節義難詒節義之難者又莫難於婦人之所守夫人固多事功懋峻赫炫照耀一世者然或出於遭際湊合矯激騁術以濟其所爲斯固遇之至順凡有中人之才者皆可能之裕如也至于當天下之至變而能氣如雷霆立如山岳雖窘辱頓挫生死利害交於前而不可少動則非見足以定守足以確力量足以擔當負荷者鮮不仆矣然又出於一時義氣激發所致初無俟於持久操守之難使歷之以終身又

未知不變否也惟夫婦人之守節則撫而幼孤振而先業陰柔之身百責所萃其負荷之難如此內無所籍外無所資然獨立狼狽無依其植立之難如此斯須檢點之或疎則羣議紛然而起凜凜焉戒慎避嫌之心自少至老一時不敢少懈則必有聖人之資聖學之功者始足以守之而不渝其操存之難又如此則視丈夫之成事功立節義者難易何如也是婦人之所守不爲天下之至難者歟臨洮張婦王氏之守節其艱苦萬狀雖不可以盡述然觀諸張子免溪之狀王子漢波之傳許子少華之表則其負荷其植立其操存又不爲婦人守

多少不平
之氣非爲
女子而發

節中之至難至難者歟其上而朝廷旌表之下而諸
君子歌詠歎賞之固足以彰激勸風俗之典亦足以見
良心不死之機矣然節義在婦人者郡縣俱有之而節
義在丈夫者天下固不多見節義之難者婦人盡之無
少歉而節義之易者丈夫固反虧之豈非光岳氣分天
地山川精粹之氣不萃於男子而盡萃於婦人之身乎
無亦朝廷於忠義者之不獎奸悖者之不誅此天下
之所以無懼而勸也乎噫古人之節義少損者後之功
業足以贖之今之人不惟節義之掃地又足以壞天下
之事古人之同於婦人者已爲可恥今之人其所爲所

行反婦人之不如予於此重爲感且媿矣諸君子其毋
徒歌詠婦人也乎。

雜著

介軒說

楊繼盛

介安從生生於吾心之義義又安從始始於在天之利是故本諸心而原諸天非由外鑠者也夫人之所以植綱常弘德業參天地匹聖賢皆賴此以爲之質幹是可苟焉已乎必剛與廉二者合而介始成矣然垂懷以忤物則似介之剛而非剛矯情以駭俗則似介之廉而非廉毫釐千里不可不察也而世之號爲介者不求其合于天而求其合於人不求諸吾心而求聲音笑貌之末故能介于外者或不能介于內能介於始者或不能介

于終則是介非介。不過欺世之機械。要寵之筌蹄耳。其害介也不既深乎。觀李封君之介。自心而身而家而鄉。其介之操同。自少而壯而老。其介之操又同。夫固合內外始終而一之者。謂之天下之至介。非歟。則以之名軒也。固宜。論者猶以二君之介不及於天下。惜之。然述之者有司。寇禹江則天下之頌其介也。固有待矣。噫。不苟和之。謂介。然介而不和者。偏也。不苟取之。謂介。苟有意取名焉。雖非貨利。亦謂之取矣。敢以是足介說之義。

記開煤山

臨洮八十里。鎖林峽有煤山二區焉。一在峽之西。一在

官做事

地竺寺前先是開者數爲畚民所阻有司至不能制予以諫開馬市謫官狄道尋欲開之而不敢專也會庠生張子汝言白於府縣允之委府相陳言在董其事乃畚民阻之又如昔予遂偕揮使李子節門人李維芳陳恂宋誥親往治之至則先懾之以威次惠之以賞由是煤利以開畚民遂服予不喜煤利之開而喜畚民之服也遂記之。

祭文

祭易州楊五文

楊繼盛

殿下擊奸
天上誅媚

嗚呼論友於三代之上當取諸縉紳休采之列論友于
三代之下當求諸山林草澤農圃工賈之間蓋君子小
人之迭爲隱見每隨時勢之盛衰而正人君子之相與
惟取其義氣孚固要不當必以區區之勢位拘也自予
登第除南銓始識西臬於賓客中然猶以爲特豁達磊
落人耳及予以諫阻馬市被謫遠謫雖骨肉至親亦惡
其後于家而拙於官樂其歿而幸其不歸也西臬乃慰
嘉禮送之意反殷於初則其相與之情已出尋常萬萬

去年夏予以狂直排姦被杖繫獄其際誠危矣平昔指
天論心者懼禍之及已則遠絕之不暇同時交遊者疾
名之勝已則非毀之惟恐其不足而素以義氣著聞豪
傑自負者恨言之侵已且售計投石要功洩憤於權奸
之門其孰與我乎西泉乃三視獄中通問不絕其徬徨
拯恤之意反殷於初雖齟齬庸賴輩惕以重禍不恤也
則與人交遊之善視世之以勢位相與者其情之厚薄
爲何如哉西泉之行誼在鄉曲聞望在遐邇固難以盡
述然卽此一節則其立心制行當於三代以上人物中
求之矣視世之縉紳貴顯隨時異情者其人之賢不肖

爲何如哉二月初載携乃郎慇懃視問握手交語傾倒
肺肝相別無幾計音頓至噫不棄我於患難如西泉者
幾人而又奪之俾孤我於患難之中嗚呼痛哉西泉之
正人君子使見用於世必能糾合善類不相背負可以
同心共道克濟時艱縱厄於無位使假之以年必能表
勵鄉邑寬鄙敦薄其挽時俗而躋之三代之上可幾也
乃竟突然而逝老天何戕善人之酷如是耶世之生理
已絕宜速歿而倖免何限乃濫及正人君子如西泉者
老天何福善禍淫之不公如是耶毋乃西泉命畱適遭
或然之數爾耶抑西泉古直不善媚天爾耶凡此數者

責實尚大
以責嚴相
獨克

疏

早正奸臣誤國以決征虜大策疏

沈鍊

臣觀昨歲逆虜犯順得利而歸邇又陽言入貢陰懷故
智致厯皇上宵旰之憂奮揚神武張皇六師必欲乘
時以興北伐此固天地神人之所共憤文武羣臣之所
願戮力者也然用兵之機必先廟算方今廟算必先爲
天下除奸邪而激忠義則虜賊不足平矣伏讀聖諭
有能大破逆賊虜寇者人人盡言欽此臣至今思割肝
膽竭股肱以效其至愚臣誠憤懣誓不與此賊俱生切
見輔臣嚴嵩受國重任視如鴻毛貪婪之性疾如膏肓

愚鄙之心頑于鍊石當此之時不聞其勞心焦思延訪
賢豪咨諏方畧以爲治國安邊之策惟與伊子世蕃日
夜圖惟不過爲自全之計人有欲爲忠謀奇計者恐其
勝我也多方以阻之人有欲貢諛言諂色者樂其親我
也則曲意以交之揣摩之術利於錐刀而不用之以經
國狐媚之態病于夏畦而不用之以親賢納賄以鬻官
吏也已成常例則心知其過而不能回開筵以結士夫
也用市虛文則外愚其顯而不能止原其所以納賄者
以爲既得其財而又可以制其心既得其心又可以資
其力此其爲身謀善矣其如國家之事何哉邊將非多

用黃金不可以得官彼曷肯奮身却敵以錢而買死守
臣非累通書幣不可以致譽彼曷肯忘已愛民以私而
爲公乃今考察之時又其父子獲利之日矣朝廷賞
一人則曰由我而賞之也罰一人則曰由我而罰之也
于是人人皆思所以計嵩父子之愛憎而不復知有
朝廷之恩威矣臣非不能指其細姑舉其罪之大者有
十納將官之賄以開邊陲之釁罪之一也受諸王餽遺
令宗藩失職罪之二也攬吏部之權奸誑狼籍至于驛
丞小吏亦無所遺官常不立風紀大壞罪之三也索撫
按之常例奔走書使絡繹其門以致有司聚歛而百姓

無秦檜

不來

之財日削教化不行罪之四也陰制科道官俾不敢言
罪之五也蝨賢嫉能中傷善類一忤其意必擠之歿地
而後已使人爲國之心頃然消沮罪之六也縱其子受
財以歛怨天下罪之七也日月搬移財貨騷動道路民
窮財盡國之元氣大虧罪之八也爲內閣久而奸貪
日甚無一善狀罪之九也不能協謀天討以舒君父之
憂罪之十也故今虜寇之來者三尺童子皆知嚴嵩父
子之所致也又況重之以十罪乎吏部尚書夏邦謨名
爲公室之臣實爲私門之吏大事而白嚴嵩而後敢行
小事書通世蕃而後敢發三公但參謀議豈可以父子

而于預六卿之政邪爲邪謨者少有骨鯁之風昌言執法彼不能不回面而改行籍能陰措其手不過解官而去耳惟其計利之心一動則患失之謀百出始也因賄而得官旣也因官而得賄勢利堅于膠漆道義薄于秋雲妾婦之道至工丈夫之心已喪如之何其察天下之官吏也官吏之言曰內閣吏部要錢吾黨守清無益于事內外遠近相視成風廉耻不行盜賊蜂起今之考察將以進廉退貪不除此三人者雖日去臧墨之吏無庸也身爲汚辱之吏而曰我將進賢退不肖也吾誰欺欺天平使內閣吏部盡忠則六卿盡職矣又何異于丁汝

夔之失事乎。乃今日之事未艾也。猶聞有阻北伐以爲不可者。然虜賊之稱貢也許。亦來不許。亦來而朝廷之出兵也。來亦伐。不來亦伐。善用兵者。可以守。亦可以戰。不善用兵者。不能戰。則亦不能守矣。今能阻朝廷之北伐。能保虜寇之不南侵乎。但整兵列陣。俟隙而後動。以保萬全之勝。則存乎將帥之能耳。今之欲阻北伐者。其心曰。事成則歸功于將帥。事失則歸罪于輔臣。此所以倡爲不可戰之說于其間。其爲欺君誤國之罪。又大矣。伏乞皇上勅下廷臣。將此三人詳議其罪。應誅而誅。應斥而斥。則賞罰明而賢否別。忠臣義士無不

仗劍而起感激奮發爭先效死而虜猶不足滅矣邇者
颶風大作皇上所宜速發乾剛以回天變以慰人心
臣不勝激切惓惓之至

序

送朱縣丞赴尤溪序

沈鍊

余表弟北橋朱子候選曹者數年今得除尤溪縣丞將
行問計於余何以丞尤溪者余詎知尤溪之所以而告
之其道乎哉昔人之言曰一年之計在於樹穀十年之
計在於樹木終身之計在於樹人皆謂張其辭說以爲
名言讜論可以服行而有餘播流於無極余以爲不然
人皆貴自樹也夫托根榛莽之間振起山林之表至於
枝葉扶疎參青霄而蔽白日物莫能禦之者草木猶然
而況於人乎故古之君子其生而飲食居處與百姓同

可食只此
一法

及其久也德澤加於海內功名流於千載豈其夙所稟
受若是哉其所以自樹於已者異也能自樹而後可以
樹人不能自樹者人將仆之矣如之何其樹人也哉夫
自布衣之家而爲丞華衣束帶矜莊堂序之上百里之
民_見然而望之此其可立必非碌碌者矣余知子之心
不以其丞自足也則固不以官府爲營家之資而汲汲
於妻子者國家張設官師以其赤子而付之撫摩之而
人固惟其妻孥之是恤此其於中心忍乎哉然後上賤
而下慢之矣上賤而下慢之則仆之者至矣然則非人
仆之自仆之也君子固懼夫人之賤且慢乎我也而自

尊且貴之自尊且貴之者則莫如不以家自營而盡其
心於民事拒絕苞苴之門而垂意於鞭笞之際上下之
人莫不凜然重之矣然後德澤流而功名章雖欲以丞
自足豈可得乎此其爲營家之道固有太於彼者故能
自樹則抱關之徒榮於柱國不能自樹則公卿之貴不
如匹夫朱子少窮經能達於世務者必以余言爲可服
也

十

其大者乎...
其小者乎...
其大者乎...
其小者乎...
其大者乎...
其小者乎...
其大者乎...
其小者乎...
其大者乎...
其小者乎...

其大者乎...
其小者乎...
其大者乎...
其小者乎...
其大者乎...
其小者乎...
其大者乎...
其小者乎...
其大者乎...
其小者乎...

疏

天恩未報願獻微忠疏

郭希顏

即椒山起
手法

此疏頗鍊

辭故建帝

二字不暇

習

臣退伏映畝生未報恩死何瞑目今天下談士皆稱
南倭北虜爲中國憂臣竊以帝王欲安天下有緩急若
孔子所謂不在顓臾者是已明內之尤急也臣往歲恭
讀聖諭欲建帝立儲者道路相傳以立儲賀臣夔曰
立儲難皇上誠欲立儲則重臣有可與計者如猶未
也莫若安儲臣願陳忠之日久矣以爲說從則兩存俱
利臣之大榮也說不從則出位死罪臣之大懼也乃間
歲星變地震繼又大殿災皆天垂仁愛之象謬意在廷

或有出死力爲皇上計此迄無一二調護者臣欲避死終不言每思主恩感泣忽然忘生又臣嘗疏罷監國後有謗者必追咎及臣則是不言亦死爲負國言之雖死爲報國臣寧一言報陛下不敢言立儲請言安儲何者君相信則儲安兄弟相保則儲安父子相體則儲安相信有道釋疑是也相保有道分封是也相體有道總攬是也三者安儲之急務也何謂釋疑臣觀自古蒙無故之議者仁君不及全其臣履危疑之地者慈父不能庇其子今皇上至愛莫如二王至重莫如元輔其初固何嫌何疑也蓋自言者倡爲二王面陳

此臣等不
可

嚴嵩之說臣恐輔臣疑而不自安則何暇善後然尚可
諉也由差遠也 二王疑而不自安則誰與承祧此可
大慮也由最近也 皇上何不降德音諭元輔以益加
忠謹使知王初無他也不必疑於王諭二王以母忘恭
敬使知嵩終無他也不必疑於嵩夫然後 王心無所
惶惑而師保是依大臣無所忌避而匡贊愈力臣故曰
釋疑而君相相信是爲至和之國則儲可得而安也何
所分封臣聞神龍離淵人易狎之美玉出匱人或伺之
如此乎外防也 二王親則 皇帝之子也貴則 國
本之寄也顧同處京府智與年長則崇高所共欲防不

預設則讒隙所由萌昔三代之盛也大封同姓使各有
寧宇以衛邦國而況於親子乎是故幼而暱就膝下者
白以篤恩也長而出就藩封者所以疆本也今親藩遠
離禁閤臣仰窺 聖慈爲王纒繚但官府不宜久虛山
川若已預待 王誠能慕叔齊之風高子臧之節大臣
畫計 聖明早斷及時 勅王就國周其衛翼殊其寵
數於制於情似爲兩盡臣故曰分封而兄弟相保是爲
至福之國則儲可得而安也何謂總攬臣惟父子之愛
天性 皇上之子幾何恒情體子者未有不身任其艱
大而欲子安於無事也不觀之今時何時乎四郊多壘

此段亦不
擬議

一日萬幾天意人心莫不願大聖人萬年垂拱者誠
以南面事權非皇上神謨獨運太平未可反掌而收
也若曰儲宮臣知天序所屬堯舜不能以揖讓聖愛
無私伊周不得而假手即京府獨處尤宜親就儒賢
養冲質討論往古得失相切劘於仁孝之道而一毫外
務不得與聞况時事固非高枕之日而君父又非倦
勤之年分封之典既定留京之意已明顯皇上端拱
以順天人從容而議建立似無不可者臣故曰總攬而
父子相體是爲至治之國則儲可得而安也內外各守
屏翰彼此永無猜妨宮中門省之牋不時而進麾下富

貴之想奚自而生大之而傳世享國與天齊久次之而全終股肱與國咸休至治昭而夷狄自賓至和感而天地自位至福備而宗社自延此安儲之上計而今日之先急也每嘆古者忠臣不退耕而忘君烈士不避僇以直諫臣嘗得罪輔臣只知天恩莫報輒憤激椎心且先國者不仇其私愛君者必及其後知而坐視非忠圖之不早非智是故在庭不言在野不容不言惟聖明仰慰祖宗九天之望深思聖母一脈之託察臣愚始終爲王之無他赦草莽言計自臣始則士豈有不嚮風刎首爭効闕下者哉

序

都門別玉泉陳先生序

余文獻

予睹北地李先生曰 憲皇帝朝士人善依族六朝在
南都爲甚睹其論可異焉然徐廸功陳拘虛今玉泉陳
先生諸名家所屬皆敦致本始非古國風意哉此又何
以稱焉大都士按匠比緣即薄少吏治不爲省古謂文
章者寔靡切世務要必有取豈欵言已哉士明盛時乃
一切靡靡不當世用其謂何語曰雖有雕脂不療枵飢
信哉李先生之意有所指云廸功拘虛靡可得詳予自
甲辰入西署得見陳先生宛葉間所著人多傳之予不

爲論論其行事著廟廊者始陳先生蒞四川部時因有
市女婢歸之里閨婢母家闕其業行訴殺其女因誣服
將庾死先生躡尋之皆無在令吏人抱令甲與廷中評
爭往數四而發亦不得已卒得直其寃時四明聞公爲
司寇曰陳大夫獄當大夫剛明者故陳先生爲郎不爲
奇請它比類此居郎署四五年時時搜致百氏亦時有
所著皆流涕之意云前陸大夫往備灞先生爲之論次
今昔盜賊之起不即烏合時解散後煩費苦矣稱引歷
代興壞所由其驗鏡可觀也見者謂承平時不宜有此
言嗟乎詞人飾華視百姓爲髦梗肯隱憂却顧計天下

事至此哉無即它論今東方曹濮間事不大章明較著哉天厚社稷今即解散假令未即解散今虜不孩求貢意叵測萬一輻輳突至雲中西北諸饒道安所取給哉嗟乎此豈不靡切石畫當實用者哉與六朝靡靡欸言同乎故省中執所睹聽輒曰陳先生陳先生陳先生今出憲江藩矣江南雖比歲大祲民微重重爲邪不當有東方警郡縣亦時時有米鹽諄告可立決亦無今園土因微暖狀陳先生又劇切龕濟甚當往今取所關策爲齊民覆露之殆所謂岳立虎躍者可勝道哉屬者陳先生南宮較藝出偶過予論曰今律文有在外從按察司

具奏即如此。則院司之臣比肩事上者。今聲折如諸生時。何乃故也。時體何起。自予未對。

壽蕭先生序

大江以南豫章爲一都會。豫章南則爲吉。爲袁。爲臨。臨在袁吉間。非通都大會。民土著不習機利。乾沒人其民老且敦。愿無他腸。往年居鄉間。長老談臨俗。有蕭先生者。幼即孤。不省其父狀。爲何。顧時時問諸鄉父老。曰。吾父狀爲何。即答曰。某近。似即喜不者。輒請不起。食鄉人憐之。爭爲指擬。彷彿其父狀。肖成鄉人。曰。大肖。而翁先生即置中堂上。出入伏請。後行。鄰有龔先生。曰。即無論

是與人行
乎

其肖不肖人情終日嗟嗟語肺腸即反面懔不相識乃
翁沒數十年顧求若狀乎誰爲此故里聞皆稱蕭先生
爲孝友人先生後搜致百家暨齊民諸術皆得其雋永
人勸其仕輒曰仕進難即致通顯章表亦時時用機利
學俯仰毋苦我乃即鳳山下爲隱居後見道路人病又
置宜旅館憇道路人道路人即弗病今少傳嚴公爲之
論著其事俱見記中客聞之嘆曰若非道路人哉今
士受天子簡書握金符膺專城視道傍殪相屬曰是道
路人固當乃田野人視道路人云然如頃歲大祲江浙
旱楚旱吳旱淮南又旱得公等數十人布天下豈令我

皇上憂旱哉少傳公所論著有味哉有味哉故人皆知
蕭先生爭爲之問體貌豐瘠年幾何其子若孫爲何歲
甲辰臨蕭汝薦氏舉進士郎舍鄉人時過論汝薦坐終
日口不道訕衽下掖破葉葉補劈積見人持刺紙來額
籤寸赭赤即不懌曰士靡則誣國靡則通務華去根者
也愚期期知其不可客曰君安得此長者之言曰大公
嘗以是教我大父即蕭先生先生今年七十矣配某儒
人亦七十一里人咸欲壽之文獻曰蕭先生長者也大
雅整之於身施而不得所藏百家蘊皆可著廟堂皆絕
口不談顧其中愚若究竟之矣彼固長者也語曰寧爲

砥石毋爲蘭膏此言雖小可以喻大

大

那示世為蘭香典言雖小何以偉大長

書

報張範中

客冬維楫湖干則劉生芒然奉書還報兼之佳梓三種
辱之時追霜雪日夜走遂未有以復茲宜復書中所采
當時諸大貴人語意旨甚厚嗟乎僕何人哉足下乃以
爲可語則亦不敢鑰口僭布區區夫聖人未嘗顧精文
章之學而六經炳蔚萬世其嗟左馬曹劉李杜者流相
繼颺起卽難較聖文後之言文者亟稱道之也千載榛
蕪李何再闢俾海內學士大夫重覩古昔譬則鳳麟在
郊羣心快之且鳳麟之爲天下瑞也求其耕疇而駕遠

何豈能及
李

也。則謝牛馬而世卒不屈鳳麟於其下者以其文也。以

此句亦非

其文非以其用也。而世之論文者乃責其亡用於世。則何以責鳳麟乎。謂鳳麟之文而亡用可也。謂鳳麟之文而亡用而不及牛馬也。卽婦人孺子而笑之。文選者鳳麟之迹也。而鄙之以爲不足讀。是謂鳳麟之不能耕駕而鄙之者也。非忌則愚。李何之則古以綴文是李何之。所以爲天下重也。而乃誚其奔走奴僕之不暇。然則述黃虞姬孔而談仁義道德者。亦將爲奔走奴僕乎。甚哉諸貴人之言之疵也。諸貴人亦豈能必是物。遂見棄於世乎。適足取笑而自黯耳。聊取足下所教我爲以復足。

下足下其亟釋然於鄙人之言毋爲諸貴人所惑而且以惑人也有便再托報音

報劉一丈

數千里外得長者時賜一書以慰長想卽亦甚幸矣何至更辱饋遺則不才益將何以報焉書中情意甚殷卽長者之不忘老父知老父之念長者深也至以上下相孚才德稱位語不才則不才有深感焉夫才德不稱固自知之矣至於不孚之病則尤不才爲甚且今世之所謂孚者何哉日夕策馬侯權者之門門者拒不入則甘言媚詞作婦人狀袖金以私之卽門者持刺入而主者

又。不。卽。出。見。立。廐。中。僕。馬。之。間。惡。氣。襲。衣。裾。卽。饑。寒。毒。
熱。不。可。忍。不。去。也。抵。暮。則。前。所。受。贈。金。者。出。報。客。曰。相。
公。倦。謝。客。矣。客。請。明。日。來。卽。明。日。又。不。敢。不。來。夜。披。衣。
坐。聞。雞。鳴。卽。起。盥。櫛。走。馬。抵。門。門。者。怒。曰。爲。誰。則。曰。昨。
日。之。客。來。則。又。怒。曰。何。客。之。勤。也。豈。有。相。公。此。時。出。見。
客。乎。客。心。恥。之。強。忍。而。與。言。曰。亡。奈。何。矣。姑。容。我。入。門。
者。又。得。所。贈。金。則。起。而。入。之。又。立。向。所。立。廐。中。幸。主。者。
出。南。面。召。見。則。驚。走。匍。匐。階。下。主。者。曰。進。則。再。拜。故。遲。
不。起。起。則。上。所。上。壽。金。主。者。故。不。受。則。固。請。主。者。故。固。
不。受。則。又。固。請。然。後。命。吏。內。之。則。又。再。拜。又。故。遲。不。起。

妻傲真若
子只是知
金一季

起則五六揖始出。出揖門者曰：「官人幸顧我。」他日來幸
亡阻我也。門者答揖大喜，奔出。馬上遇所交識，卽揚鞭
語曰：「適自相公家來，相公厚我，且虛言狀，卽所交
識亦心畏相公厚之矣。」相公又稍稍語人曰：「某也賢，某
也賢，聞者亦心計交贊之。」此世所謂上下相孚也。長者
謂僕能之乎？前所謂權門者，自歲時伏臘一刺之外，卽
經年不往也。間道經其門，則亦掩耳閉目，躍馬疾走過
之。若有所追逐者，斯則僕之褊哉。以此常不見悅於長
吏，僕則愈益不顧也。每大言曰：「人生有命，吾惟守分爾
矣。」長者聞此，得無厭其爲迂乎？鄉園多故，不能不動客

子之愁至於長者之抱才而困則又令我愴然有感天之與先生者甚厚亡論長者不欲輕棄之卽天意亦不欲長者之輕棄之也幸寧心哉

報徐子與

累奉遠牘知足下之爲閩慮至深也前使者以軍書至僕卽進言督府卽傳檄汀兵還汀矣督府雖罷遣歸猶欲立之帥長亡事則農有警卽舍耒而刃僕因極言汀不可一日亡兵兵餉復匱乃云非卽欲餉之姑羈之耳且言二千石善爲理也足下其竟如何哉武平報山寇復起信有之則汀何待焉吾輩旣不能長驅中原飲馬

河洛乃使持戈負矢周旋羣醜。蓋談之矣。海寇大都多
華人。華人狡善。詒夷福清之陷也。蓋華人先其夷於睨
睥間。守睥者覲其夷也。遂驚而逸。旣陷。華人乃又先之。
詒夷以獄此帑藏也。夷遂呼其類數千人。闢門以入。見
其纍纍然繫者。以爲守帑卒也。詰帑金何在。不得。則縛
而刃之。乃華人已羣入藏中。負其數萬金走矣。夷窮亡
獲。遂環山而掠。卽敗絮腐糲亦喜而內之。囊中人言此
何窶而貪也。不知華人負之矣。及其敗也。其俘咸夷。華
無一夫被創者。華人亡論負其國。乃又負夷。今且多持
其金。驕其妻子。沽酒啖肉。嬉遊間巷矣。此何稱編氓哉。

爲今之策先策華人夷可不策而定不爾者亂無已時也而策華人卽僕亦罔知策所從出足下謂勿詰其漁商者誠是也但今之漁商者有司何能詰之詰亦亂不詰亦亂其意以爲漁商者猶勞且費也不漁不商不勞不費持大刀走數十里便可得黃金數斤狎美婦人數十揚揚而去我兵畏睨豈不愉快得意哉此華人之心卽蘇張復出不能移易之矣而欲一有司召號之復固知其難也假使諸葛司馬諸君復出不知亦作何狀足下所使代謁督府者僕命之察之羣屬咸無一人至者惟足下裁之吳生何詩寄我一讀

記

七月西征記

宗臣

不署兵影
可以規
不募者

謂讓酋長
已爭要領
免不能制
之此記良

戊午五月海寇既平於是悉罷諸所入戍者先是粵兵
三千以丁巳十月徵至戍省中督府至亟下米金牛酒
勞之已而寇至檄其往不往也匿之民間而督府既已
檄閩兵勦賊歸矣於是粵兵慚會其會長以千金爲其
二子取婦欲去遂日夜請之督府督府業已厭之請
上罷去而檄予督之西時七月六日也故事召兵餉金
咸頒之會長酋長輒匿其半而半給之以故任其掠不
問予於是召其會長跪之庭誠之曰而提三千人食我

四萬未聞其逐一賊也。若後匿羣酋金任其掠者。吾且縛而千金婦致之。闕下於是酋長大懼。出則嚴戢其羣。母掠予至。延平聞其不掠也。輒又厚遺其酋。長牛酒。是時汀守徐君使使來問粵兵狀。予報以尺牘。其詞曰。歸自建安。則有護軍之檄矣。其人感虎而戰。日夜繩之。僅不掠塗然。亦其塗之人。從其雞犬孥孺而內之。他所故免足下。幸傳檄塗居者。母縱雞犬不收。母不能一時去。其孥孺以爲護軍使者憂也。再二日至。將樂羣酋之至也。咸舟至。將樂則陸。是時秋炎。羣酋畏炎。不日馳而夜馳。予與之共馳。輿不雞鳴不停也。蓋十日而至石牛石。

牛去汀百里其地故有塾云塾師聞羣酋至輒匿之山中而獨畱其學子而髻者守笥酋睨其笥不知其書笥也持刃劈之見其爲書則又碎其書於是學子頓足而泣亡何酋又網其池魚學子者業不知畏酋也旣已忿已又闕其網魚輒大呼曰客兵作賊因裂其網投之於是酋大怒卽手縛之而訴之酋長曰是子竊吾刃也酋長信之旣已縛之一夕明日驛吏入言狀予怒命從事往讓酋長酋長懼而詰人安在則已繫而去之三十里矣於是追釋之又二日至汀徐君又大勞其酋長及羣酋以去自省抵汀蓋千里而二旬始至其所經雖少焚

劫然雞鴨魚鼈門屏廬竈蕭然矣出瑞金遂益大掠而予間從輿中問父老父老輒爲予泣曰吾民之苦客兵甚於盜也夫當事者走千里召外兵擊賊豈不至急民哉及其至乃不肯發一矢徒攫金而歸也歲費帑金數萬卽道塗牛酒又半之矣卒乃使其民憂嗟怨歎若覩賊焉嗟乎後之談客兵者慎念哉

九月西征記

予以八月二十八日出闡則泰寧報粵賊急予卽下檄邵延各郡邑兵夾勦而身與數騎星馳而西至延則賊已殺泰寧簿又擄其衛使湯予曰事迫矣於是檄歸化

兵截其西、邵武兵防其北、將樂兵阻其東、而謝倅時視
事永安、則檄謝督兵截其南、馳至將樂會。使君顏使
君留將樂防賊之東、而予督數百騎徑趨歸化、至白蓮
驛、則賊已遁紫雲臺矣。臺去白蓮六十里、歸化永安沙
縣各百里、而歸化又賊入汀、歸粵之要塗也。予以是夜
馳至檄其邑兵五百、粵兵二百、付李丞蘇簿及豐從事
馳之紫雲、兵急不及餐、而予取邑父老米三十石、令健
兒數十肩隨之。賊是時已據紫雲數日、延平衛使劉周
率其衆與賊戰、賊佯敗、衆逐之、賊伏起環戰、遂殺我兵
數十人。已乃聞歸化兵至、輒驚走。先是賊過歸化、歸化

人善弩輒射殺數人賊遂遁至語人曰吾遇延平兵卧而戰遇永安兵坐而戰遇歸化兵立而戰蓋懼之也賊既遁而歸化兵追之遂逼永安永安在萬山中而積穀寮人最悍於是謝倅檄積穀寮兵三百出戰擒數十賊獲大旗追至百里不及而歸而賊遂夜從上杭歸粵會上杭兵又追擒之謝倅馳報予於是勒回所遣歸化兵罷豐從事還郡明日遂發歸化至白蓮其丞廣陵人也老而被創覲予流涕予詰其狀則曰賊從泰寧來乃徑至驛云其鼓而登堂而朱衣者蓋少年美丈夫也是時驛中人惶急走而丞負廩金匿之暗室中少年問丞安

張皇心
盜輒勤兵
不已從來
如此

在於是羣賊四索曳出之欲鞭之而少年止之曰丞老
矣速取金來宥女於是驅而之賊中少年獨坐上坐見
丞蹠輒以手扶之起曰此官人也遂呼之官人與之坐
而列所掠諸婦於旁諸婦有抱兒者輒自乳其兒其兒
啼少年輒啖之果代抱之而諸婦如對其家人不懼也
少年謾言曰公以我爲賊乎我非賊聊與二三兄弟訪
故舊此中不免取牛酒爲諸父老費而何當事者以我
爲賊而勒官兵捕我也公不聞泰寧簿與衛使之事乎
卽口不畏兵然時時遣其從外瞭聞兵至輒錯愕耳語
起矣予曰女奚策而歸曰賊旣已解去腰間廩金而丞

之子復以十金踦進遂釋丞然初索之暗中時已被三
創矣而諸婦之家亦各進金放去余因太息曰嗟乎世
言賊難圖者豈不惑哉夫丞卑官耳而畏不敢縛止利
其數金此其志非雄桀可知矣且賊號千人實不滿二
百又多老穉其間方初入寇時使有司者僅得中智之
士率健兒善射者數百人扼其要而伏以待之可一鼓
而擒也乃張簿以輕進斃楊帥以貪功縛劉周以失險
潰此何說哉此何說哉予又聞賊之初至泰寧也泰寧
故無城而簿遂率諸健兒出戰簿亦衣健兒衣賊不知
其簿也已殺始知其簿遂駭而走而楊善之逐賊也會

二記俱能
不遲

有部兵獲一賊級善奪之兵噪而散而賊遂禽善以去
然則楊之罪甚矣甚矣世人覩賊殺簿禽使以爲桀不
可禦是豈賊桀哉予還將樂與顏使君大怪之而因采
掇其事以見賊不足慮而當慮所以禦賊者嗟乎是亦
予之罪也夫

西門記

戊午四月旣望予至自汀是時都御史阮公被逮北去
島寇直犯閩安省中人惶急走而諸大夫日議守城事
遂以予守西門城凡七門而西門者芋原橫塘南臺之
所取道也先是有司悉部勒諸父老子弟守陴予登陴

便有方畧

則○悉○罷○諸○所○貧○者○疾○者○孤○而○懦○者○畱○其○壯○與○之○約○曰○晝
則○家○夜○則○啤○擊○柝○鳴○撓○而○懸○火○啤○外○不○如○約○者○以○軍○法
從○事○會○明○日○報○寇○將○至○六○門○咸○閉○矣○而○城○外○人○數○十○萬
大○呼○祈○入○予○遂○日○關○西○門○入○之○晨○起○輒○坐○城○上○列○健○兒
數○十○於○門○人○詰○而○入○而○牛○馬○雞○豚○羣○羣○薄○吾○坐○不○問○也
客○有○言○關○門○誠○善○獨○奈○何○不○虞○奸○人○哉○予○曰○客○休○矣○予
辦○此○矣○卽○有○奸○人○者○吾○任○之○於○是○爲○檄○召○城○外○百○里○所
蓄○薪○穀○悉○徙○之○城○中○不○徙○者○吾○縱○亂○兵○焚○之○而○壯○夫○有
不○肩○薪○穀○而○入○吾○門○者○不○得○入○於○是○城○外○薪○穀○日○以○萬
石○塞○門○矣○城○外○人○食○城○中○者○不○下○十○萬○城○守○凡○五○十○日○

與其臨事
而實城中
則若先之

而斗米不增一錢。蓋以多故而議者謂城門外廬逼城者恐賊至焚之以攻吾門。於是凡有廬而近者輒命焚之。煙裊裊四起。廬者還泣不止也。予則止。西門之外之廬不焚。下檄曰。寇至五十里。爾其自焚。吾不忍爲爾焚也。其有樹於城側者。議者恐寇至登樹闕我。於是下伐木之令。護戎者持斧環城伐之。至西門。余偕護戎出視。棗百株。梨百株。垂垂實矣。護戎請斧。余止之。曰。毋伐。卽寇至。何能登此柔榦哉。凡城不屋其上。而闕城則屋。蓋其城故於沙。不屋則雨浸善壞。而議者謂城而屋不便擊寇也。於是每楹輒毀其一路。寇至則立之屋上擊寇。

予笑曰兵不能雄之行間而能雄之屋上哉。且一雨而千楹何恃也。遂止不毀而外郡以援兵至。凡二千人咸余所部兵也。余令護戎日督之野習射。夜則分屯之堞門五人一爨十人一人下堞取薪不取薪而下堞者以軍法論。以是兵戢不擾而邵武部兵之出守西夾江也。至則咸病臥村墟中。予命楊生急馳而人劑之。遂起。是時寇已陷福清。福清人攜孥息至者日以千計。而鎮東之於福清近也。寇旣去復攻鎮東。鎮東人善守以故不可拔。別分一寇興幾拔。會當事者提兵至。遂解興之圍。而寇之寇泉也。巡臺被戎督守。遂解去。往往出游兵伏。

擊有所俘獲以歸當是時興泉之寇已南而鎮東者尚
屯海上意揚揚甚也會督府馳至則檄兵數千連數十
大艚要擊之寇輕我輒駕大艚逆我而我兵奮怒弩礮
亂發乘風大呼寇艚反出其下遂大肆擒獲餘者沉之
海中捷至悉罷諸所守陴之卒與外兵入援者予亦解
搦還署而父老羣然別余泪下霑衣焉時五月二十三
日也余懼往事放失無以詔來遂書而存之

雜著

慎履

宗臣

予聞之蘇子辨天下之大事者有天下之大節者也則斯語豈不誠甚當哉是故吾未見夫居則憤憤出則炳炳者也吾亦未見夫居則井井出則汶汶者也是故古之君子其持已也辟之持璧焉全則塗不全則瓦矣其戒慾也辟之防川焉一決則潰敗四出而不可收拾矣其忍性也辟之滅火焉不以水沃之則炎炎而上其勢將至於燎原矣是故君子慎之也今夫上書公府獻策當塗稽首乞恩掃門求謁非高士之風也險心側目日

張語

伺有司之短而持之而因以行其私不得則肆言訕謗
轉相煽惑非元吉之履也假借名器逋賦侵畝儒服跽
立雜之胥徒甚或代書訟牒以需賄食其視有司之署
若履其家焉非大雅之觀也狎驪徵逐卮酒歡噤朝酩
夕酩蒲博大呼而或游戲倡優淪溺簪珥非端人之習
也日夕衢市凌雜米鹽一言不相中輒張目攘臂折支
敗而枉楮圜固且甘心焉非居身之珍也歲暮途窮壹
志苟得餽稟出納飲祀損相需賄里胥代庖而竊非長
厚之道也多士戒之哉今有言麟鳳之遊於郊也人
不爭覩之鵠鷗之鳴而聞之者掩耳而走客之由行也

此公作八
閩學使者
義規之二
地

松栢則敬之桃李則悅之荆棘則思以鋤之矣夫閩不
稱彬彬鄒魯哉諸生生其間而自有感於先達大儒名
卿之爲者其爲麟鳳松栢之儔明矣萬一而有鵠鷗荆
棘者出焉亦何面目以見爾之先達長者乎况又有惡
而鋤之者在也。

誠俗

夫禮者所以維俗也而俗之所趨一往而不可復則反
至於廢禮嗟夫禮不能維俗而反爲俗所廢可畏哉可
畏哉其他不論論其大者今夫冠而字之聖人教天下
以成人之道也今髻而學者輒字矣頃之號矣未及勝

衣而已巍然大人長者之稱矣及其冠也父既無以命
子甚至竊仕者之冠冠之何謂乎昏禮者聖人教人以
人道之始也今也不擇德不論才富則昏之貴而富者
亟昏之鬻田娉婦殫家遣女佩環盈路繒綈滿車不然
者夫厭其妻而舅姑輒怒罵其婦昏姻論財古之君子
夷之而今乃甘心焉喪禮者聖人教人以厚終之孝也
今也苦塊未視布筵勞賓飲食相藉破涕爲笑召僧共
佛吹竽伐鼓衰絰而居展采姻娉富有貲者泥堪輿之
說而暴露其親以求利後人貧者至以其親骸而付之
水火滅之是仁人孝子之所驚悼而不忍言者也而今

之人何心哉祭禮者聖人教人以追遠之孝也今也六
厦廣室高臺曲池少者千金多者萬金而爲之先者乃
不得只尺之地而受享焉貴人之臨供帳治具烹羊庖
羔羞醕雲縟而爲之先者則尋常羹豆之設而無所加
意焉且歲時墓祭又多男女之戲而耳目之觀也何視
其先不若其身與客哉文中子曰冠禮廢天下無成人
矣昏禮廢天下無家道矣喪禮廢天下遺其親矣祭禮
廢天下忘其祖矣蓋傷乎蓋傷乎世俗者而爲之非也
諸生者而亦復爲之非之非者也且諸生之所最尊隆
效法者非朱子哉其所輯家禮固天下信之而萬世傳

之者也諸生內以諭其父兄外以諭其鄉之長老子弟
而稍稍習其說行之雍雍磷磷斐斐翼翼而遠近觀則
古禮雖不可盡復其禁俗之不至於廢禮也有餘矣是
在二三子哉是在二三子哉

明文奇賞卷之

吏官陳仁錫明卿甫評選書

記

太華山記

李攀龍

記貴風然
浪帶間情
為佳

經曰太華之山削成而四方其高五千仞其廣十里蓋
指華中削成而四方者爾四方之外官之盡華山也自
縣南十里入谷逶迤上二十里抵削成北方壁下乃谷
卽西南出不可行行東北大霤中霤中一峽裁容人左
右穿受不滿足穿受手如決吻人上出如自井中者千
尺曰千尺峽北不至十步復得一峽百尺人上出如前

重句可刪

峽曰百尺峽則東南行崖往往如覆敦出人穿其穹中行穹中穿如仄輪牙也厓絕爲橋者二所東北徑雲臺峯東南得大阪可千尺人從其罅中躡銜上阪窮爲棧五步顧見罅中如一耦之眦新發諸耜矣罅中穿如峽中峽中銜如罅中峽中之縞垂罅中之縞倚皆自汲也棧北得厓徑丈人仄行於穿手在決吻中左右代相受踵二分垂在外足已茹則齧膝也足已吐是以趾任身也北不至十步厓乃東折得路尺許於厓剡中入並厓南行耳如屬垣者二里剡窮復西出厓上行則積穿三丈有厓從北來踐此厓上複高三丈自跋首南行厓如

前剡中屬耳、巍耳矣、三里而近爲蒼龍領、領廣尺有咫、
長五百丈、厓東西深數千仞、人莫敢睨視、是酈生所稱、
搦領須騎行者矣、雖今得拾級行哉、足欲置之、置先嘗、
一、足、于、級、上、置、也、然、後、更、置、一、足、其、所、置、足、猶、若、置、入、
石、中、者、猶、人、人、不、自、固、匍、匐、進、也、級、窮、得、厓、踰、焉、高、二、
丈、一、隅、西、北、出、人、從、其、隅、上、南、一、里、得、厓、又、盡、礧、不、可、
以、穿、縑、自、汲、也、是、皆、所、謂、懸、度、矣、不、至、百、步、西、北、冒、大、
石、出、厓、下、西、南、上、二、里、得、松、林、五、樹、稱、五、將、軍、厓、上、者、
不、見、杪、厓、下、者、不、見、本、從、縣、中、望、見、松、如、樹、莢、也、西、一、
里、有、大、石、如、百、斛、困、不、知、何、來、客、於、此、橫、道、而、處、踰、之、

爲穿徑二十所西南百步得巨掌掌在削成東北方
壁上、不盡壁五丈許人不得至掌二丈許掌形覆其柵
北引如三尋之戟從縣中望見掌卽五指參差出壁上
也、又西百步詣削成四方上矣西南望削成四方中東
北望所從上削成道道從東北隅出二十里是錡于雲
臺峰猶杓之在斗矣削成上四方顧其中、汧也上宮在
汧中西北至井在上宮前五尺許水出於其上潛於其
下、東北淫大坎中凡二十八所北注壁下壁下注道中
一穴北出水從上竅之也、四壁之穴各在一搏上宮東
南上三里許得明星玉女祠舍神霧稱明星玉女持玉

漿乃祠在大石上大石長十丈許祠前輒拆拆下有穴
穴有石如馬折南五丈坎如盆者五所如臼者一所水
方澹澹也下從祠東南峽中行二里得池二所大如輪
東南行三里望見衛叔卿之博臺在別顛爲埒不盡厓
尺中如砥可坐十人厓南北縹緲也欲度者先握縹
自懸厓中乃跼厓自汰令就縹不得縹還跼厓自汰得
而後釋所自懸縹也此卽秦昭王使人施鉤梯處也西
南上三里許得一峽如括曰天門門西出爲棧而銅柱
陜不能尺長二十丈棧窮穿井下三丈竅旁出復西行
爲棧而銅柱一池在石室中不可涸也天門旁有臺如

叔卿之臺南望三公山三峯如食前之豆是白帝之所
觴百神也從上望壁下大谿谿肆無景卽日中窈窈爾
久之一山出其末若鏃矢頃卽失之矣是爲南峯南峯
前出南壁上東峯出東南隅壁上西峯出西北隅從下
望之五千仞一壁矣攀龍曰余旣達削成四方中不復
知天不可升矣余夫善載腐肉朽骨者乎及俯三峯望
中原見黃河從塞外來下窺大壑精氣之所出入又未
嘗不爽然自失也

新設寧武兵備道題名記

山西三關先是蓋止鴈門一兵備岢嵐兵備實協理之

其約疏數
虛實九邊
無官位矣

其於防秋尋加守巡冀寧二道嘉靖三十三年復以清
軍屯田驛傳若守巡冀南河東諸道迭出而分區監督
焉三十七年改鴈門爲鴈平岢嵐爲偏寧其五道監督
如故明年仍以偏寧爲岢嵐兵備以偏老岢嵐河曲四
守備西路叅將老營遊擊地方兵馬屬之鴈平兵備仍
駐代州以廣武北樓平刑三守備東路北樓太原叅將
地方兵馬屬之其八角利民神池寧武四守備中路叅
將地方兵馬則以設今道云從御史楊公美益之請也
惟是三關與大同相爲表裏右衛水口等處直虜南窺
朔應諸州之道其於要害視三關有輔車之義卽虜一

道出沒我得以所直道兵馬蹙距踵襲而自相爲應何
慮不及三關延袤乃至八百餘里而虜得以探疏數爲
堅瑕揣薄厚爲虛實時分時合雖漢兵如雷風安能八
百里趣利也惟是席國家廣大守在大同云爾時則鴈
門一道岢嵐一道協理之足矣然猶恃藩籬以撤閫闕
不知中彊者外益固之爲謀周也亡何以二道爲不足
加之守巡冀寧二道爲四道復以四道爲不足加之清
軍屯田驛傳若冀南河東諸道爲七道三關凡八百里
而七道以臨之卽有五叅將一遊擊十一守備亦惟鴈
門岢嵐二道相信而服習五道者非常所屬卒然不相

爲用十羊九箒猶之愈數而愈疏。清軍屯田驛傳曠所
司存冀南河東棄所分署是盡山西而事三關委境內
而勤一圉猶之愈實而愈虛。不知疏數以形明虛實以
制槩也。注鴈門以鴈平注岢嵐以偏寧似矣。不知十一
守備分地如石畫相交尺寸獨以八守備隸偏寧一道
亡論石隰諸州防河之役行兼坐累有妨簡書卽虜一
出套便涉其境而亭障積阻烽火優游已難爲卒。又况
仍以五道便宜掣肘糜費無益豈所謂明形而槩制乎
時已權生變已常存寧武之介於鴈門岢嵐之間亦猶
鴈門岢嵐之左右於寧武疆場之政雖力有餘不備非

其域雖勢有餘不守非其約非其域不闌出徼功非其約不聲援爲德辟耳目之於視聽不相假借然後可以著官知之良而稱同心亦使朝廷得以責所不備以其所備按所不守以其所守捷無倖賞挫無佚罰三關猶一體也省冀寧若清軍者七道而爲三以重司存養內治境內不疲於奔命三分其八百里而勞逸均各可以朝檄而暮集而齊一其指使凡五決策以設寧武道而議始成如此豈偏見一時之利害不參邊大計始終者右衛水口爲虜必窺之道卽中路叅將直之與大同兩掖犄角相逐銜尾相隨厚集其氣是顧是限者非寧

武乎與偏頭鴈門翼擊而夾攻爲常山蛇勢者非寧武
乎明形槩制以回視聽新旗鼓出繕入計爲邊長老貽
數百年之利身自作始者非寧武乎形不自勝制不自
舉沈公所謂其人哉首至者未幾論罷繼至者尋以遷
行沈公明形槩制三年於此矣乃少司馬萬公某獨以
少方伯奏留之豈不曰分地不量形與無地同量形不
善制與無形同善制不得人與無制同得人不久任與
無人同是二公者先後奏請蓋相足焉可謂同心謀
國重惟沈公之賢適與設會也因具列之使後之君子
得以觀寧武道所繇立者蓋以其人如此云

A close-up photograph of a rectangular piece of aged, light brown paper. The paper is heavily marked with dark, irregular ink smudges and markings, which appear to be remnants of a stamp or seal. The markings are concentrated in the center and lower portions of the rectangle, with some lighter, more uniform areas at the top and bottom edges. The overall texture of the paper is visible, showing some grain and slight discoloration consistent with age.

This image shows a blank, aged, cream-colored page, likely an endpaper or flyleaf from an old book. The paper has a slightly textured appearance with some minor discoloration and faint, dark smudges or stains, particularly towards the bottom left corner. There is no text or other markings on the page.

世授

This image shows a blank, aged, cream-colored page, likely an endpaper or flyleaf of a book. The paper has a slightly textured appearance with some faint smudges and a dark horizontal line near the bottom edge, possibly a binding or a tear. There is no text or other markings on the page.

論

仇香化陳元論

李攀龍

一東精音
可與道古

慨自漢室不綱德化莫振權奸肆其羽翼貪暴恣其鱗
甲民生斯世若猛虎之苛者歲無寧日嗚呼元元黎庶
何不幸耶夫天生民而立之君使司牧之又慮君不能
以獨理立之臣以代君而治之身其職者蓋思曰民生
至艱民命至重慎無嚴刑峻法以徵怨我百姓也於是
乎爲之明其倫理爲之長其恩愛俾翱翔鼓舞於化國
之澤其間若緡蠻不靈逸居而近於禽獸作不祥以橫
行家庭者行且薰陶而革之噫必如是然後體上天愛

民之意而無愧於代君治民之責也嘗觀仇香之長蒲

一篇好文字自以一語銘過未

亭陳元不罰而化是何修何營耶香之語與者曰鷹鷂
不若鸞鳳乃知香之所以治民者固有在也夫皇祚陵
替由質而桓馭委其轡馬駟其啣居帷幄操國柄者赫
赫乎豸豹之飾也果能爲漢天子鳴和鸞於皇路邪分
邦寓佩璽綬者昂昂乎鸞鷂之服也果能爲漢天子樹
爵叢於生靈邪日以鷹鷂刑威督責天下而天下之人
籠絡於刑威中亦覩之如鷹鷂之擊而凜然不敢犯獨
香以鸞鳳之治治之豈無見哉彼見其民心至愚而神
雖椎埋屠狗之夫極其驚悍而莫顧者亦未必無乳哺

之念。特不教則不興。不觸則不動也。吾教之使興。觸之使動。則懷家人母子之愛。而樂吾在上者。德政之覓。猶之鳳凰覽德輝而下之。人莫不慶休瑞之至也。是故元之不孝。能肆於香未爲蒲長之時。而不能肆於香旣爲蒲長之後。良其鸞鳳之治。有以興動其心也。不然。數十年元惡不悛。一朝而改圖之。豈區區尚刑法者所能變哉。故爲鷹鷂之治者。可以革民之面。而不可以革民之心。爲鸞鳳之治者。可以懲民爲惡。而亦可以勸民爲善。以此較彼。孰得而孰失邪。夫小人閒居爲不善。見君子而後厭然。豈君子有刑威以制之。而小人故消沮閉藏。

之若是也。蓋所爲之不善，恥於君子相形之際而恥之。必思厭之矣。夫元之不孝，正間居爲不善類耳。不有抱鳳德之君子，而徒欲以鷹鷂之威攻擊之，將何時而悟哉。此香之化元，非少鷹鷂之志也。思自附於鸞鳳而不爲之也。自元之一家被香之德化而篤於孝慈，則由是而鳴至治於國，遍蒲亭皆孝慈也。由孝慈而推之，則兄弟有恩，春令在原矣。夫婦有別，關關雎鳩矣。朋友有信，鳥鳴嚶嚶矣。化一人而蒲亭化，與一人而五倫明，孰謂鷹鷂之治得與鸞鳳同日語哉。噫，寵有一錢之受，寬有蒲鞭之示，彪有買父之稱，香有鸞鳳之志，此數子者，其

功勛在漢郡邑其德澤在漢吏民而其姓氏載之名循
吏之編豈虛也哉嗚呼有循吏無明君雖得寵寬彪香
輩布其德澤而貪殘者鳥集以搏噬而逞其爪牙如生
民何譬之孤鳳鳴於衆梟之中何以勝惡聲之聞也又
其甚者梁冀雖除五侯猶熾是前拒虎而後退狼矣又
其甚者寵豎作威名賢禁錮是築鴟棲而毀鳳巢矣卒
之雌雄莫知而柄落於虎視之手猶鳥鵲之畏多風也
去高木而巢扶枝自以爲得所之安然大人過之而探
其穀嬰兒過之而挑其卵故漢桓靈之治天下其鳥鵲
之智與

當時無河
患至此

序

送王中丞督理河道序

李攀龍

今天下御史中丞自臺中山開府者無慮數十所矣越
在四境非北事胡卽南結越其不事胡結於越者宗人
大藩仰給縣官橫不可治不則盜賊亡賴依阻山澤弄
兵自喜不則挾持左道動搖衆心不知所爲此視之胡
若越未亂而有其形矣而公方且督淮揚以北四部刺
史大司空水部七使者行治河則
天子壁馬寔式靈之瀕河吏卒無伐買薪石之費大興
人徒之勞由淮揚以北數千里漕具如故江南數十郡

之芻粟日銜鱸而至也不北事胡而南結越無宗人大
藩仰給之擾盜賊弄兵之憂左道動搖不知所爲之慮
歲滿且拱手遷去矣無已而欲有所爲則有餘以浸漑
上潰其防令百姓引水饗其利不可也使數千里多就
渠用注填闕之水漑澤鹵之地自疏水力雖使爲沃野
猶之陸漕不可也使民焚牧其棄地而聽其所爲自弛
其禁濬而不洩則曲陣川以逆水勢雖有少府稍入不
可也三者以利民然且不可公雖不拱手遷去不能矣
余入關中益聞公嘗分泉潼水上備它盜得商洛山巨
寇黃守矩者數十人格殺之及見公坐計陝以西緣邊

四大中丞幕府軍士事胡者歲數百萬轉相餉也是年
虜大入上郡以軍士食給亡所掠去又及見公與右史
大梁李君計宗人在朝那占種民田不爲輸租縣官者
殆萬頃議請上以其所不輸租筭如祿使自人因著
爲籍得田萬頃云此以事胡越而填撫宗藩虞盜賊不
知所爲者之變何不可者而以公督治河固以爲自臺
中出開府者猶之有人哉唯是

天子作新明堂而治明年春屬受計之期朝諸侯而圖
天下之事蓋執玉帛者萬國焉掄材使者乘傳出西南
夷得因巴蜀吏幣物致其君長而喻以

天子德意使下所伐材木杉柟豫章鬱結輪囷長者竟數畝大者蔽兕象其液如凝膏其理如戛石楮楮疆疆由瞿唐而望荆門蕩若垂天之雲被江流而下也明堂工師操繩墨而南望

天子日夜思咏斯干之雅誠下詔切責掄材使者公豈可謂非吾所敢知由淮揚以北數千里秋水豈多有所休息於汙澤令可導爲漕者乎游波有皓盱而離常流者乎隄防有潰寫不厚蓄者乎何以令水力相積負大而不膠使杉柟豫章猶之杭葦者乎四部刺史司空七使者奉職行水以爲非公不可爾公豈能爲先尚書禮

能自爲古
又能運用
古文如出
一口

奉使馬湖時杉柵自行公所能爲者有河可行杉柵而
已是又非公可拱手遷去時也

送中丞陳公撫填河西序

中丞、中、河、西、四、郡、而、立、幕、府、治、張、掖、焉、東、起、武、威、而、西、
出、敦、煌、玉、門、關、數、千、里、北、邊、匈、奴、西、控、諸、番、而、南、制、湟、
中、羌、非、若、它、中、丞、得、一、意、備、胡、者、矣、今、年、春、匈、奴、出、武、
威、度、河、入、寇、隴、西、郡、踰、湟、水、擊、諸、羌、掠、中、冲、豪、二、部、人、
畜、去、尋、復、牧、西、江、上、與、諸、羌、爭、水、草、之、利、欲、候、便、擊、之、
何、可、久、哉、自、漢、表、河、曲、而、列、四、郡、斷、匈、奴、右、臂、令、隔、絕、
與、羌、通、路、今、湟、中、羌、羈、縻、內、屬、顧、又、且、患、苦、胡、而、至、占、

牧西海上出入其國旁不去則諸羌何以賴我而以爲
中丞威重也日哈密諸番數萬又稱兵欲窺敦煌酒泉
間假令國家怒而追哈密已事往正其罪一旦開關
延諸番名王貴人使前受言則有若匈奴在青海上爲
內應又何以待之中丞自在西曹時望見虜都城下
扼腕朝廷無禽敵之士請

上大閱六師不報余旣已壯之也屬且督四道守臣使
分護河西一太僕治外廐之政得以幕府西制殊域卽
令驅其軍吏發四郡騎士爲

天子揚推亡固存之威刺土酋番之二虜哈密者傳首

詣北闕下而勒功。昆山之仄豈爲難哉。今天下厭亂。朝廷方減倭而後朝食。虜又頻年出雲中。上谷公卿議留上郡朔方入衛兵使者。又出上郡朔方開幕宅敢戰之士而市西北駿馬郡國二千石各上補邊狀與計對。中丞卽欲事萬里外。吾恐國家與公卿議大策。非凡所見事必不從。必且以爲無故勤四郡兵。生釁外國。卽詔書問中丞甚苦暴露。獨不計令德柔遠。因循舊貫。與民休息。孰與此也。微中丞誰不樂此者。中丞而得讓。何以自解也。然則陳子公之功沒齒不可復見矣。優游河曲終更亟還而取卿相。不已足以復給事中之跡哉。宅

中丞得一意備匈奴。何如中丞今得以羗備匈奴也。匈奴欲與羗合者。非一世矣。其計常幸羗有中國之急。先赴以堅其約。然今觀望卑禾海上。不卽爲寇者。則猶私心不能忘。恐中丞兵至而諸羗背之也。中丞誠以爲羗小夷。卽小寇盜。時殺人民。其原未可卒禁者。釋而不問。問與匈奴解仇結約者。再以此擁護大豪。使卒歸義。我勿輕治兵。湟中使匈奴得施德於羗。而羗得以負匈奴之助。然後以金符之利制其命。而虛其外廩。豈不並制羗虜之道也。羗十三種。故皆有大豪。保南山湟中。視城郭國久矣。豈其不度而損所恃以生之利於中國。以託

於○自○疑○不○堅○之○匈○奴○棄○妻○子○於○它○種○中○以○與○中○丞○爲○難○
必○不○然○矣○夷○狄○所○以○易○制○者○以○其○種○自○有○豪○數○相○攻○擊○
勢○不○一○耳○若○謂○卑○禾○海○上○安○得○有○匈○奴○今○安○得○從○枕○席○
上○度○虜○也○則○以○責○之○四○郡○不○築○遮○虜○障○者○徒○令○障○候○長○
吏○多○出○卒○若○取○庸○獵○獸○以○皮○毛○爲○施○罽○日○操○量○課○杞○采○
山○理○石○爲○觥○自○罷○其○力○而○爲○實○効○何○益○哉○匈○奴○雖○在○西○
海○上○羗○能○間○得○其○降○者○時○時○以○謀○來○受○事○中○丞○斥○所○欲○
至○伏○所○必○入○使○虜○以○謀○洩○自○失○而○與○國○爲○累○則○羗○爲○之○
障○矣○此○謂○以○羗○備○匈○奴○者○也○

送王元美序

左司馬爲
錫何不屬
也然亦
足以振矣

以余觀於文章

國朝作者無慮十數家稱於世卽北

地李獻吉輩其人也視古修辭寧失諸理今之文章如

晉江毘陵二三君子豈不亦家傳戶誦而持論太過動

傷氣格憚於修辭理勝相掩彼豈以左丘明所載爲皆

侏離之語而司馬遷敘事不近人情乎故同一意一事

而結撰迥殊者才有所至不至也後生學士乃唯衆耳

是寄至不能自發一識浮沈藝苑真偽相含遂令古之

作者謂千載無知己此何異塗之群瞽取道一夫則相

與拍肩隨之纍纍載路稱培塿則皆橋足不下稱汗邪

則皆曳踵不進而雖有步趨終不自施者乎語曰何知

仁義已嚮其利者爲有德。世之儒者苟治牘成一說不憚儕俗比之俚言而布在方策者耳。復以易曉忘其鄙倍。取合流俗相沿竊譽。不自知其非。及見能爲左氏司馬文者。則又猥以不便於時制。徒敝精神。何乃有此不可讀之語。且安所用之。又二三君子家傳戶誦。則一人又何難焉。誠使元美與二三君子者比名量譽。誠不能以一人一旦遽奪其終身之見。而輒勝天下風靡之士文章之道。童習白紛。乃欲一朝使舍所學而從我。日莫途遠。且彼奚肯苦其心志於不可必致者乎。夜蟲傳火。不疑於日。非虛語也。先是濮陽李先芳亟爲元美道余

及元美見余時則裊人廣坐之中而已心知其爲余稍益近之卽曰文章經國大業不朽盛事今之作者論不與李獻吉輩者知其無能爲已且余結髮而屬辭此事今乃得一當生僕願居前先揭旗鼓必得所欲與左氏司馬千載而比肩生豈有意哉蓋五年於此少年多時時言余元美不問也曰世貞奈何乃從諸賢大夫知李生乎自是之後少年乃顧愈益知余齊魯之間其於文學雖天性然秦漢以來素業散失卽關洛諸世家亦皆漸由培植矣諸王者故五百年一名世出猶爲多也吳越渺兵火詩書藏於闌闌卽後生學士無不操染然竿

濫不可區別超乘而上是爲難爾故能爲獻吉輩者乃能不爲獻吉輩者乎

送汝南太守徐子與序

友誼治效
皆不迂濶

漢所謂良二千石者政平訟理庶民忘歎息愁恨之心也卽黃次翁爲潁川宣布詔令令民皆知上意而寬和爲名龔少卿爲渤海悉罷逐捕盜賊吏非使勝之將安之也而已各稱天下治行第一矣乃今良二千石猶難之每坐以爲不可及何哉豈無智能用非其數耳方且從旁謂我二三兄弟文辭相矜不達於政雖摘藻如春華何益於殿最世務粗瑯所居廢亂安在其以經術

潤飾吏事也。超然自以爲一輩。而幸我之敗以甘心。則何用我二三兄弟爲矣。往者元美以璽書按察青州諸軍事。所部亡命采山煮海之徒。長矛距踊之士。翕然解散。使有司無復沈命坐累之憂。子相叅議閩中。身在圍城談笑却虜。因計偕博士弟子員條上禦倭策。宰相至讀不能置。卽有謁閩中諸軍事者。未嘗不曰此策具是矣。明卿三黜在去就之間。所居稱平似潔似辱。我二三兄弟豈爲不効哉。毋論君子自好視人太輕。始責務盡卒抵以罔而務不相能。卽上之臺中省中若建藩陳臬諸執事下之丞尉功曹若縣令長無不相待以爲治。

而相適以有成此霸所以毋失賢者意而遂願得一切
便宜從事也今之良二千石有則不近利害視勢取附
巧爲繫援使游聲譽無米鹽之功而竊高第之賞不則
昏昏無辯吏緣爲姦乏提衡之術而病神明之稱上陵
之不俊下嘗之不報有則迂闊聖化鹵莽勸課欲治之
急還復廢亂危加之愀焉輕省之藐焉過聽偏昵躁不
自持雖有喜功趨事之心而無從善闕疑之度不則牽
於猜忌馭於嫌疑佯示其求諫之迹而惟恐聽之則彼
因以藉資微見其親仁之名而惟恐昵之則彼因以賣
重若存若亡使長者自沮而利其疏似禮似倨使故舊

自遺而坐之怨。不知一人聽而萬夫緘口。智者不敢也。
非所昵而姑受其任。義者不爲也。投綸錯餌。迎而吸之。
不可以得魴。而長者遠矣。因緣其意。而與其私。猶之暴。
不公之心。於國人也。而故舊駭矣。然則有所陳對。安得。
長者之言。而稱之。非無智能。用非其數。而節度淺深。適。
至是而止。因坐以二字爲不可及耳。今由王生所教。戒。
觀之文辭。豈可少乎。次翁爲吏。自喜卽經術。亡益。安用。
從獄中受書矣。子與今爲汝南。何異汀州。時文辭經術。
誠亡當於今之君子。然業已爲之。我二三兄弟。所恃以。
厭人之幸我者。在是。而何可使人更謂子與曰。太守甚。

苦書策稠濁吏事旁午經術文辭一切無恙乎子與既
無是四者用非其數而又有以厭人之幸我豈爲不効
哉余猶識在鉅鹿時子與與元美輒責治鉅鹿狀曰無
以國人慮同舍也子相謂余卽上績書考功乃鉅鹿太
守以殿聞我何以私故人明卿亦謂假令朝廷雜問上
計吏爾條對失 上意在後叩頭謝我以給事中臨飭
左右又何忍見爾於此鉅鹿畿輔也余才出子與下甚
遠卽無是二三兄弟左提右挈子與何患焉余旣上計
子與與元美輩數過勞我何爲也行治獄使者與明卿
信宿我境上何爲也元美繼至一日致獻三日致飲曰

太守何得囹圄如此此子與所知又何爲也凡以退而考察所行不欲有名實不相应耳今豈敢言報子與亦謂子與有意於二三兄弟者如此矣

送袁履善郎中獻獄廣西序

雜論兵刑
皆於難開
口難下手
處極力摹
寫

天子既誅丁大司馬而下王職方獄也百官當秋論報則職方逮詣闕下簿責不服矣按事者爲奏移章司寇吏將覆効之時天下傷悼元元肝腦塗地而痛謀國之臣卽有嚴威赫怒人何得測焉履善蓋嘗仰犀歎曰昔者鄧公言鼂錯於漢景帝謂錯計畫始行卒受大僇內杜忠臣之口外爲諸侯報仇臣爲陛下不取也而帝

復謂吾亦恨之可謂愛君哉夫北虜虔劉我人民大司
馬悖愕自失至不敢出一騎他帥提重兵自鎮來復堅
壁觀望未嘗發鏃矢何可不駢首戮也職方則微二重
臣已足對天下怨心即使又誅一職方是匈奴旣大爲
賊虐偃蹇肆志而去而朝廷復以其遺毒及吾臣子
使相慶得計謂因疆場之政自屠執事之臣受爲匈奴
報怨名。

天子仁聖愛畿內百姓甚於一大司馬而惡匈奴懷詐
內侵甚於二三執事之臣衆何憤憤無鄧公之見也卽
前職方訊章所麗大辟法又非我所輒取何不可以成

案委顧人臣將順

天子德意揚主之明傾身爲之不欲阿邑辟患爾余聞
大司馬訑訑不受人言北虜寇城下時職方數爲請戰
不許也先是職方移檄諸道乘障吏及時伺北虜出沒
奏凡數十章又甚備於法得讞奏矣履善非不親見大
司馬受鉞縣首藁街三司使議獄少緩行笞於庭法吏
固人人危使余至今病悸也職方必無幸矣一朝覆劾
從未減以冒

天子黨惡之怒而爲無益不批鱗者哉履善素少年是
舉也卽宰相以爲其人計魁梧奇偉吐餉出見焉一日

而名重公卿間矣夫廣西不猶漢百粵地哉昔王然于
風諭滇王入朝而勞深靡莫皆同姓相杖未肯聽今思
田疆宗岑氏爲大詳爲內屬而羈縻自解斯同負固矣
戈船下厲將軍出零陵下灘水桂林羣無害也今苗夷
阻兵府江寇竊荔浦等郡矣馳義侯因巴蜀罪人發夜
郎兵下牂牁江黔鬱之間雖蒼梧秦王助逆呂嘉何至
大藤峽蠻剽戾如近時其在海濱西南夷譯者稱貢來
往往禦人于貨使沈沙栖陸之珍紫貝翠羽之玩不得
呈表環麗以雕被宮幄而賓帟火毳馴禽封獸之賦不
幹積於內府有司者治之按劔相眄則依憑深峭中原

兵往援復以下潦上霧毒氣蒸浥輜重阻絕弓浚鋌澁
不可久居故聲教或難之也卽縣道官督大奸猾過嚴
以爲起釁生事往往中罷長其不逞之心檄召酋豪使
出爲戰則枕藉城野又皆中國遷民流移亡命驅之鋒
刃而不甚惜彼雖侏離蠢獷然其視利害禍福明矣我
禦人于貨而譯者赭衣我日尋干戈而敵人受覆師之
罪彼見髡鉗載道非其族類又安能不私相撫掌揶揄
笑中國愚也當使者五歲讞獄期彼豈亦不惴惴恐冤
者得直而吾禦人于貨日尋干戈將論報反逮也乃使
者怠于爰書不折片言否則又以夷狄國重事不款脛

變遂令繫者由我遂不復望生時不恤矣何以大畏荒
裔之志而制其命哉蠻夷猾夏咎繇是聽中猾小章何
以稱淑問哉履善論囚畿中時爲越石父於黎陽盧生
也嘗受其所上獄中書蓋余已異之又爲言廣中事多
類王職方矣。

許母張太孺人序

千古有兩
漢事對得
意之古書
與不得意
之窮交也
有心哉

余弱冠時吾黨士蓋多從殿卿游矣則殿卿乃三顧余
廬中信宿與言天下事握手不置也吾黨士至相謂曰
久不見殿卿何至與李此皆干鱗病處友哉李生狂生也人皆以余
爲狂生蓋殿卿謂余非狂生云余與殿卿讀書負郭窮

巷不能視家生產落落羈身鄉校內佔畢業爲之俊傑
相命以好古多所傳外家之語慕左氏司馬子長文辭
與世枘鑿不相人日月省試有司伎不能稱旣稟室家
嗷嗷視一弟子員如匏瓜矣余復每過殿卿卽縱酒談
笑上嘉版築屠釣之遇下及射釣贖驂之役苟富貴無
相忘也仰屋竊歎重悲昔人盛年功名扼腕之間無不
志在千里計未使吾黨知也太孺人從旁觀之乃亟爲
殿卿言向從兒游者無豪易高也此人亦孤貧泥淖中
意若颺去才乃大常兒急之勿失此人哉彼不知李生
奚爲知若也殿卿亦言陸沈於俗使無鱗鱗之行邁會

崛起澤大流施而人莫知我所爲生不及兒明精淵藏
矯矯逸氣巍如泰山不可動浩如百川不可禦兒不及
生也太孺人中歲寡居日夜嘆一子有建立時儼無愉
色卽從游士數來殿卿又往往輟牘迎之終日不得下
帷誦太孺人始猶對客佯爲呵責殿卿者久之從游士
復不謝絕太孺人則尙鑰持門戶盛氣厲辭鞅鞅去諸
子矣以故殿卿無擇交向令窮困時有所失私昵乃今
何能不憊精神降體貌以事未嘗知己者對坐以目無
可與語彼我扞蔽動及賄食田舍瑣尾鄙倍盈耳黽勉
答問一言不相應卽忸怩作塵狀以恫衷疑我稍厭復

謂無故人。情引衣起走。惡聲載路。是不以憂太孺人乎。
余往過殿卿。則鞅鞅去者。瞰余。又相謂太孺人顧奈何。
內、狂、牛、也。余尚記憶殿卿自肥子來持進。不滿千錢。太
孺人命給余夜讀。值膏數升。遺之余。至今耿耿東壁。餘
光念哀王孫而進食。意無已時。又殿卿於我。無論沫濕
相。响濡卽上書。張中丞府中相推第身。自賤士。乃手援
我。殿卿豈自知後時。乃至今也。太孺人雖年八十。乎然
殿卿已著國士名。太錫母矣。卽有憂生之嗟。懼不先鼎
食爾。太孺人於余。有知興之感。在殿卿顧久下人哉。時
又何可爲也。余猶及復兒孩提時。薛家婦抱子矣。襁褓

相藉太孺人撫育三世而處其慈又皆秀發孺慕悅人
志意斯稱吉祥善事乎

送趙處士還曹序

趙子爲獲鹿者垂三年矣則處士自曹來問爲獲鹿狀
也曰爾爲獲鹿則良哉將下車視事而百姓煦煦自昵
乎寧能悶悶俟去後思也維此多士從游甚驩而亦諤
諤不可致乎欲焉而丞若簿以至它縣之令丞若簿不
一其才而一其衷乎寧能傾奪不肖從事獨聞也欲焉
而秋毫是析察其淵中稱神明乎寧百里翕然示慈敷
惠如我視爾於此也不知中丞臺若御史臺若監司陳

杲若郡大夫共理所欲於爾發摘奸伏聚歛租賦孰與
元元相安美俗相勸也不知豪貴人若中使者若諸長
吏所欲於爾駿奔磬折出乎左右意未及色奉之如機
孰與彊項正辭援禮交際臨以橫逆擱然相競也趙子
對曰惟勤何以與斯數者也西門豹爲鄴發民治十二
渠當其時民煩苦不願也豹曰今父老子弟雖患苦我
然百歲後期令父老子孫思我言卽惟勤下車視事三
年而未嘗忘於此也宓子賤治單父則多所致士然而
無取於陽喬魚矣卽有丞若簿不肖者是惟勤不見憚
衆豈徒丞若簿失德哉人之欲善誰不如我它縣之令

惺令習貢
同

不一其人而一其才不然大疾木敝獨安能身犯之焉
大人視惟勤於此一堂之上毛相屬裏相離也惟勤視
百姓於此百里之內毛不相屬裏不相離也安用秋毫
是析察見淵中爲南走邯鄲北抵句注之塞將千里無
不徧也它縣之令丞若簿無不與言事也百姓疾苦無
不問也山川險易無不如石畫也以聽成獄以鳩大役
以達隱慝以閱軍實無不爲也中丞臺檄如御史臺檄
監司陳臬檄如郡大夫共理檄今日一薦疏下獲鹿明
日一薦疏下獲鹿元元信我如列眉矣異日者監司某
君不安惟勤在側也則曰吾將寢處此悍令哉惟勤曰

一事上
有樂聞

得其傍皇
若追之意

中山之狐貉羆豹其可盡乎其又以令爲藉也久之以
餉戊戌則給以廬旅旅則芘三軍之士意皆當惟勤一
某君意終不能不當惟勤也惟勤爲獲鹿如此而已矣
處士曰惟勤爲獲鹿如此卽吾何憾焉無辭乎曹之父
老也輒趣駕去

爲按察李公恩榮永慕序

公生十一年而太孺人卒踰二年而贈中書君卒卒後
若干年而公舉進士授中書舍人改監察御史擢今官
矣猶日俛焉如贈君太孺人者之有所欲之而未能卽
命也贈君太孺人者已矣何以猶若有所欲而未能卽

于鱗猶用
翦文語

命也。人情十三故。父母則猶若始。免于懷而視成人爲
已近。精神鼓舞不可適。以變著於愛斯愛。著于悲斯悲
矣。襁褓而狎膝下曰父母。是常一。一旦自顧。直如顧其父
母。宰如顧其棖棟。几筵晏如也。顧之終鮮。兄弟無以圖
先德而語世。美顧之今不可爲。而前不可知也。其事異
矣。喘息之所不至而瞻依至焉。瞻依之所不至而感通
至焉。以喘息則響絕。以瞻依則形絕。以感通則勢絕。其
類異矣。非復襁褓而狎膝下曰父母。是常著。此精氣鼓
舞而適變之始。公所由一著於悲。而情不能以時遷者
也。是故終日言不移已之憂。以憂父母。終日行不移已

之患以患父母則顧而言則顧而行矣公往按山東河
南時僂然如父母見乎其位者思得賢也朝而必有薦
疏。僂然如聞父母之聲者思得寃也。朝而必有白狀。所
罷監司太守某以下若干人所奏逮論殺某若干人無
不踟躕躑躑。若卽命於父母者。顧之諦於生也。顧之諦
於生。致顧之斯生矣。是無是形而託儼然於堂上者。是
不需菽水而朝夕承歡者也。夫精氣善應一著於悲斯
悲是永慕之義矣。人情幼不及見父母不可柰何廢而
任之於父母此無他僂失之也。襁褓而狎膝下生十三
年曰父母是常安所不得安所不失哉。霜露旣降悽愴

履之非其寒之謂也身被國恩而與有榮施乃自顧猶
直如顧其父母猶宰如顧其懷棟儿筵猶晏如也由是
乃有重被國恩而若無與於榮施者是曾參所不願於
椎牛季路有枯魚之歎也公再秉憲異臺同風余遠而
望之湫然清靜知其爲七尺之孤竊而私之言行無僱
于憂患知其著于悲而顧之致生也其在于公則言行
成而容不知而錄之所由以名永慕者乎是爲序

贈王元美按青州序

元美所爲守尚書郎九歲當遷者再輒報罷則貴人側
目矣。予何稱治獄使者北察燕趙諸郡居十月而竣事

太古

且入致命于天子乃遷按察副使奉璽書治青州部
兵事焉攀龍曰青州四塞國也今其民豈猶無不吹竽
鼓瑟鬪雞走犬六博蹋鞠者乎臨淄之途豈猶無不車
轂擊人肩摩連衽成幃舉袂成幕者乎有之然利不在
上也管夷吾用齊而罷士無伍與其爲善于鄉也不如
爲善於家匹夫有不善可得而誅也斯禦戎翟衛中夏
成九合一匡之功而諸侯皆得以鞭箠使矣今其民見
以爲無不吹竽鼓瑟鬪雞走犬六博蹋鞠相樂也然暴
子弟無賴少年耳不采金於山卽煮鹽於海矣輕扞厲
禁恣睢辟倪往往內交亡命傾身爲急仇家不解白刃

以于鱗神
骨洗盡胸
中古文自
應無敵元
笑汪司馬
皆坐此李
北地差自
鎔鑄覺一
萬頭耳

以視與其逮於法也。不如聽于豪是大亂之形。日具而
有司者所不知。卽爲有司者所知。微欲持其陰事。吾恐
其發在左右之後也。由是中猾以下。猶姑逋逃。佯以示
遜殺。有司之怒。而其大者不挾衆負固。卽自詣臺對。有
司者不問矣。有司者問之。柰何卒能以其黨令自攻。今
年一長吏明年一長吏。又柰何卒能令有司者不問也。
三尋之矛。唯敵是求。振臂一呼。超距十丈。引而更卻。如
曳風雨。其搏祕如組。亦如掉螭。其盤鋒如輪。亦如積環。
手牆而進。矢疾不得加。劒銛不得接。不埃尺符。捷于烽
火。三尋之矛。若鄧林矣。然則今日臨淄之塗。車轂擊人。

肩摩連袂成幃舉袂成幕者豪爲政也縣官豈有賴焉
王于興師則占藉自偷不著同袍之義有司者一一治
賦卽又狡憤而起坐索輜車裹糧于橐人歲不饜百緡
高秋徵戍攫市以行漁陽之墊何多誅韋之跼注君子
也三尋之矛十五相構傳以章幟寢處其間釋冰而游
爰喪其馬不如獾狖受豚天子之鐘鼓實式靈之汝何
多之有柞浦之役有君子六千人島夷僞遁委以禦貨
覆者三千人矣有司者初亦唯以汝爲功又不佞以勤
縣官而怯于公戰卽有豪實應且憎以慚我有司我有
司豈願有間也語曰虧之若月靡之若熱元美若能使

臨淄之民無不吹竽鼓瑟鬪雞走犬六博蹋鞠相樂也
而又無采金于山煮鹽于海是匹夫不善可得而誅也
何辭之與有若是采金于山煮鹽于海也尚將使其爲
善乎鄉也無以異爲善乎家以爲罷士伍而輕扞厲禁
恣睢辟倪豪大者其未可遽問也元美其從堂視室左
右將自復若曰爲勞幾何而歲且饑食縣官而必置之
則是使暴子弟無賴少年登瑯琊之丘北嚮而歎也其
若徵戍以勤天子何可以春秋高枕自愉快也夾谷之
會曾行相事者誰哉元美其才一日可鞭箠使青州矣
何可使寇命也不然元美且喜自用焉其安能知之其

所以知者元美有績以間執諸貴人繫不食夫我者爾
選唐詩序

唐無五言古詩而有其古詩陳子昂以其古詩爲古詩
弗取也七言古詩惟杜子美不失初唐氣格而縱橫有
之太白縱橫往往彊弩之末間雜長語英雄欺人耳至
如五七言絕句實唐至百年一人蓋以不用意得之卽
太白亦不自知其所至而工者顧失焉五言律排律諸
家槩多佳句七言律體諸家所難王維李頗頗臻其妙
卽子美篇什雖衆憤焉自放矣作者自苦亦惟天實生
才不盡後之君子乃茲集以盡唐詩而唐詩盡於此

計日器兵
他日省財
人將軍皆
深知之

事

與戚元戎

李攀龍

有味乎公之言。兵雖稍增。而計日可罷者。過之。財雖暫
益。而他日所省者。倍焉。其猷一何壯哉。至謂將官廢習
技。而教流黃。鍛造之巧。以爲奇貨。中動貴人。遠事漠北。
又何痛時弊如此其切也。然則天下注意我公。而
聖天子倚重之者。當奈何無已。則所謂寧置其身于鑠
金銷骨之鄉。不在其道。以求悅。以求事立云爾。斯大忠
之定誼矣。我公旣在久之。將習服。則自求練。卒卒習善。
則自求利器。况志存報主者。多其人之爲可恃也。防

秋別議已有 成命是又我公之揚韜敷畧之時也邊
陲甚幸里閭寵光在此舉矣

五月六日灌甫中尉誕辰啟

茲審赤德覃宗朱明戒仲臺流玉吹清聞子晉之笙壺
寫金漿美薦鄒陽之酒大河演裔永言接于天潢維嶽
降神久視偕諸少室期一日而長彌高靖郭之門境千
里而遙懸映小山之賦某游孝王東苑自惟枚叟斯朋
仰公子信陵深愧侯生虛左謹篚二瑱擬續五絲幸值
浴蘭之晨尚存氣味益熾然藜之火不棄芻蕘

與宗子相書 其二

元美來亟謂子相出遇都門之外信宿而去蕭然各有
江湖之氣也壯哉邢州太守奉職無似囹圄空虛一日
治牘十日爲布衣之飲齋閣海內旁若無人郡城之樓
不下百尺西望太行東望漳水北眺神京一瞬千里歸
復雷雨乃歌黃榆諸篇以敵其勢則響振大陸秋色漂
颯頽乎就醉遂極千載品物五子於中原右宗左徐哀
吳郎之去國悼梁生之不祿是時也曾誓牧皮爲未狂
他豈暇論哉月晦興盡驪駒在道握手洛水之上黯淡
不語某雖僻情旋亦自失也

與許殿卿

當時可與
談此者殿
卿勞交耳
大勞交可
少哉

某抵東居且二月日夜望殿卿來甚急而意不能待愈
成契闊殿卿殿卿萬里生還不當日鼓飲樂邪洪使君
力疾視事又安在哉人苦不知足初某守鉅鹿時又焉
知有三秦之役也徒謂以它遷行爲不苟去爾栖栖入
關乃日夜與二三孺子妾緝蘆而處等於幕燕一行校
閱帖括成山精神旣疲披詠漸廢何爲者乎安得與殿
卿縮林嚼苦驩然道故握手景陽之濱以弄白雲元美
天下才也然願一當某久矣况其爲我職志

與徐子與

其十一

文章大業是以君子欲及時也顧文章自有其時有欲

云交相雜
爲物

矣之不時
只爲一色

焉而不及之者。子與所謂文章老自知是也。佳集不敢
久留。則足下時至矣。期月作苦以遺二三知己。千載一
快許。殿卿海右集屬灌甫中尉爲序。不佞嘗欲畀諸炎
火。乃周公瑕亦曰。是旣已不能禁其傳。然不可以欺習
者。亦唯任之。今以子與視殿卿。爲矣。灌甫乎。嗚呼。不獨
其驥卽蠅。亦難子與奚樂。百世之下。謂不佞執鞭子與
邪。竟貽左史詩云云矣。

與王元美 其一

某不幸中於流言。足下愛我。乃能縷縷爲語。如汚已者
是。猶不以某爲非人。足下曩固慮及於此。僕雖倔彊。亦

不厭薄吏
治所以爲
文人

已郡國一吏矣方且局促轅下也元美自信僕豈能以
伯樂望衆人卽問及僕他事某一不敢知某情民苟升
斗粟餬口卽飲河之願不欲爲盧至長者僕亦名爲守
哉跡僕所御一朱轡而把關者爾猶尚不免於流言胡
爲爾日藹然磬折路傍早晚解綬去已定矣一州如斗
大日出而視事卽不崇朝閉閣臥也燕趙南北殆千里
人相食盜賊嘯聚白日出禦人卽邢襄之間有犛犬我
輩何謂無益時理亂何謂於吏治厭薄也足下不示僕
誰復言者今僕亦獨爲足下言耳

諸君皆有
海氣故又
曰烟烟之
外傲骨一
具耳

日爲候足下者小祇園清齋辟瘧坐談名理孰與相視
海岱之間雄飲盡石旁若無人也遂不知別時作何狀
既抵西郭茵馮之上恍惚拍浮之態元美在前褰帷四
顧月出之光耿耿流思耳千古一快唯足下念焉今遣
僕泗追謝足下不遠數百里命駕者是役也不佞敢忘
所以圖報乎奏記諸臺幸假一掾屬與僕泗共之特足
下爲代益依依於此


答元美

初奉汶上書計將一介屬有召命嫌不敢發而能按察
所寓亦至奈何足下守闕乃于今不佞猶日謂旋復晤

書句偶強

語者旦夕耳孰知其經已元美忍心哉繫維弗及海岱
黥然六羸之故邪惟是足下通章悲壯當路扼腕固當
聳動天下得請襄事歸奏几筵英魂指髮矣以視阿裒
抱經投泣終無以傾身大義數爲士乎天下寃之不可
爲也白之日而爲之聳動天下足下何負焉不朽之大
者哉而猥藉不佞爲足下兄弟聯翩薦䟽嚶鳴 聖朝
卽二三子與代木之響阿游自輕贛君小生乃欲相吏
邪薛廣德保懸車之榮則庶幾近之曩便報子與元美
理 帝狀屬當踴躍此命明卿乃患卒業無次耳齟齬
家何傷敬美乃負包宗含吳之志稱天下事未可量耽

耽欲作江南一小英雄尋將火攻伯仁奈何不善備之
也足下念豚犬不置邪不佞薄祚輒有莊缶之感七月
二十四日也意亦已惡幸先是又舉一小干鱗矜提目
前續稿容錄上子遺一介方匍匐亡妻之喪不能出道
左薄追六羸當抵彭城奈何枉駕掣肘僕所具悉通章
太師爲文乎所聞人言固不然矣濮陽乃自列當路饑
涎盈紙正須我輩後凋少持王氣交道効意自田間臨
內忽再浹旬稍接貴客野情思曠之甚竣葬入鹿門可
復削跡不佞非禮法士撫孤姁姁自致耳暮功時不廢
促軫媿缺云何



玉衡星大陽星其地地本對於日月星辰其地地
而縣縣不地上下貴今本縣縣其地地不地地
二十何有也地本也縣縣其地地一也其地地
也其地地地不地地地地地地地地地地地地地
地地地地地地地地地地地地地地地地地地地

夢在何句
大解

解
李淑人大節解
李攀龍

中丞霍公大母李年二十餘撫遺孤焉既贈太淑人掩
于帝恩其大節無以自達于上乃中丞狀之曰勤瘁憂
苦精白貞純是先大母之德也余惟八者備矣屹屹乎
大節者哉方其夫永絕弱子在抱亟低徊於一往而藐
諸之謂何跂予望之中廢不可知若將置焉而施復是
顧業以黽勉孰與効以大畢之爲成仁也量力計期此
伏彼起蓋有日月可處而我未之卽安者匍匐拮据不
與焉勤矣惟茲予遺孥孥在疚疾疾用勤惻怛爲勞卽

庶幾將來瘖痛甚矣而逝者不返終身病之奚必殘形
相拒毀體示絕始爲慘哉瘖矣壅闕閼血鼠憂不陽如
在晦冥視聽玄黠雖猶託于世未亡人耳百爾紛紜藏
之地下獨其所爲喘息相屬者細若氣微若聲不可以
已。是重蓄也憂矣可以已則舍生以之不可以已斯生
而有所不得舍也難乎其爲心矣預防以自困致慮以
自危旣秀方實植微壯長有不在我者而志每窮焉以
微惠逝者拂亂煩冤甘此荼毒苦矣立孤難于殉塋善
後優于軀命二倫是經大義以辨非託於難以竊便非
假於優以苟存夫婦母子無遺憾焉精矣蓋亦其質回

有之既自不飭亦自不渝不然捐軀殉葬本以爲潔而益視其華猶可物采非素以爲行也光昭有家民於無迹猶曰倫足以竊便義足以苟存云爾恬淡是常不以作色白矣據其所不得於舍生之心與其每窮焉之志如天地定分之不可易如山河定位之不可移殉葬自章捐軀自正溝瀆之諒匹夫一朝舉之矣又不然非其此之勤瘁不將以捐之幽苦不將以撓之乎貞矣激于始絕而哀于已事與操具而身亡均之失其半也此夫各成其信非以爲名而意自慊不解於慈非以爲功而理自全故至于今無間然矣豈其習而便豈其守而存

率之自是自致厥美不遺純矣屹屹乎大節也哉喘息
相屬命脈以文神明之胄後世少復余猶及見中丞爲
御史時主課天下郡國上計吏風裁卓然廷尉中丞少
司馬司冠偏歷三臺大蹟益著於太淑人有餘烈矣勤
瘁幽苦精白貞純具大臣之道焉有味乎其言之也

具天下駿
發史爲一
歛是吹管
之候也

引

御史朱公遺愛引


李攀龍

稱遺愛何爲也爲都御史朱公也其稱居東何也昔者
周公居東東人私焉不系之周也公旣入爲大司空山
東之人猶私焉不系之司空得稱居東也始公之居山
東則濟南之縉紳先生若郡邑弟子莫不曰吾未見按
察如公者今安得久居此也旣而莫不曰吾未見布政
如公者今安得久居此也旣而莫不曰吾未見都御史
如公者今安得久居此也凡五年是稱遺愛也周公之
詩有之是以有袞衣兮無以我公歸兮無使我心悲兮

周、公、東、人、之、遺、愛、也、又、曰、伐、柯、伐、柯、其、則、不、遠、我、遘、之、
子、遘、豆、有、踐、周、公、遺、愛、東、人、者、也、何、言、乎、遺、愛、東、人、也、
又、曰、汝、陳、時、臬、勿、庸、以、次、又、曰、以、藩、王、室、綏、乃、厥、位、是、
周、公、所、命、也、而、必、以、丕、惟、考、成、而、必、以、率、由、典、常、何、也、
所、以、遺、愛、東、人、者、也、之、子、不、遘、遘、豆、斯、遠、非、周、公、之、材、
之、美、已、柰、何、佑、乃、辟、廵、侯、甸、撫、萬、邦、永、康、無、斁、也、無、斁、
爲、言、遺、愛、也、公、爲、按、察、務、棐、彝、而、不、必、于、用、訖、公、爲、布、
政、務、正、供、而、不、必、于、用、惠、猶、日、存、諸、縉、紳、先、生、而、進、郡、
邑、弟、子、與、論、焉、曰、得、無、失、迪、知、之、士、然、後、舉、郡、邑、而、顯、
治、之、靡、保、匪、蕃、靡、釐、匪、臬、猶、曰、今、爲、得、若、在、昔、無、斁、乎、

是都御史朱公也。濟南諸先生弟子故斷斷自信自勸。以急公家之誼而後朝食也。雖無考尚有典常是爲習公。公以習諸先生弟子者亦具是矣。何患乎不得久居此也。不然於縉紳先生望而拒之視郡邑弟子不可使不遜斯。未能有先以爲百姓望者。雖今貌祀亦于是有未致也。豈獨以袞衣哉。古之大臣官無間地澤無間時施無間人。其爲遺愛備矣。濟南縉紳先生若郡邑弟子得朝夕公而事焉。跡詩書以周公跡公以詩書得稱居東也。然不系之司空而系之都御史者。以嘗不以未以。遽不以歸以習不以異勿諱乎其私之也。不然咏歌之。

無從公奚取焉



傳

錢唐節婦凌太安人傳贊

李攀龍

潔而有體
又不堆塞
古文

以余觀於凌太安人何世之論節者之固哉可相勸而
成也可相勸而成亦可相靡而敗烏在其爲天性哉方
太安人撫遺孤纔五月一老姑相依至戚也姑而姑諷
更嫁之諷更嫁之矣乃歲凶復不能具饘粥共養如姑
意罵詈日滿室曰婦何家不可居而自苦若是如就嫁
之者不嫁也日所恃族長者而族長者諷更嫁之作使
豪奴益肆侵侮惟產之睥睨而藐諸是圖危矣不以扶
助德美爲華寵也曰婦何家不可居而自苦若是如就

嫁之者不嫁也。孰不愛女。太安人尚亦有父在。而父諷更嫁之。至令踰年廢歸。寧禮以自絕。而猶未置焉。往曰。女何藏之深也。則操挺劫之。至令頭搶地。觸几案。血流被衰絰。而猶未置焉。至令斷髮毀形。以相示。有父而悖如此者乎。曰。女何家不可居。而自苦若是。如就嫁之者。不嫁也。人情爲其子以婦。爲其子之孤以婦。自爲以婦。而姑不然矣。人情族有孤。收之以其母。有婦庇之以其身。而族長者不然矣。人情欲其女有令名。亦欲已有令名於其女。而父不然矣。是三者所遇皆非人情。太安人。可以影響自解。何家不可居。何家之無姑。何家不可。

居何家之無子舉產而授族長者屬姑焉委之以不可
知之子而且令父自絕於所適何負夫也難者曰姑且
老可矣藐諸之謂何則季子業以孤寄之矣曰是猶相
勸而成也三者所遇皆非人情而太安人卒能事姑以
立今

聖天子下明詔厥高行見褒朱轡而守建昌者孤邪是
靡之而勿敗則非可相勸而成明矣今謂太安人自存
以存其子太安人設無子將爲一訖計乎勸之勢緩靡
之勢急緩急非所論此余所以謂天性矣故語節而待
子無以處夫無子者也

以士大夫
而侵有司
之法以耻
天矣

王中丞廷小傳

中丞初以大司徒主事分曹太倉與宦者奉稭米相持也。既聲聞，朝廷改監察御史而領度支宦者奉尋罷。亡何疏尚書鉉治人冢宰不奉職狀忤旨，謫亳州稍徙崑山。令崑山故相某視縣令家監爾，即所欲令爲之。不欲爲之，雖屬之公弗與爲之。故給事中某者，公不與爲之矣。雖欲屬焉，不能也。及兩人皆聞知各自失也。相巨室大臣給事中雖廢然揣上意從私家祠有所祈，不領於天子之祝官。歲時聞上覬復收我者爲之，乃相與持一令短長，何不至也。而公卽又來守吳郡，則吳

人欲之矣。郡別駕某所治逋租者獄纔一牘。爾坐在戌籍當遣者六十人。捕未得者又三百人。公趨謂御史君曰。異哉。如以檄大司馬府中。豈無令主伍吏望見籍而走乎。戌者一人。主送至戌所者二人。捕未得者妻子一人。捕者一人。是千人之獄也。御史君勃然寢之矣。徐某者。旣以其貲爲太學生。而復持其兄某陰事署而揭之。途御史君。又以其署按其兄。使在遣中。公廉知其爲署某陰事者某也。曰。兄不義而穢于家弟。不諱而播諸國。其兄已髡鉗對主伍吏某。安得儼然。因以爲利大冠。若箕日沾沾父老前也。乃奪其太學生郡歲以籍錢九千。

緡市尚方物輸少府而司寇某者其子欲之公不與也
往來毘陵郡錢六千緡與之已而給事中舉奏司寇免
之並奪毘陵郡與者官吳郡尚方物至今有司者市之
遂爲令自公始也可謂不畏彊禦哉

墓誌銘

明汪次公暨吳孺人合葬墓誌銘 李攀龍

次公生十四而無寵於父也。有奴睚眦父怒而不言。公輒奮白梃詬曰：「奴無禮於家，大人罪當誅。」奴蒲伏受杖，乃白罷之。而里中壯之矣。比居庭，惡聲不及犬馬。父疾爲侍，卧起浹旬，輒瘳。父乃大驩驩之日，乃自燕代請鹽筴客東海諸郡中。而昆弟子姓十餘輩亦因受賈從公。公旣饒弟姓亦各數倍。然後報成於父也。時東海諸郡部使者視鹽筴，必召公畫便宜有司，乃籍公爲鹽筴祭酒。而浙東西皆知汪次公中貴人景之守浙也，欲賄于

賈而誣之法賈皆亡至括則獨疏次公名謂吏此節俠
得之勿問其餘吏顧得守信公曰柰何以我殺季乃自
詣吏景目而誰之公曰歛賈豎汪玄儀也旦夕且千金
爲壽不忍湏臾貴人耳景曰吾聞守義不聞玄儀公曰
字也此中善視賈豎故不名公出則實無千金念給之
重其禍卽持券貸郡帑千金太守梁公許諾會劉瑾敗
而景收公得完諸賈勞公公謝曰千支家言我生之辰
適有天赦果然蓋戊子六月六日也公年六十歸自東
海老焉曰安能白首刀錐爲二子虜也吾所爲修業而
息之在此兒矣蓋中丞公已生者三年及舉進士除黃

嚴令乃大喜曰孺子試爲吏矣服駒以轅齒壯則良發軔雁行吾懼其泛駕已嘉靖戊申八月二日卒年八十一歲云吳孺人者歛之長林人以大父吳公予公而歸公而吳公故客歐括間孺人則勸公受賈吳公也公行孺人爲治室中則室之南宗人疏屬之產十餘家家質於孺人孺人無弗應而又不責其子錢居數年諸宗人皆德之會有故轉徙則十餘家家屬孺人矣公由是不問室中至家大政積著之理顧未嘗不取裁孺人而徃徃片言定也初孺人與媵黃氏俱未有子有爲使物之術者謂公父曰何公之先府君有客乎吳公也其謂府君

曰我之帝所乞丈夫子畀吾孫旣得請渡河而爲執輿
眇夫吳某所覆丈夫子仆輿下左乳中石傷吾因以石
識之異日洗兒懸疣乃去又謂府君謝矣曰吾亦得請
於汪氏之宗祐矣又爲客答曰雖然必以吾所請者畀
吾孫使先一月舉之公所請者畀勝黃氏也弘治甲子
正月封君良彬生左乳懸疣悉與語合踰月黃氏乃生
良植初吳公予次公孺人而諸母譏焉謂孺人曰田家
兒乃大而門又安用持歲玼鑰如諸母爲也蓋吳公見
次公冠田家冠無苛禮謂大而門矣言鑰者示諸父之
有深藏託扁鐻諸母佩組自愛雍容而已而次公將不

良于賈也。後吳氏中廢孺人徧存諸母而置其事云。生
七十有八年而卒。爲嘉靖甲辰五月五日也。中丞公名
道。昆督部。閩粵有平倭功。仲國道貫邑。諸生封君卜下
佛堂兆吉。以某歲月。葬公而孺人祔。中丞公請余志
焉。余曰。新安俗矜賢卽同列。才力相若。乃所至爲鹽筴
祭酒。畫便宜。至今中貴人疏名求之。稱汪玄儀。自詣吏
玩孰甚焉。太守救之。不恡千金。有所試其長。非苟而已
也。大哉修業而息之。賢人深謀於廊廟。論議朝廷。其在
中丞乎。是何能白首刀錐爲二子虜也。孺人不責子錢
以規室南之產。廉賈五之俗之相靡。雖女子亦奇勝邪。

至其與家大政決筴片言亦其天性然也懸疣之祥其
應二世來之以德矣是爲銘銘曰
莫燬於勢而身是嘗之莫美於利而身是颺之見取于
予業乃成謀得於失政乃行維道則偕其人孔懷言作
之述以伉茲丘

雜文

擬秦昭王遣齊湣王書謀伐宋

李攀龍

古書象字
作寫字妙

秦昭王使人於齊湣王曰宋王無道爲木人以象寡人射其面寡人地絕兵遠不能攻也王苟能破宋有之寡人如自得之蓋寡人使使者問宋所爲曰有之宋可伐矣見祥不爲祥乃爲禍先是有雀生驥於城之甕甕使史占之曰小而生巨必霸天下則偃喜滅滕伐薛東敗王取五城南敗楚取淮北之地三百里西敗魏軍乃愈自信欲霸之速成築轍臺于宮中鳴夷血縣之自著甲胄從下射之血墜流地命曰射天其佞臣田不禪賀之

此語非賀
也乎也

曰王之賢過湯武矣。湯武勝人。今王勝天。賢不可加矣。
偃大說。旣作千鍾之縣。遂鑄諸侯之象。使侍屏。偃屬寡
人象。且成曹商自敝邑來言。寡人方召醫破癰潰瘻也。
偃乃更命工。加寡人癰瘻於面。旣成。謂之曰。旣微且癰。
爾居徒幾何。吾爲其象人而用之也。指大王之象以示
其臣。唐鞅曰。此冠側注者。負海過颺。豕視其象。不仁也。
不知彼何所食。乃益三副。如此。於是展魏哀王之臂。
以彈其鼻。曰。爾赫之子哉。望之不似人君也。哀王之臂。
急而汰于韓。襄王之肘。曰。倉也。何乃爲人所搏。不愛顰。
笑乎。乃移使去韓。王咫尺曰。此豈若等用肘足之時。復展。

其臂彈之曰今視子之鼻間栩栩然矣何得更挈狗馬
西走王豈猶以秦爲王交乃今且不得躍吾治中展韓
王左臂曰汝欲有天下右手攫之則廢此左手又展右
臂曰左手攫之則廢此右手君將攫之乎所爲趙武靈
王之象黑龍面而鳥鬣鬢麋髭頰大膺大胸冠術氏冠
差池迤邐五采四重具帶翊翊黃金師比綬不著綬綴
以絲襪命曰伉王惟肖揜鼻而過楚懷王曰此柱後惠
文冠者始亦爲從長至函谷關然無奈其以淮地之地
三百里効我也寡人亦似惡聞王之臭也昔者岐陽之
遇爾爲荆蠻置茅蕝設望表與鮮牟守燎故不與盟今

其坐之堂下次至燕昭王曰是危欲爲朱均者偃聞相
人於師敦面而土色者恐醜爾其忘齊之虜爾父乎其
玩寡人大王與五諸侯無異鼙鼓一日倪侯請曰魯衛
中山雖則鞭箠可使然亦泗上諸侯也卽折鉤之啄足
以爲之何可不使備下執事乃復爲魯平公工不得其
象以請倪侯曰亦果解其冠令王可溺耳爲衛嗣君命
曰小侯何爲遽條至今不殄也日者趙氏襲衛爾跣行
求救於魏今其勿令加焉至中山君曰此其准頰權衡
犀角偃月不若其姬陰簡美也又爲西周武公東周惠
公而金不足宋人夜拍東冢出文公之鼎彝椎而輪偃

偃不知也。亡何惠盎見偃，曰：「有道於此，使人雖勇刺之，不入。雖有力擊之，不中。」偃乃釋章甫而冠，無顏之冠，以示勇。盡置寡人大王十二諸侯之象於庭，懸鵠夷血於其上而射之。血下漸，大王象盡，殷則笑曰：「吾聞博昌千乘之間，雨血沾衣，豈天有意乎？王之爲人也。」大王象僵於臺下。偃曰：「粹之曰尚，佯僵邪？」昔蘇代言齊王長主也，有二毛矣。先王不禽二毛，豈謂爾哉？血亦漸，主父偃以巉其口，曰：「視爾相法當餓死。」今姑血食哉？此孰與雀鷃美？關弓以向楚懷王，指其股曰：「吾將射此以報于泓之役。」不能如呂錡集矢爾目也。遂召倪侯命羣臣以矢曰：「此

十二諸侯者各令面夷矣。群臣乃各射。偃之所鄉三發。寡人不中。王自往面樹之。寡人象仆於臺下。則轉巨石以撞其足。曰：「西垂大夫吾當復絕爾臙矣。」趣使出木人射其面。飲羽木人者。卽前所爲寡人也。已而唐鞅進謂偃曰：「昭襄無道。命齊搆我。皆其臣。樗里疾之謀。臣已命工爲樗里疾血。鴟夷加於其頸。以象其癭。鞅請以一矢踣之。無敢辱命。」偃大喜。至則自射之中其頸。鴟夷血出。如雷。大宰戴驩。國老薛居州諫臣也。以諫偃曰：「王欲行王政。卽身屬橐鞬。遇茲十二諸侯者。於中原之上。而主盟之可矣。安用終日與桃梗。偏人鬪而曰我必勝之乎？」

偃大怒罵之曰子罕之後有睥其目瞞其腹者如爾於此哉一薛居州其如宋王何關弓嚮之二子趣走唐鞅既自及偃淫於酒婦人愈甚室中有呼萬歲者堂上盡應堂上已應堂下盡應門外庭中聞之莫敢不應一日登蒙澤之臺見朝涉者鏤其脰矣而偃者至使人止偃者曰是其脰肩肩何爲者哉置之轅臺之下使以鼻承血失之怒而剖其背矣宋人大駭而墨子所設守宋之備盡廢王速出令是于泓之事也齊王於是率魏與楚往伐之進兵宋城下民散城不守偃自投車上馳而走至溫逃倪侯之館而死三國盡分其地矣

問華渭諸生策

竊問潼關於殺函其猶重捷也在昔彊秦建瓴山東注如決雷每一出兵割地効賂有若俯拾山東諸侯合從而來止於一夫成列而進道惡爲解則俛仰之勢異也今天下爲家

聖天子封域殺函不異宇下山以東何患焉獨以北虜憑陵數入寇上谷北地間而先零諸羌往往窺西河玉門塞一旦交困秦人之卒空國出乘障矣卽有若往時大盜嘯聚商洛者竊發其中鼓采金鬻鹽亡命之徒以爲有司者難扼潼關而據黃河之津則山東之援不至

守武關以分掠漢中諸邑則鄖陽之師不入西北出藍田以犯長安而稱屯灞上雖欲不棄華渭不得也此非王公自失其險而制於人之道乎二三子華渭之間人也其明發念亂久矣何以告我

王氏存笥稿跋

余觀大宗伯孫公所稱祭酒文章法司馬子長氏其然哉今之不能子長文章者曰法自己立矣安在引于繩墨卽所用心非不濯濯唯新是圖不知其言終日卒未嘗一語不出於古人而誠無他自異也徒以子長所逡巡不爲者彼方且得意爲之若是其自異爾柰何欲自

掩於博物君子也。關中故多文章家，卽祭酒在著作之庭，且三十年爲文章，其用心寧屬辭比事，未成而不敢不引于繩墨也。且三十年爲文章，其用心寧屬辭比事，未成而不敢不引於繩墨。原夫法有所必至，天且弗違者乎？巧者有餘拙者不足，假令祭酒爲文章，其微辭美事一不得其所置，豈楊雄、劉向所稱實錄者也？大宗伯又言祭酒與北地李獻吉氏接跡而起，以爲祭酒重則是稿也。海內學士大夫受而讀之者，將益重子長之爲文章，而引于繩墨。宗伯有力矣！乃御史鄭公按陝，以西諸郡稱采風使者，還日奏之，則又謂攀龍在左輔有祭

酒于文章往往紙列國家大典而抵掌談四方疾苦九
邊要害奉胡言胡奉倭言倭卽欲聞時政不亦輜軒所
載者哉乃若其詩則大宗伯所稱李獻吉得其具體矣
吾重傷作者之志因并錄焉攀龍得以具論二公所取
祭酒者如此也

西晉書

疏

崇真儒疏

袁洪愈

列之薛文

清胡敬齋

何忝

袁安節品

甚高得此

疏益著

孔子謂子夏曰女爲君子儒無爲小人儒所謂君子儒者乃真也何也求諸已而不求諸人也尚行而不尚言務實而不務虛也若求諸人而不求諸已而言過于行名勝其實則爲小人儒矣小人則僞而已矣崇儒而不得其真是教天下以僞而已矣臣見長洲縣歲貢生員王敬臣自少閑詩禮之訓稍長習聖賢之學讀書必體之身心躬行必先乎孝弟親嚙飯以養其祖母罄妻裝以嫁其女弟族人貧乏者分空室以居之計饗殮以給

之。不自知其家之不足也。門人受業者。教之以思誠之學。教之以孝弟之道。惟恐人之不爲善也。事親之禮。巨細曲盡。而無替於始終。檢身之功。夙夜匪懈。而尤嚴於慎獨。淹貫五經。而講究不倦。悉有衆善。而容貌若愚。和易而不流。直諒而不亢。紹伊洛之正派。實聖世之真儒。如敬臣者。寧使之終困於流庶。同腐於草木而已哉。乞勅下行。查。如果臣言不謬。或特行召見之禮。或專授翰林之職。必能敷陳道義。贊襄謀猷。所益于聖治。豈淺淺哉。此臣特以所灼見者言之耳。天下之爲真儒者。或不止此舉一人。而諸臣皆知所舉矣。

明文奇賞卷之三

史官陳仁錫明卿甫選評

序

古苑序

劉

鳳隆慶

待力在周
參公眞實
不語語如
以爲卷後
公非復郎
聊作日矣

昔晉文公學讀書於臼季曰多聞以待能者王歟負書而游季子發篋書習簡練彼所習何書耶未有聞於今者左史倚相能讀丘索是徒聞其名而已豈世悠遠磨滅耶將爲秦燔之若惠子之書五車管敬仲之所削方墨筆其有一言見於今乎彼齊女子且稱西方之書甚辨以慧吾每志在內外史遇周秦間之跡未嘗不三覆

嘆後來雖益多。非吾好也。夫圖緯秘記讖數其非出於聖人乎。誕罔時有之。然胡可盡廢也。若星氣曆度河洛軌象孔壁魏寢時有出於世者。蓋以恍惚疑之。獨後儒之信可乎。余涉道淺。未能刪裁刊黜。若文辭之駁亂浮譌。不敢多讓。故其存者。鳩繕正之。若散見猶餘未盡。雖片言可追。邇遐古因削牘識之。各以書從。俾無並佚。初以傳述舊聞。已乃兼舉事類。頗及漢以後至隋其見於他所類者。不取。若皇覽徧畧書苑類苑玉鏡諸家鄙宗孝標杳等所撰。叙千不存一。亦復隨錄之。與夫聞之故老者。惜不獲睹。猶可得一二。旣累歲月。距之宵寘。收采

不得息棘艱矣方淖乎如涉於海未有涖昔歆向父子
所錄三萬餘卷庶哉豈遭厄之屢天所忌抑後人蠹敗
去之何益遠益亡記云氣老能變曰精事習能變曰智
彼閔藏者機旣伏泄之華英者化之光精又竊奪之是
寧免於懟嫉尤之而庸有千萬世具存者乎古稱立言
不朽嗟乎嗟乎所以嘔膽刳衷心鍼肝鉢身不得當者
冀垂之後世而徃徃零墜散遺湮燼廢沒顧其殘斷時
見於缺簡殘編并其人姓名微著而已故士亦何所爲
不放棄乎當年極身之所欲而終歲窮愁耽於著書欲
何見耶且天地猶有盡而況區區空文余旣深感之故

收之於晦暝蔽壞之餘復光著若發蒙矣此非余之所
能也若有以導之而不得其故也精神之流於世尚亦
猶有存乎且余不能盡紬繹名山大川之藏與四方所
載安知不有同余志者冥求而湛索之必當有繼出未
盡以成余書若夫撰次之體則首以古初之書見於他
者收拾之雖無篇次亦各見矣曰書類乃占事僻隱若
怪奇可喜者以類從四事類名之曰古苑云

說家序

予讀小說家者蓋慨焉古者居寢有替御之箴女史者
流朝夕訓喻而納之規其說之源乎班氏以爲出於稗

尚而夫

而過而

之在周秦

則可

官在漢固有典司者號黃車使書九百四十矣皆推本
於周蓋周官有誦訓掌道方志而訓方氏又誦四方之
傳道及問師縣師各有其書故也然志有伊尹說天乙
堯問篇皆出於雜家雖淺妄所憑則又不止於周竊怪
傳於今者何寥寥哉司馬子長蓋畧而不書若青史子
者古史官所記及周考周紀等豈皆無可取耶三代之
事若存若亡稍或識之庸不乃愈乎且安知非當時之
舊而必盡去爲子不語怪將患其迂誕不雅馴哉則鑄
鼎以窮神姦禹獨何爲者予旣深惜之且怪典籍散佚
不獨古爲然自漢迄今其所亡失者何限也班氏所列

與劉向所錄不知其同異至隋經籍志則又加雜矣猥
襲者燼焉莫之恤若其叙述表見後世何塗岐紛驚而
交鞅轍焉絕騁咸自千里矣即相軋亂一旦同泯焉漸
滅無遺又何可哀已哉且其人發憤有所著論罔不以
才自貴及夫事之眇小與介在僻幽罔顯美惡皆得附
麗炯戒存乎是烏可替者此固不好文者之過也然若
梁氏江陵將覆而先藝其圖書則雖有蕭相國豈及收
集哉是其亡者固不獨此而并罹焉下迨宋氏所存則
又多斷簡矣鄭氏所載猶且不可復睹其全然予怪唐
以來何自好而非古哉即其才不相逮遠甚雖戲弄畜

而筆墨畦徑代以降不可推而上之。况近者括帖之習。行僅擘裂絲縷相銜。而美錦不使人學製焉久矣。何自而窺山龍華蟲九文之盛乎。予所哀書無慮萬卷。凡外家語釐而別之曰雜說雜傳。方州記牒怪靈道釋談家。月旦爲卷二千零總目之說家。稍刪其繁複不典者。序而傳之。不猶愈於優笑博奕乎。

陳子昂集序

夫詩發於情性者也。作者孰不由斯。三代之詩發乎情止乎禮義。故著以爲經。漢以來專以質勝。猶古之遺風也。黃初而降。以接晉之正始。其文浸開下。及六代而靡。

麗極矣。蓋其志溺。故其氣卑。其情荒。故其聲散。以是而求古之淳質。其可得乎。逮唐氏創宇。聲氣混一。始復振發。然稍就聲律。諧合體變。遂爲近體。而與古畫境矣。子昂出於麟德。以後浸液以華敷。沉蓄以雄思。約裁以精蔚。鎔範以情致。鬱抗以夷淡。驅馭以傑朗。畧采艷而務氣格。薄形貌而專興寄。下啓開元天寶之盛。而唐之律遂雄百代。而長千古矣。謂非陳氏一變之力乎。夫諷詠之初。不能直致情鬱於中。婉以舒寫。故節奏興焉。古者散而不迫。優柔而可想。後之作者。求之益以纖密。則聲病拘忌。由此而滋。遂轉而爲律。律之變也。又與時而遷。

故今之言律獨宗唐氏之盛子昂詩傳已久顧其文多
逸大中丞南岷王公授予一編曰子昂吾蜀產也不及
吾傳之吾有不釋焉以貽子按子昂射洪人少以貲自
雄剛槩有奇氣初入都人未之奇已而名一日滯長安
中爲文激昂善條列利害陳當世之務不徒溺俳偶爲
若止營原陵及慰撫十姓皆匡益規誨濟時之畧讜正
之氣時見乎辭廼爲詩所掩中丞公所以出而傳之恐
人遂將遺子昂磊落大節與所論著不幾於失士哉且
其所遭多感憤不平才足以有爲而抑不得逞志行芳
潔而乃周旋諸武間禁勸裨益非無尺寸而所效又非

其所。故其爲詩益嘆嘅反覆。有遺意矣。余旣已爲校正。又爲序其致如此。

范太僕論選序

選取文之
偏而氣競
上者蓋爲
習於近代
之靡酌矣

論者詮理而述訓者也。自孔子齊魯論名焉。後來者人著其說。然三代而下。道術不同。因自爲家說。乃詭異變化。不相襲述。文之奧奇。詠恣亦未可得而窮矣。自漢以降。旣無異道。才亦視古不逮。有能駕說自用。別立樞闕。不出一途哉。故至近代愈卑。亦鮮足觀矣。廼太僕猶有所取其選。自莊荀以迄於今。大道術裂。則踏駁未純於文。然而氣益競上。其人皆強鷺獨立。執所見。雖偏袤曲。

議時詭於正。顧其精錯堅確。究極於詣。自名其說。以爲是至矣。天下不可加矣。故不可相通。而亦不可得而及。後焉者。旣不能復有所出。而深切沉至。又非復若往者。專屬必以其說勝。而莫之奪矣。烏乎敢望古哉。太僕以世異變才亦異宜。乃古者多怪嚴。未易窺人。旣鮮好之。獨近者易曉。且不必致力於學。卽中才以下皆可企及。則所選宜莫先焉者。而猶間取之古。且以爲不可盡棄乎。况乎言道術則莫如古。論今之事其趨變也日新。幾勢移易安得不與之上下。古烏能盡之哉。故曰持與奪大議者。不讓事若謀。及國政繫之萬世。與夫四方之事。

懸以利害及經法損益變通其論乃廣諭雜舉不可勝載巨細不同要皆以陳一意明得失故裁其議者以當世爲急不徒文焉爾也則非太僕孰能專之太僕賢者後也其仕也聲烈章聞光於竹素旣得謝乃心不忘眷顧斯世其有忠國輔治便計猶拳拳三致志焉故斯篇爲論說著而治安之要術理才性道訓典而見行事豈能外文辭間哉

送莫逢之淮陽序

士伏軾不下遑遑四方自古然哉雖所挾異能所持異說至欲用其所未盡則未有不同矣必得蘊籍懷謀積

雜之管轄
幾不辨

長揆勢畧長之摩事分長之明因用長之行箱御長之
法瑑飾長之解閉結長之察發幾長之決計畫長之詭
緒端蠡起長鑿穴於左右長意定勝長定方於得事
者長定可否於投間長定交容媚長微辨定利害長定
去就須臾長虛實之變定長猜貳疑間定長驩愛素定
長肝膽無所吝長此季子所謂以此行說而有不能出
其金帛爵賞者哉故動於杪微幾常新而不竭裁於無
有以常利不劇驚之若渴故善因敗爲功粹至若驚故
羈旅而能間於戚言若不得已故能中其所諱忌又能
得其所甚欲視聽於無形故有來必先知之故迎其未

及而還之則愕不知所慮經其不意而乘之則追不知所以備投其不知而掩之則悅不知所測量章信節而示之則樂任而不疑開械守而要之則吐心而不惑舉弋說而廩之則恐懼患不至焉是以時揖貴勢而氣不懾也抗守交臂而遊不逆也扼腕聚唇而議必當也奉器幣以從而情必得也不遠道里而質必通也構之重捐而見恐後也主約爲講而得其柄也是則士之所爲遊而得意於天下也今莫生方困窮於途闕於所遇偃蹇不知所之與季子出走易水之上親信背而去之其無聊殆何以異然莫生之所以遊者有一於前所云者

乎末也夫今之時則非往者易動搖也其勢之難旣倍
則所挾操者即十之猶未見其過也且揣稱於不見其
隙者而欲因之有所合量變於未同而欲其恤吾私無
所愛無所於中之而欲求必與也謀內誦於已而欲與
出途者爭捷也不能見所長而欲使當路者折行也此
則昔之所謂難而悽悽然人守事窮甚十說而不一遇
者何怪也淮左固多勁氣楚人勦輕然節俠好行義即
又賢於他所者生能慎修六術審見九言精習十變善
飾五稱謹施三智先明所詣不失所擇轉移若化攻至
堅於瑕釁藏拙巧無輕角試收天下之遺責攬天下之

豪傑爲當世所推轂。拱稽先路而避席擁帚。無寧使人
謂生善遊。而謂生遊道實有缺。

送魏季朗序

揚季朗在
於鱗之上
而心服北
冕

今代之能文章者稱李獻吉輩。其人也非李遂足擅一
代名。始爲文緣習卑下。且我
國家以武定功。一二文臣辭不勝理。百餘年來李始創
開之相繼作者皆李力也。然李之文韓愈氏哉。自後昆
陵晉江之流稍重於時。則宋之遺乎有吳自迪功始爲
六代江夏復恢之。則其靡於今者是矣。濟南作則視獻
吉又變而之古。一時諸君相與應之。自謂左氏太史復

出矣然議者謂傷於襲哉其所鑄詞必範之古是矣然
途轍尺寸一將循其故步是猶且不可而況抵掌談說
若優笑之爲乎予觀近者文不越三家而于鱗盛矣魏
君天賦猶絕淹覽該備其所解上無古始下掩來者綜
辭詭異操裁叔變不可以有方而不可以無方循有冥
營有遺往來不代而不可以知是可謂古之自出而不
出之矣予往則狎之然相樂甚也而未嘗以相銜也昔
于鱗有云予才視獻吉而季朗才視予斯言過矣予於
魏君博洽不愧之而精蘊愧之予也畧而魏也詳則安
能望季朗哉且每有會於中予倡之魏君和之魏君始

之予卒之往、代之以嗜好、游趨接捷、昵近邀逐、快適有
如予二人者乎、夫且相與順比於時、則雖終日談而炙
輟之辯與謔、諄有以異乎、而魏君之喙且三尺矣、踰之
所以無覺者、以不離於始也、談之所以無虛者、以夜之
者也、故辨者無辟閉之緒、則無以藉察者、無匿藏之端
則無以藉懽者、無離析之思、則無以藉予與魏君遊十
五年又復三矣、三年間、魏君之淮之白下、未嘗一日寧
居、則予嘗輜然以思、夫專閼之情、振矜踰越之情、奮節
慘悴之情、厲激憶傷之情、槁枯凌遽之情、隘促離逃之
情、蕩浮游放之情、廣肆利榮之情、溢盈進往之情、銳上

欲以游進
其少

故刃不發則芒歛。湍而劇於匣。驥不騁則筋蹙。急而弊。於櫪。少壯者不馳。則痿厥而傷於血氣。士無千里之行。則業不勸。賈無廢居之事。則利不比。使魏君終歲不游。則千載其可俟哉。古之賢豪。不巳於行者多矣。未有不。出戶而無廢功者。使所畜不因。是感忿奮發有所於藉。之者。則墨墨之化。婦人孺兒之事也。丈夫所以相期者。即夷貊異地。曠時易世。有如一日。可以列中相示也。而。恐對面接席。比肩交臂。不相離哉。昔漢文帝云。久不見。賈生。自謂過之。豈非濶絕意有所獨詣。雖自賢之行在。貴勢有不忘者。矧予與魏君共砥。豈爲褻昵踈數間乎。

故遷感者情之變移而盡類也睽殊者跡之去來而極
思也魏君之文無亦因之激而益奇宕而不制遠而不
可即兼納山嶽川瀆之氣而備象變情物之故已乎今
且羸糧爲冀北游夫

天都者天下之所走集其爲麗繁浩穰廣庶輳溢憑氣
怙才以文名者不可勝舉矣燕士尤烈亮好爲名自其
性然今

明主在上賢公卿大夫相與涵育蘊積於皞熙淳曜之
化文日以宣融敦作明盛豈特如予所知三家者已乎
予不覲都人士亦十五年其風之流被海內者予因得

知之則郁郁哉文之盛有如今日乎予願有以藉所以
擅當時傳後世者獨文焉爾乎

送元美太僕序

記云以文命者期十之世璿璣得常今我

肅嘉興則
日饒風則
會州固宜
首肯

國家光烈丕嗣式顯昭之越於今放唐之文其在茲乎
庸乃以伯問之命命元美者尚亦以乃祖父世篤之有
成勞於王室厥惟載於功宗爾能嗣修惟敬恭之以用
無忘前之勩是以先命之四嶽之任曰四方之事茲惟
宣叙悲予底於績則旣能續服紹啓我土宇用廣顯德
以惇明攝固之若晉楚之郊而有章采服物令典之用

則惟夫子踐位而迪以無愆於常彝顧日靖咸我封畧
播敷於外弼成罔弗競是其能忘翼亮寅畏正於左右
前後哉故茲簡也豈舊勲是爲抑以僕臣正后亦克正
今

天子新服命尚賴百爾有位君子匡佐不怠以旦夕交
戒繩之義憲而達之正辟非無自入也故侍御僕從必
慎簡其人而太僕其長乎其在周掌正王之服位出入
王之大命侍朝而正位退亦從之與王之出則自左馭
也其爲親臣可知矣故問之命書獨著之若今之建官
則視司牧也其職少異哉然入踐九卿國之大政實預

聞之則惟所以致忠於上寧有間乎且夫子之舉也以
文德興在位夫文平成天地緯象日月通理萬物而軌
儀羣動者也故所以經國緯化建之彛道而奉之訓辭
舍文其曷已哉夫事大不從象小不從文而能以其欲
從焉者蔑之聞矣故謀議於內外以講大事則曰謨明
弼諧者文之業也沃啓於一二以贊祗德則曰乃言惟
服者文之教也定我基命以作股肱耳目則曰亮章天
工者文之象也疇咨上下能道天人之故載之典圖法
象而曰監於成憲者文之功也誦言惟昔作誨誓御以
懋寘於耳而曰多聞於典學者文之華也若文告之加

於四國誓命之用於正衆多才藝之事鬼神史之能辨
名百物以周知山川爽精之氣宗之守九儀五禮六樂
胥之守度數聲律是皆文之散於一節者也我

國家文命之昭受二百餘年矣其所浸潭衍溢沉蓄蘊
育誕發於今故光象之顯昭休動之無外而覆被之盛
若所謂太平嘉瑞圖書之出於是並作故坤靈圖云法
地之瑞與鳳皇銜丹書者是其時乎且周之盛也亦十
五王而制作始備今固嘗興禮建學儲精垂思表章風
厲詳延博納敷求之矣而太僕之命君子悅新舉也謂
是將興禮樂哉不然以彼其才而涉揚於外已久何至

於今而始庸之且問之書實云以汝作大正正於羣吏
其無以非人備官耳日廸上以非典雖今之職司庸異
而意者其有在乎不獨以匡乘馬之政溷子爲也且君
子之命才其何異命馬乎而謂非所及乎政哉故材之
若卹若佚若滅若沒者天下馬也直中繩曲中句方圓
中規矩者國馬也探前距後蹄間三尋者戎馬也四尺
之輶終日馳騁而不弊需力已竭猶能一取焉者田馬
也進退不可周旋不能蹇不可勸登者駑馬也是以太
僕所守雖爲馬設而政之寄則於此選材焉必以夫俊
雄沉驚擾馴此亦士之千里者若夫雖泛駕而佚材焉

足、騁、者、是、亦、並、畜、之、至、凡、馬、且、不、一、顧、而、況、異、棧、翦、鬣、
飾、之、乎、故、文、馬、千、駟、是、今、之、才、盛、也、而、朽、索、在、馭、其、尚、
不、忘、交、儆、乎、位、則、虞、臣、之、箴、乎、不、然、何、文、命、四、訖、而、猶、
遑、遑、市、駿、爲、也、

送郡侯吳使君入朝序

幾無字不
典雅押何
生氣奕奕

江以南之郡蘇爲大自昔論治也視蘇爲急故治蘇者
難其才必慎稽以敦命之即不暇微遠自嘉隆間爲蘇
者可指數哉皆以賢才選擇而來治效聲蹟遠出他郡
上然至吳使君之烈其何以尚之哉夫治與時上下往
天下之網嘗寬矣蘇負海郡沃野而饒五粟之田廣衍

四斥水泚最而稽畱渠於有穰故驕逸之所由生與侈縱之習無亦惟是寬政之所休養俗旣富厚則其時有放恣踰僭勢然乎旣患其不均則用文法相監司一切窮竟作諸科條至纖備令民無得自由一以吏爲法置伯格長動靜必聞下至飲食衣服與爲節度敦儉忍嗜欲從限制不則使相告言坐之又羣子弟讀法訓諭閭里雜業皆若身至其家教之知所觀擇焉其勤精務治勞心焦思以飭其法蓋朝不遑朝夕不遑夕而憂其民惟恐不出於愿慤忠信猶染故習爲也雖刑名比詳法令稍密教化之意則懇懇寓諸文案答訊間哉然民遁

其情而有鄙心即暴戾子弟無賴少年跳驅匿矣而未喻所以故辟睨有司而患無以逞其志於一朝尚將使爲敦行躬有之無以異於古之成俗乎則強之弗勝亦何幾之與有及吳使君臨之則曰是法也夫旣已備之矣復何取而紛更之爲夫循法而治者是從政之經而求靖於民也非所以求罪而深索之也因俗而教者便事之本慮經而易見不待錯質而更論也且今與古異宜風與俗異尚苟無繫於變緹冠袂縫固大吳之國哉語云摩之若痛暱之若哀吾寧使四境之內喜好謠俗被服居處奉生送往無不得也而又令工賈末業繼至輻輳

其溢也穀粟絲布流入他所衣履天下無不足焉是
亦惟綏之以靜撫柔其泮渙漸靡之深其澤何至未洽
於信誠介倪於始遽望服習安吾教也若猶是恣睢扞
法網姦滑橫民間縛束之三尺固在手自爲奏上之報
當不逾夕下史猶不及知亭疑法分別其原必引經義
文飾陳所以輕重無害吏錯愕不知所出曰狐鼠何足
以治爲若今日擊一豪族明日收一賓客昆弟又奈何
卒令此曹子不患有司也夫稂莠者時有之簡修其政
器以涉揚其芟作田良苗得無蕪穢而已無亦并侵傷
之不惟其類而疾之已甚乎則合耦於耨生植之幾何

而霜露且交下亦何賴於縣官爲從政者豈有不得已焉而爲此如茶之令也故使君之來再期未嘗見其有所議於法特務時而寄政焉用力少而成功多與其羣百吏而習憲於前譙里尉游宗以申命於什伍審吏嗇夫而藉一二布之繁其文辭無所漸范濡之徒上下相謾蚤晏之時謂已布憲無虧令語以能率勵由禮俗則未如之何也已今能使人盡其力勸其業而樂其事九府之輸不畢期而集成厚化不知所由然杲乎如放於春淖乎如在於海風乎如泳於澤他日者方集衆檢式責讓畔異路及舉孝興廉雜問得失而此皆篤叙於自

然無虛飾事觀聽外爲若狀而中背者且民旣荷戴之
矣即興行醇厚惟上之視寧辱鞭箠使也古以惠得民
不忍欺者不知效孰與比乎

嗣天子新服命元日大朝會以六計弊百職事則吳使
君治行爲天下第一獨書上最自餘爲條教者在後叩
頭謝羣臣皆心服其能首賜爵疇庸天子且臨軒問何
以治蘇而功烈如此也使君雖不敢有所陳對謝以奉
上之德然有不可讓者安用稱長者之言不盡其意有
所規獻也補治益主忠國之計一舉而悉心焉蒙嘉納
有所施惠天下固社稷功哉恐股肱郡暫勞且不庸釋

骨力凝厚
才幹精強
作者皆謝
顯鋒

翼輔而久於外，獨如吳吏民之日引領而望何。

送蔣僉憲兵備岳州諸郡序

蔣使君守留曹且未一考被

命按察岳州以武衛從楚之政。夫今之時熙治矣，豈猶有所重圖於民，使南面而不釋，然忘楚之慮，亟以使君臨之哉？且譬之衆材焉，使君於今今之棟幹，也是所重倚以構造我方夏，豈其無選事而授之者？楚於天下強國也，自芟冒以來，篳路藍縷，以處山林而能修其車賦，治其戎兵，以與晉更霸，故其餘俗猶以武扞勦勁，輕心爲習，逮今猶故也。且其地莫非崇山大川，廣藪是能生

殖百物以成嘉功者乎然非下之利也自昔封畧之固
而因以怙恃爲不靖急而走險其能以狡禍猜忍之性
安其田里可鞭箠使者其與幾何故易動難安以武力
介自逸而憑怒以騁自非柔服訓齊之以禮教而又董
振以攝之威命幾何其能使山藪林麓絕壤窮裔之人
而無有不被乎故汪是土也而介以昭丘沔漢所謂金
城千里者合資澧湘灘而北會大江名之五渚昔秦與
荆戰而爭洞庭五渚者是其地雖虞夏之際三苗且負
之不式化矣歷世咸置徼焉於以畫地而守險固有自
且踣跣科頭貫顙奮戟者又其恒俗然陟梁爲患烏得

不爲深計哉語云誰不可喜誰不可懼故雖今之世抑
豈其無而使君之才又閱議長慮環達博慎何邇圖之
有載其明畧與之勤恤以宣叙百職固國家是賴往旣
爲郡邑則無不即又及爲士以詢聽佐司寇理又以文
無害稱矣是皆未足效其一二故斯舉也以江漢之間
控扼上游門戶庸蜀而襟帶荆衡其險固則東南之重
地也是尚可抒其才一日乎夫民惟險則乃多曠矣即
方舟汎汎而濫於重淵淫於巨浸渺瀰鳥舉遷徙固其
所習而安之者矣其有作姦椎埋欲窮其狀彼且不肯
詣臺置對亡命山澤奮臂一呼什伍相聚急之則挺而

起緩之則浸而日甚是安得不病有司惓惓然恐一旦
發也吾寧厲甲兵驟作重劾盡出而置之法嚴若束薪
使無所逋逃豈不快意稱善能制其命矣然何以懷罷
士之心使無敢犯令乃欲以一切勝凋劫之餘民且不
見德而人求逞其願吾能以其欲盈乎哉方城之外楚
之令典故在孫叔之制叔時之教是荆人之所服習也
抑豈無其餘風遺俗乎無亦使君之所以治舉德刑政
事典禮酌其善者內戢其民而外以經武因以春秋耀
吾兵士不惟招果毅以蒞之休動之以明惠綏柔之申
令簡服楚之士於禮義以蓄威於天下工賈商農不易

其業父兄之訓嚴子弟之率謹卒乘輯睦師人有禮吾
一拊而巡之恩踰挾纊故甲不必釋於纍兵不必出於
翳弓無解檠矢無離服而武衛以奮洞庭之波若在杯
孟阻深暗智若在宇下何潢池之赤子能盜弄爲武羅
伯之地不惟使君指顧使而以寇令施之乎且楚人輕
而驍固天下之強兵處也而又擇所以授之若此抑豈
惟楚之爲往者嘗一用楚之兵究當其隧井湮水刊則
又何賴於鐘鼓之師而且以蠱賊我中夏故以使君從
楚之政藩屏焉設內政焉寄作戎兵以待不停不虞天
下惟無事三選之士不待令而集二廣且駕必無留行

矣若司馬法所以致衆於金鼓之節是振旅菱舍之常也豈謂一二長吏不能時訓而月修之而待使君子哉故必先撫之而後惟所欲用不然以山川形勝異時所跨據而進與中原逐者是其輕以委之余是以知使君可以此定功業於當時光於前之烈矣

送戴刑部守撫州序

惟皇四載秋九月

在撫言撫
在刑言刑
佐以健胃
肥以勁詞
才人哉

天子命司馬遂之士戴君若曰惟撫實介郡僻在江服往陶正是保以佐我王室之禮器埏埴之事陶旋方以度髻胡猥苦不入苛慝不產民以無忘厥疾惟是羸

簋尚亦崇有虞氏乎。不然是瓦礫也。則亦何有於王府。今余命女牧女其一。乃心績乃功法。乃百常者。爾股肱以宣爾有民。余亦惟女嘉越。若有顯命。爾所弗忘。迄於裔土。其與幾何。戴君旣祗服顯休。誥曰。惕以懼曰。我其庶哉。若之何。免於戾駕而南也。詎以塗惟適。言罔不用謀。旣見劉子而語之。故劉子曰。子其邁哉。夫撫易爲也。且民生在勤。而撫之役不佻矣。夫勤以本。事事以建利。利以敦惠。惠以保業。業以定功。故治可明也。事立則動。時利建則力紆。惠敦則求阜。業興則俗無敗功。定則教不煩。動時所以給濟也。力紆所以豐物也。求阜所以周。

徧也無敗所以徵恤也教行所以保本也今撫之民固
勤、恁、朝、夕、不、遑、暇、豫、矣、不、謂、無、怠、無、傲、惟、土、功、是、故、乎、
夫、能、動、民、以、力、政、而、加、之、以、純、固、受、之、以、蒸、遂、重、之、以、
率、作、和、之、以、廣、厚、其、何、事、不、徹、而、何、生、不、育、且、治、民、者、
將、備、未、至、而、設、之、者、也、匱、而、後、圖、憊、而、後、知、恤、將、侮、之、
是、召、則、何、以、在、上、乎、若、夫、山、林、藪、澤、田、疇、原、麓、衡、虞、是、
朝、夕、之、所、有、事、也、而、使、窳、墮、簡、棄、不、圖、康、功、是、即、繕、完、
緝、比、遂、其、肆、旣、殫、盡、蕪、穢、困、竭、余、雖、欲、有、於、又、民、其、若、
空、饑、離、逃、何、故、長、老、字、幼、振、窮、分、乏、存、寡、收、特、出、淹、起、
疾、扶、罷、興、滯、是、所、以、承、上、之、惠、而、導、之、民、者、也、鳩、率、簡、

役賦事發功布藝程績登効輸備納享儲資用器是所以率下之忠而致之上者也。且子法吏也而獨不聞乎五屬大夫皆身習憲於君前載而布之鄉遂之長。察民之麗而致之辟。其有不從上事而倨傲易令者。弊之以邦成。其有不育於家而怠昏從欲者。弊之以邦成。其有離俗怪嚴橋誣竊令。與夫兢於刻鏤繁於文章淫於奇巧者。弊之以邦成。是典圖刑象職憲之所守也。而假他求乎。今吾子即撫之治勞之休之時。其出入煦嫗之覆育之詰姦慝。禁洿麗止寃梏懲薜暴。剝禮新叙舊任良物官。劓範軌正庸勲。倂工施青宥戾可不終日而聽縣。

鄙、緝、睦、經、產、阜、繁、惠、殖、孔、固、其、有、大、役、聚、人、以、心、競、而、
又、何、假、令、以、驅、之、乎、詩、曰、不、僭、不、忒、鮮、不、爲、則、不、僭、言、
不、康、娛、以、縱、逸、也、不、忒、言、不、淫、用、於、非、彝、也、爲、則、言、上、
下、習、服、而、治、成、也、夫、是、以、功、立、而、不、廢、教、行、而、不、阿、載、
之、以、令、名、奉、之、以、勲、列、撫、之、以、彝、器、旌、之、以、茂、常、百、世、
不、忘、所、謂、福、也、福、祚、之、日、登、其、受、祿、於、天、也、則、宜、戴、君、
起、而、再、拜、曰、若、夫、子、之、言、實、長、國、家、抑、又、以、厚、吾、私、也、
濂、也、敢、不、承、

送何制閩之福建序

昔在禹命九州經別云閩居海中雖暨聲教固以荒外

諸閩故且
自述其簡

蓄周官閩隸則又以牧圉視之逮漢入職貢畧與內地
等然其人民固柔順易化地雖阻險而沃野千里足以
自資自昔未嘗患苦中國其爲不侵不畔之民久矣我
國家初建則又首服從迄今殷庶才僞徃徃是出迺邇
者中夷寇創殘之後綏集者又十數年矣繁阜已不啻
昔何子侯乃被

命開闢其地夫文化之於勗萬邦也固欲使民至老不
聞兵革然方國各置率以經武陳師鞠旅焉豈以治安
而不祇戒崇明命乎哉若閩被海東南駭焱騰薄徃來
呼吸猶不可一日忘警是以上厯

廟議其爲遠馭長撫綏靖之計蓋至詳以悉阿候世將
家慷慨有意功名其受茲鉦鉞軍鼓之任罔不夙夜圖
以身許國茂有顧矣邇以入

賀事畢道吳予壯其意爲道閩故以送之夫閩內阻海
外限以崇山接界甌越其勢易以爲非然而不敢者以
漸習深諳禮義父兄之教子弟之率有素也特懦弱不
勝兵一有警使之卷甲而趨攝弓而馳則恒怯幾乎僨
敗矣求以有功其將能乎若徃者役皆召外兵僅而克
之後乃益募士屯戍予嘗周歷海上按軍實蒐乘簡汰
之矣皆烏合不逞少年平居則梁倚驚驚不服馴及督

之凌陣則爭先死敵者安可望之令之進而不進止而
不止前後上幕府以不中率召下鍾官不至理又不肯
置對悖桀不可如何者數矣徒勞縣官供饋財又非一
日之故也至衛卒尤弊而易訐若驕子故原閩之患始
於姑息而軍法不立恣其要求復諱於欺詒養護醞釀
成之自非有專斷之才行之以果明於勸懲罰必行而
無貸以司馬致衆之法訓之平時誅後至者則可以視
吾旗鼓而爭效命矣此不繫之將乎傳云一夫善射百
夫決拾大抵江以南之俗慆輕非無逸材驍絕敢奮之
士顧教不先焉故私勇犯分椎埋作姦而怯於公戰使

令之必行則可驅之蹈水火而患無選士哉且閩內之
則山澤之氓遯於幽荒習谿子黃間隱伏肆剽掠其人
顧不可驅而出使備他盜與外則瀕海善舟楫千里遯
利通貨賄以市於外國一二長吏或陰縱之浚利也深
則敢公扞法網無所顧忌其啓隙兆奸非上致之則誰
與故非得廉武健吏深治其狡禍之民遏絕其黨徙遷
其豪一蕩除之而後施以寬惠使無復者則烏能愉快
哉然此固自監司任耳今之命闡其權寄也輕雖期於
共濟而勢不得專獨可振耀威靈以揚厲光命佐宣其
聞慎固封守而已若東畧之不如則亦預有事焉而得

謂請問諸文吏哉。余既習閩事故，喜爲何子侯談。若必欲舉舊典，則往置寨皆於海中。或去岸數十里，今畏涉皆內徙矣。率是而四封之內，儲峙器備，其廢缺也可知。顧閩非用武地，獨可文教綏耳。即天下有事，嘗坐觀，旣不能患人而亦不足以爲資。何侯方欲建武，席卷乘勝，疏封爵知閩，且不久借也。

送通政司周公序

隆慶初作

可作虞書

主上御極，建置宰輔，用統百官，致天下之良材，聚天下之賢俊，則有我周公召起自浙端，委黼黻，前以詔，始可納之善於時，敦誨舊老，儒藝經術，博聞弘達之士，充於

王庭徧於有位凡

上之服物章軌典制法令自密近而施之邦國與夫興
置施予懲罰詰讓無不比於憲公執軌盡諫顯諭匡導
誘啓其衷而陳力致效於何不盡也若正色危言犯而
不隱與救於旣發力倍而功半者其事豈同日語哉蓋
際良時佐隆治其勢若因洪飈而託纖羽引江海而沃
稿枯故不見其勞蹟而潤澤周渥張舉振發有不假論
說而成況其潛計深慮謀謨於廊廟者豈在野可得
而言哉時且計公即秉衡操成大啓我疆宇以純祐我
萬世乃側聞公以

簡命曰爾作納言南土惟是舊都 王業本根爾其靖

之其庸愈可幾乎故徹肘掖之親而分宣翼之寄去朝
夕之地重臨監之任夫公於四方之政既所備具明昭
利以敦道之當必有所崇樹余何知焉然竊有獻夫江
以東在古不乃甚重若今可不深圖乎東南沃壤強國
貢賦分天下半其遇水旱不虞之患若吏理失職則上
關

宗社大計貽宵旰之席是當求其源思所以消弭拊循
長養之由不徒爲一方計實天下萬世計也且布上之
德而遂之民者五屬之吏吏所以聽論斷擊者畫一之

法今用舍旣慎擇才益審吏皆賢明法更詳以密宜與
昔加治而視間井生殖繁富於昔何如也人情澆浮易
動於昔何如也爰書填委毛摯於昔何如也是非吏不
精敏法不備與教督不勤察舉不嚴之故也殆求治太
過上下之情不甚相悉故雖竭精神盡心思民愈不見
德理之而益焚澄之而愈淆其由此乎夫情貴於流通
而或壅遏將使柄易於上勢竊於下其患於何不有乃
自古識之矣然健者譁而是讒說僞以辨僻以堅震驚
交亂皆言是媒使言而不擇是衆爲政也則亦何有於
治故自昔理亂徃徃因之而喉唇之司肺石之任必求

忠信明察之長觀變審勢識大體不徒以廣稽覽采流
議苟遂諧慝爲也。今咨於朝而得公其臨之固知其務
慎也。何有哉。公行矣。風之所趨是爲政俗。輕重所由不
必易置。人之情矯而爲名也易立。吁。嫗而爲恩也易工。
略形跡而取衷於獨見也難持。違衆欲而必申已也難
遂。是以君子之言多疑。而細民之情易徇。弘遠之議多
格。而萋菲之言易流。單危微悴多以貌欺。而士族世室
每以實辜。此沽矯激訐操切刻轢之習所以未絕也。喉
唇出納

國是焉繫。公於持之由是焉知。所望治矣。且銓席將即

水厓徒貞
而潔之品
似未盡堂
前輩所譽
耶

召公入平其政政本之平豈惟南國實受其惠哉

贈憲大夫冰厓金公序

古者贈人以言謂詔之長者而人肄焉故言堂則充于
堂言室則充于室謂言善也非所以奉長者之謂也故
以爲壽必先之辭則頌乎亦祈也鄉先生曰金大夫余
習焉大夫蓋溫溫恪恪氣和而色莊古之人乎今行年
七十而康余從諸父老觴之大夫蓋諄諄讓者再曰吾
好古有所述明業在簡牘惟多聞以待能者故不能捐
書廢學迄今遑遑爾敢言老乎吾嘗從大夫欲舉隆世
乎三代仕所歷四方僅僅欲無廢吾所爲若人歸之惠

本則何以稱雖得謝廼心不忘敢介自逸用弘於私哉
今其以燕禮接當養焉猶若遽者請辭爵諸父老揖余
進之曰休哉大夫之德讓而益顯與大夫故爲李士爲
廷尉以平反明清於辭爲論多報罷之所活者不勝計
出而持憲其用法也愈益慎所全活也益又多德之在
人奕世不忘矣且古之所謂不朽者其言立大夫所論
敦厚以則可爲經百世訓廸於裔土昭若揭日月而行
之其教漸洽之矣抑又以爲不足退而論著綜百家旨
要叙當世之務列道術短長下之象數聲律明得失之
分以傳諸後願有所退託不敢顯自附作者欲藏之名

山川以俟昔孔子西藏書殆亦謂當吾世有所是非固
未可自任與然猶之乎數百世之業也故願以憲老焉
雖未得致之東序以饋食禮饗之特吾鄉之縉紳大夫
士私相與謁賀則謂大夫束修行義迄於耆艾其所操
植如彼足以勵世成俗勸掖導誘是宜爲衆所願望以
爲楷蓋尊之斯事之事之斯欲其壽考以寧永觀省弗
替人情之所歸豈有異乎哉昔在管氏之教役官期而
書伐以告且擇其賢者而異其禮曰有功休德長我官
惟慎愿慤以待事勸綏有衆足以補民益治者以時升
之即大夫雖得謝修於鄉鄉化之矣設安車之命一旦

及門其得辭四方之役乎夫鄉不越長故我比里之士
咸以其敬恭頌言於大夫祈之遐享惟是康裕其衷發
明耳目視聽筋力之從無弗少壯若者則素之賦受醇
固厚凝而又爲天所迪篤申祐保茲有不益介景福延
長哉余不敏則屬之惇史焉歲時軌里復事而有所問
可具以對上將遣存于家也

送張幼于之金陵序

記作水山

撫景流連壯心慷慨登臨寫送烈士歔歔豈婉孌之弱
慮獨磊落之雄姿眷容與而遲徊薄雲天而高厲僕少
時擊劍意慕縱橫伏軾游談庶幾當世專嫉在前讒媚

居後才大用小勢重發輕盤桓屢引迴翔淹薄何嘗不
蹀足馨効高蹈拊膺痛英年之不畱嗟逝波之靡及驚
菟蕭緘流葉生哀孤影忽開片虹中斷每生平親懿海
內交游晤言一室夢寐千里睇行雲以送歸指飛蓬而
傷遠雖聲騁上國光生路隅亦復杯酒踟躕握手興歎
白雲飄飄半是河梁之色黃鵠一舉空多異域之悲况
張君與予交外形骸氣厲金石擊筑筵上失聲長號吹
簫市中仰天悲嘯霜旦晴初酒中累月神閒興劇賞好
忘年邇邇埋煙幟結霞軌挂柁巨海釣連六鰲遙指天
末西尋白門二三君子相與祖之履綦接響觴詠錯陳

新露微流金行初御澗壑懷風林岫生韻軒宇清泠珠
洗江中之月毛髮洒浙犀沉別浦之煙虛爽空來占人
衣袂覺襟期高明夙昔都盡眺引暢適四坐皆傾沉醉
關河枕席江漢蘿月半懸晨鶴未警而征夫已投袂即
路矣想流風於延瀨追舊侶于山陽辭多憤激興復惋
楚聊巾別章與長雲而縹緲同煙水之悠悠耳

續吳先賢贊序

古賢人之修於鄉是其貴德乎若出而定國家功伐在
天下則太史氏存焉無不書者其鄉之行則惟閭里族
黨詳之豈無遺者是以在周游宗黨正各使爲書有以

也夫吳在昔爲輿區賢人產焉者衆太伯潛焉子游澹
臺各標其間然不附青雲之士則湮滅無聞者可勝數
哉昔有婁地記諸書及吳先賢贊多不傳余重慨夫賢
哲立身修行莫不始于家是故古者正月朝于鄉而復
事遂定其論及有所選也亦自其鄉登之則雖出之四
方有功烈著于內外何不記于鄉哉顧今之爲書者多
繆妄竊操弄顛倒之其所褒進非陰有所附離則顧望
自爲地所刺非不于其娼嫉則以無所于籍忽遺之是
胡所徵信與往志作于文定公諸賢又有別載者則楊
循吉閻秀卿徐禎卿祝允明其著也余私其緒有所述

明若其義則竊取之矣且不能遠及古始者何夫前之
作者既藐世與人易不能有所奪予故斷自今則論其
行事跡其始終之槩若功施于民蒸蒸遂遂者以勞定
國赫有顯名者翔序卿列藹藹濟濟者歷踐機要善保
無咎者積資賴寵默淳膚遜者躬勤砥淬宣翊庶猷者
董正彈壓望實克副者艱棘危慄蹇蹇弼直者闢造士
彊桓桓師武者智畧輻輳鎮安寡祐者仗節引義矯矯
烈烈者介厲嚴公侃侃謫謫者廉清潔貞操行絕俗者
高遯不污違世獨立者好博研思閑雅知物者敏贍辭
致蔚有藻章者淹該秘事綜毫翰與繪事著精理微解

善爲方論。砭石者。雕文刻鏤。巧炫倕爾者。誕恠。屏隱游
意變幻者。至于婦人之節。抑或有女狡焉。然無得而紀
焉者。以貞一自其恒範。自非有姜嫄太任之德。慶流無
窮。則雖梁高魯寡。亦所不列。自節義以上。不爲題目者。
所以効于用。亦各因時。或未可以繫之也。彼君子者。其
虛其徐。威儀王國。是我吳之盛也。出處異道。無得而譏
焉。

畫史序

夫圖象與書契並作。蟲魚之跡。其流分遠哉。然未始異
也。即書古繁重。奇奧後乃易疾便事。則畫之。于古今猶

先生每下
筆輒不苟
蓋胸有結
構云今人
文不工只
容易落筆

是乎唐虞以來施于黼黻文章旂常鼎彝爲用與書相
雜而六書有象形則又出入其間矣周官蓋續之事後
素功則法由此詳貴文而親用雖眇微未嘗苟也後代
愈降則愈不相及獨畫然乎其書傳自南齊以來僅載
曹陸顧展後之述者雖所著益多然若信陵宋元君之
客解衣盤礴者戶牖間畫龍者寫成慶大衣冠者甘陵
圖美人者漢以前不少槩見何哉豈遠而難詳抑其事
蓋卑古能之者衆與何弓矢輪梓猶顯其名而輪爾慶
石至于今不滅也將存于圖象者易逸亡惟得載于簡
牘遂因以久與秦始皇與海神相見左右潛圖以足則

占之擅藝者不勝數而求以名聞固不易也晉宋多名
流魏高貴鄉公梁元帝皆以尊貴尤好點染其事固與
書法同神逸自天性然是非學習之力雖云位置形勢
粗有其法而回腕用指骨掌之巧人自爲極靈妙非言
能喻故品視其人而人係其代唐亦多出于貴游若閻
左相薛少保韓滉王維者此豈規規吮丹設色模效者
遂擅逸代稱至見于歌咏者其人多翫髣負氣邁爽故
以此重即不爲其人使庸俚而能與彼俊雄者角能哉
至宋氏名者視唐始不如非以其人無復向者與故以
工藝視之則術賤以玩弄畜時以發其憤懣于胸臆著

之筆墨素膾而寄之于載喜惋忿鬱悲愁皆形見者則
無復論其代皆可貴矣今書自謝赫姚最李嗣真裴孝
源釋彥棕道醇景玄若虛輩無慮數十家皆標指得失
論擬工拙提覈品象該驗各實兼存記題目叙閎奧畦
經筆手所宜備見古法暇乃萃爲一編獨今代名家雖
有述者而未足覽觀因并爲核其事跡有所刪裁且以
見古今之變可深慨而惜予力不能收蓄又僻陋不得
盡觀古名畫識謝流別爲上丕其論其散遺人間者終
歸于漸滅惟斯庶可少存乎哉

刻韓非子序

韓非子書學者多有之太史公知其悲說之難而不自
免夫非之言則足以死而已尚安咎乎始非與李斯俱
學斯自以爲不如斯顯於秦矣而求入焉一棲兩雄是
將欲免乎哉且其言智術能法之士與重人者不兩存
也可以寵過誣者公法而誅之不可寵過誣者私劍而
窮之斯者非重人耶非於立談間遂欲矯其情行而退
之斯又安得不逞其憾而隱忍爲也故非者刻覈人也
并其身而不顧其論進說者之情備矣俟上之所向而
以吾說當之是愈疑主而不敢輕任吾說也可危也謂
人主之左右舉非伯夷而與愚不肖論賢智是顯言樹

怨羣臣而不自圖可危也。謂人主所以馭臣當操法術如束濕如御奔可危也。深言人主以所不任備所任所使備者即所備也可危也。謂君失一臣得百上下之間惟以先發爲務可危也。夫察見至隱語及上之所諱皆可畏忌者而非盡之欲自全也難矣。故率非之說使人主備臣下如嚴敵雖甚驕惰之主苟得聞之未有不懼者也。懼則思思則不敢委其枋於下使專壅已是其庶乎哉。故名法家言大抵能強主心而恐其下厚於猜而不敢自恃臣子之恩薄而疑畏之跡深。有以刻而失之者矣。未有以懦而蔽焉者也是名法之所長也。今夫王

爲名法推
究心術

厄至貴也通而無當則不可以盛酒瓦甒之賤而不漏
則人將安注漿哉故王道者玉卮也而不能如刑名之
易效者謂無當則不可徒貴也商申韓三子皆大畧同
術獨申不害者用韓之小國而能終其身治強且無患
鞅雖以其身覆而秦遂日以興韓則徒託之空言而已
嗚呼亦其遇不遇耶然非者韓之孽子也而卒欲覆韓
其不務維賊抑何甚也鞅魏人也欺公子卬而虜之稚
是心也固吳起樂傘之不若也其疑人主而自薄也術
之敝若此何怪也惜不害書久逸故申子者吾不得而
見之得見二子者亦可以明名法之利害矣

其後見其子孫之賢者則必曰此其子孫也
公卿大夫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也

其後見其子孫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也

其後見其子孫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也

其後見其子孫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也
其後見其子孫之貴者則必曰此其子孫也

論

張浚

失此一機
會失此一
人才宋事
堪痛哭

昔單子之論萇叔爲其將輔衰周而強之也魏獻子尊
周而爲合諸侯因并謂之有咎然則竭忠力以藩扞王
室其皆爲違天道膺天禍逮殃戮當其身且及其後乎
夫萇劉之爲周豈其不蒙數世之利而乃謂壞不可支
如周詩穆叔之言不終夕而知其非矣若宋張浚之謀
國乎則雖強變天道驟用弱國專謀獨慮除怨報忿奉
主之功而他有所不計者然亦規處失宜措施未當計
畫不能兼攬才智有所不足豈可盡歸之天道而謂威

靈之不復振者數運屬然不可以力勝哉夫宋之讐金雖百敗百死而不可已者浚終始主於戰主於守主於恢復未嘗可以少竊日夕安緩須臾死易慮而改圖壯哉其爲心與若其主之用之也又不可謂不專矣付之陝蜀驅三十萬而前似可乘金之隙者端珪不協驟戰而敗而宋之事去矣逮符離之失亡是又何寡謀哉李邵之才未足憑伏而徒奪其邊邑何預大計不爲萬全必取坐制扼吭深入中其要害之奇而輕率奔退使我重失氣傷沮山東之國忠義之士翻然無南向之思是又誰歸咎與其措置淮西也愎而不能延納猜以專禍

得如蕭張之籌帷幄乎。故若浚者有其志。無其度。意有餘才不逮。雖謂其輕用國家財貨。爵賞似非拘牽之見。而不能兼容博納。采攬豪傑。知人善聽。徒急於成功。而寡於智畧。勇於犯難。而疎於慮患。忠不有其身固矣。而不謂國之威靈衆之存亡繫於一戰。胡再不謀以取敗。遂使後以爲鑒。而終不敢進一寸以爭中原。和議遂固。不可拔者實謂浚已不效於前也。苟以曆運之興衰盡委之天。則束手而待之可矣。何以貴殲主安時拯危撥亂之才乎。惟尚有待於匡濟旋運支其壞。此所以深有責於浚而惜之也。

記

清舉樓記

晉表公墓
其人不奇
于曠而奇
于莊不奇
於無所不
上而奇於
多所不可
讀書萬卷
而執轡不
出周秦自
謂得之

予居循郭之西左控河渠諸川匯焉四方之所走集也
右招西南山經帶絡繹有若園衛然間葺餘緒爲樓北
址名之清舉以藏古圖籍且以遊目放志焉請之司勳
大夫記其事又爲季朗諸君賦以張之於予樓侈矣顧
予蚤馳騁俗間執細業已舍去從當世名游公卿大夫
則志慕榮進其顏色俟候時所向背遂次請謝與之上
下且文法吏隨而裁其短長各以事中之安得肆吾意
無所顧忌哉今返初服遵問里求所游者欲相與恣睢

游道至此
盡海矣

歡笑俯仰傲睨自以爲得矣然已變化不可概務爲纖
趣局促齷齪自喜謀權利結客任俠小者以文史玩弄
啗天下喜遊子弟其獲十倍甚者盛推轂世之賢豪權
行州域伉烈暴強猶復盜處士名傲然自負此其經營
附託乞乞苦身殆有甚於賣請阿意竊富貴者卒之遵
蘇俱敗顧得優游樂耶余自以不能於時晦跡空虛又
安能降心從俗無所擇也夫龍所以能神化不測者以
無所憑藉也鳳所以稱於靈德者以不可馴畜也士所
以輕千載而驕萬乘者以不嬰累於庸俗也假令爲雲
雨必階而登天翔千仞而未忘啞夫梁藻士亦猶假譽

於卿曲。流連於舉任。是何以超遠絕詣。出則煇煌於帝
社。處則沉冥要眇。沒世不見。而名稱無窮哉。故古人之
有陸。沉於世。混跡市人。而屠釣雜處者。雖不必匿身巖
藪。而故寥寥與世絕。況其自以不用於時。退且塵滓貴
勢。陵轢豪傑。眇小才術。蔑棄典文。而邁往千載。雖有希
世之觀。遐久之業。尚不足勸。而更能復論污瀆之事。聞
褻昵之詞。沉諂諛之態。納奇邪之人。無愛違已之性哉。
是以寧孤立不交。一人不營一務。逍遙於樊圃之間。而
志逸宇宙之外。不越軒楹之內。神棲風露之上。羨門子
高之流。日相與呼吸吐納。御六氣之和。服朝霞飛景意。

睨涖湍之表隨風往來使盧生輩亦且笑而不休其爲
榮適恬暢怡快固遺耳目忘心志泊然不知天地四方
當斯時也何燥濕之能干暑寒之能入鄰於壙垠淪
窳冥吾何以識其然哉故謂斯樓也雖在塵寰若縣圃
增城之內登踐游眺若躡雲霧而笑語時出蕭寥間人
之望此尚不知途之修遠曲直罔息意於藩牆之下矣

冬日登堯峯記

不好怪不
游不枯生
不游余游
大成白雀
洞斷橋頭
臺雙關桃

記云堯嶺者記堯時水所至也其高踰千仞蓋洪水汨
原東南下卑其勢必滔墊古有所識也予嘗三至乃昭
陽歲冬日自滬濱水行二十里折從一小嶺曰夏隩迤

游府署捐
性命從之
而卒
無別終年
讀書各為
謂其川者
也

而登逕石仄若刃屨不能數十武即劇選足所任乃置
如此百尋抵石橫道若圉積出五尋薜被之其闕有樹
榆緣檜上至其半蹶石斷復攬株拘足乃得駐若釋循
坂則滑而墮偃僂若隔齟行僅進至巔復牽枳擇石罅
徐下貼尤視升倍至稍夷草生茸茸坐而墜者再尋有
礪從西南來巨石嶙峋交積若水防之激勢雷轉而實
枯礪礪離置又若累棋礪碎且礪不知其幾何時矣下
視窅深上猶不見其極並礪礪躋橋足曲踊踰磊隗又
踣踣沙中屢蹶乃絕礪去崖如覆鍾甬長不及圍下有
隧倨句轉穿其篆間石若旋蟲竇之不可園之阻不無

蝸也入隙中若霑仰視蒼黑黝不睹躡地無藉廣若布
棧而密傳人乃舉足踰前撲墜石猝不可跋旁忽決若
口吐然得棧廣可尺如臨新伐轉從之且拒巖突振不
能直拓之危度股搖不禁矣歷棧可百武遂曠且夷如
環涂容二轍少憩磐石望所涉迷不復辨本非行道強
與客進遇拾薪者怪何以達也已遵涂至巖曰斜坪石
如板構深壑平視準焉可十丈所前望則窪者爲太湖
摧者倚者偃者嶢嶢者爲湖上諸山其在近則蠡如帳
列如牙節或伏而興或拱而立其間隴畝錯焉蓋踰險
阨而得曠夷是遁甲開山圖所云沙土之塢雲陽之墟

可以長生可以隱居者非耶彼得至焉者神廩鬼悸孰
敢睨視矣顧能廬是間哉又進崖巉嶮崿不峭削而齟
齬則甚般甃從其隅不百尋又得一坪曰少坪視斜坪
加狹焉而高出之所見如之加閭顯湖始半出至是愈
茫茫沉沉浩漭矣或云是可以望月之出河圖緯象云
邠之隘上爲扶桑日所升宣陸之阻上爲吳泉月所登
於此夕焉山靜闌下視蕩無止觀當有異特氣厲高噤
不任納其爽淒日暎之景亦且自快去之可二里所有
臺岨空岷立至者必巨縻縋而升孰汲之哉時道第未
除跋履旣竭興猶能一取焉上穹阪隄十尋坼裂如幅

於其圻中拾級上又轉而南至院周壘以石被其咀蛇
蜥而長樹連抱者雲杪者拱者杙者櫛液者中材者千
章院傳自唐名免水近哀基得斷碣乃鐫蕭梁年及唐
人詩夫隳燬雖在荒僻非有害於物於人無與也而蓄
仍焉人莫蹟於山而蹟於垤是非所及矣昔有軒清輝
東之齋與西隱者猶之礫礖礧燼矣遺碣與衆草荒賸
沼曰碧玉則澄澄湛焉縱廣不足五尋中污也如釜旁
蓋如簷笠仰焉水淫之雖甚淺遇暎不涸樹羃焉窳若
室宇瑤碧瑟以栗則玉之在璞矣井尤寒沁而其題以
寶雲滌自宋泉可甲乙天下四搏以巨石淪之久不涸

館松偃蓋者失向所指院下石甃紘波文若水浸漬痕
焉礧入之豈琢礧爲崖厠墮侈蟻蚰雜羸蚌跡隱隱若
洪水方濫岸翼之引可十尋是豈異說哉峰在院左者
妙高雲常衣之霽乃徹崖剡行者耳屬恐抵之仄相貫
探前測後目上則與磷謀下則與墜謀餘二十丈許左
入不數武有穴窈窈爾投以石鞫然下有穿人或從穿
入內堂龕多怪石穴穿不可達又旁穿詰屈出不復從
故所下視中如硯礧有聲前復磴折踰一竇石棧欹偏
置之而裏則撥爾而觸置之而外則兀爾不安去之百
武有巖深三筵而上穹然乳下垂若出其爪睥其目作

其鱗奮鬣欲從風雨攫其縑。纏覆者荔屬成羽。薄汨越幽隕。決蕩沈氣。又舍而前。則迴障鐵倚勢。陵崇嵐。瞋纓帶之林。攄振蕩。鍾畜豐植。冬無散陽。夏無燁炎。檉柳松櫻生其陰。麓嶢确。則輦萑萑芳。檉燎資焉。五里達於涂。山猶覆原上。有峯上橫置石支以三足。如釜鬲去之者。則石婦闖焉。東嶺曰鴨蹠。如令齟綴之蹠。皆碎黝若墨。鳥跡所不及也。夫傳所稱高山廣川大藪也。地道之微。於上民神之所依而生之良材者也。其記堯水事誠誕。則院何以名。且洪荒之跡。湮不復睹。巔曷以有蝸蟬穴焉。是尤駭視者。且山者徹也。巖者嚴也。氣嚴而徹。是殆。

蒸化百物不可名狀者也。余觀於天下茲山特小爾然
於吳差顯莫壞東南震澤爲巨壑出其前光屑常陰陰
震於怪物登之四望雲霧不知所自出撫然若與精氣
接而山川者薄爲風雨矣。

斲冰記

又亦窮屨
作水客○
石梁僧嘗
云瀑布作
人來時取
注如一燈
龍其中品
受水道則
燭之焰也

歲甲戌月之涂時乃大寒北風扶搖陵震川陸冰澄澄
塞涂自洫遂以達彌望皆凝互林木淒其色廩廩黶雪
飈飈欲墮景候慘冽甚日曠霏霏薄之黔靄澹淡霽起
相映發回中人倉不勝禁予與二三子居隩室重衾自
擁猶凜若露之冷析骨驚相謂頃歲來寒未有也乃余

顧躍然喜自昔之從燕中役霄雪霑泥霏霏千里積至

牛目丘陵爲壘

補鄧

咆騰涌風橫挾之怒號天地若搖兀

者久不游今復睹此慨然懷徃且方壯少精營盛冒犯
凜寒朝夜衢路騎行無蓋執策驅之耳不自覺今雖衰
柰何都無意氣學兒女子縮朒乃強命櫟欲有所之倚
人諫不聽始自岸側鑿氷冲冲開不尋丈益督之前震
震漸震裂之聲礚礚礚礚若石礮斲之礚礚碎若玉礚
之磊砢磷磷薄流漸左右蕩激舟淖然進臕臕若割層
礚礚礚擊甚棘役者休勞之酒復行傍艤者觀者倚
櫪欲並出者咸怪之謂何所急厲意不避橫軼中流擲

摘扶抵如期赴迫切者成噪以助之勢揮踈突懷益益
起波沸翼而蹙之磕磕然者已而迫午霽和澤氣稍融
液所殞破解散者所踉蹠副音逼蹠只者所穿梧吾振丑
拓者則已委積涯涘粲若雪綺矣數里間闢爲通道夫
或捧痛而謳或呼以作氣遂抵湖上乃策而登四顧颺
颺肅肩遠郊苦霧霾之若洶洶動雖肅厲而不爽徹孔
子云天寒吐珠於澤睹若滍洙不辨語所謂天白灑灑
寒凝凝者與矧石氣鬱鬱硤側擊與颺颺相雜面受之
如射沙石栗膚龜手不足言戰戰不可任語笑皆爲凍
咽竹樹颺颺柯葉盡賁望乃不蔽湖山遠來在前予雖

意益舒二三子無復色遽欲歸夫時者不可常即歲如此嚴亦幾何遇之景氣無論四時當其極豈不佳哉何以暄涼間也人養適過竅理皆踈顏澤不堅故不可犯霜露予四方之人也而久此悵悵豈能忘故時忽睹此遂動驅馳想彼北鄙寒絕手足皆瘃墮沉身沒命思策功名獨何壯與而予與二三子空老耳何益且古者凌人納水陰室以贊陽氣故無冰則書以紀異東南地氣稍偏然累歲冬燠則藏乃不固今幸洛下澤各遂合歲其阜興玄冥者能專其令與予雖山澤逸安得時穰歲登乃能無他慮又因其寒暑之暇極意所之縱覽觀焉

而慨寓之矣

鄒氏之汪記

光緒二十一年
仲夏

歲在玄默之暢月余從徐叟將羣從及楊生黃生始自
郊泛原防汴列澮以之遷入於郭之豬漸淫焉淹洄久
之翔集於畿涂有言鄒氏之汪者往觀焉道隅阿進逝
其陳則汪湛然色黝黑方盈畝又半之雜菊莠草植其
旁與叢杞蔽翳於時卉木瘁凋紀候肅厲零芳猶萋萋
與颿颿爭寫氣益腴潤若無蕭瑟慘廩者夫菊著於月
令載於禮口后鞠衣鞠衣者黃衣也則菊惟黃爲常哉
今衆色益備視他卉尤繁而品上下殊別種類滋多惟

後來者貴。黃愈不足稱矣。然水映之則津液滲漉。故於
汪最宜。古記鄠縣之甘谷。予嘗至其地。遺菊藐矣。謂能
益人壽者。以受三時之氣。得其靈和。自可爲奇藥。又其
與苦異。種苦者過寒。甘則近溫。其芳香嫗或則視他草
醇而不醜。清而不醜。若幽人之在空谷。其峻潔高邈。介
特貞素。亭亭意慮之表。可謂標挺鬱絕貴令矣。若霜霰
被之。歲蕤蔓。莖栗有嚴凝之色。縹緗素柯。菲菲榮則
著。節一何壯毅哉。而容澤婉媚。與西施毛嬙比艷。共姿
又豈焦然稿枯於林壑者乎。余與數君子。旣託嗅味焉。
同其所之。則惋嘆懊咿。相厲切以廉直矯勁。徜徉於山

藪曠寂無人之域而茲汪乃不遠於雉堞崇牖間閒暇
若在荒絕况菊卉之麗歲晚尤所慨惜宜徘徊不能去
也

遠菴堂記

可以乎

夫芳奚貴哉君子信修以爲志俟千載於後者不可誣
焉爾也曷不重貞尚哉靈均侂其潔若彼卒蕪穢於黨
人若此欲使無蔓延焉又何怪於萌穢之杜至於尋斧
柯而不已則雖剪又之其傷實多一或不勝時化之變
易將於何不至哉是猶蒙其嗅芬而沒漭之奚但芳不
得薄寡之不勝衆從流之易於汙即有馨烈翳於溷濁

薰蕕何辨矣。故風人疾夫。今舍曰好惡其不同。直置之
奚害。雖橘之深固難徙。而當其爲枳也。忽忘其移植之
易性也。乃徐子則旣佩服姱飾矣。剝芳以爲堂名曰遠
茱實遠哉。圖夫讒邪之害正也。將誰欲之以彼荏弱而
莫予難也。附麗寔繁。有徒浸以溺之。積榛枳我。污穢蔽
晦。遂使淆焉。不知所覽察。故遠之不能彼。且以我爲藪
澤沮壤而繁育滋長之矣。萋菲蔚薈使氣味移焉。其旨
毒者。沴害酷烈者。侵逆性理若始固未嘗不以玩弄而
忽之也。玩好在耳目之前。而患在積時之後。澣澣不除
莽莽之謂何。然射干類芷。薜蘿之似芎藭也。是又非可

易辨也。且揚者易生十人。植之不勝一人之拔矧難滋
者。芳而羣穢不可勝芟也。遠之難乎哉。是在徐子勗之
也。

規

規暴豪

孟子
之問而原
本經術故

古之爲豪暴侮凌弱小者皆巨室宗疆游俠私義有所
好立然諾不侵死交負氣雖數扞當世罔然其潔廉誠
直洵洵似君子即閭巷布衣而有共財同利害慷慨可
稱者何今之爲豪皆齷齪不足數雖士人而有甚汚之
行爲向者所笑唾弃之不顧者猶復傲然德色自以爲
游得意無所推讓風之被使善家子或故吏失計隨輕
黠少年不服工賈本業而相效爲美飲食鮮衣服樹朋
黨比周恃其勇力標奪里中荐爲亂探丸砍吏橫驚不

敢問始之猶可指名今隨處而有雖父兄之誨不可如
何生則習見若事慕之以爲武健敢摯雄勇不畏而翻
以敦厚服習爲怯懦儒兒此其爲害旣已浸衍蔓滋連
類起雖欲理根排枝搜剔疏治乃不勝株連坐之前
者已傳重効後者猶走死地如驚安得禁絕之杜其萌
使無復哉然此非必惡安就危情與人異也殆教之不
素乎爰規之曰昔俠之名雖不軌正而猶出於義遏逆
亂之逞而徒以爲技始之士太而好私譽蘊毓以厚其
憤遂競逐於衢途而勢激於所規顛踣者已踵接而繼
者猶甘之若可嗜放誕不拘夫旣得肆俗之日隄於何

孤憤極矣
今人開口
輒言著述
甚無謂也

能忘精悍強力適狠猜以興夫曩曩相率納罟網而又
將以誰懟式克訓爾毋流酒之耽而驅之麋潰毋挺走
於險而覆謂爲利惟剛制於所肆尚永載爾世惟克定
爾志尚亦爾畀詰言之弗率余不知爾所泊

黜諛

爰有鼓頰佞夫翩妍小子學未究於通方才未成乎一
藝競煽澆浮豈類宛丘之蕩狎遊朝夕妄希稷下之談
嘯不逞之羣肆冒臆之見私爲標置橫相詆訶非子真
之懷古詎識人倫異郭象之懸河何能賞鑒加以不窺
作者之門尚遠藩籬之下罔讀邯鄲之碑焉識顯陵之

字輒欲較彼短長議其工拙亂紫淪朱凌黃妒白瑕類
流其口吻貝錦成於舌端或褒述過情寓抑揚于言外
或銓流失次託諷刺于辭間或籍彼文雄因其品目勢
成挾主意在憑陵誇飾無當方從泉注扶摘同異亦已
蝟興致亮拔盛才翻爲塵點冲懷雅士徒遭毀敗斯元
伯不甘于見夢許子因之而舉聲者也復有聆緒言於
座隅接清風於俄頃多其耳學謬稱暗解未弛負擔敢
爲宏論瑣茲賈豎特賜猖狂望餘暉而借光並順風而
托勢亦情馳意惑日蕩心搖歆艷名華慕戀聲哲忘其
驚下顛倒其間雖不足貽玷缺於青蠅亦可爲笑資於

談苑也。溺於風之相煽，遂使黃口呱呱，已濫觴于流俗。番番小子，厥匍匐而爭趨，襁褓之內，皆謂童烏。巫史之兒，悉稱幼達，視前人爲蹊逕，每空空而自喜，附和之徒，仰其鼻息，待之舉火，復爲之欺父兄而取憐，瞽庸愚而騰價，訛而益訛，醉而復醉。悲夫！大吳以三讓始其風，獨道隆其化，言游誕其英華，延陵表其廉退，沉鑠斯盡，陵遲逮今，謂之何哉！覆波方被，而介人之操，獨申嘖議，繁興而在握之珍，彌曜龍劑，寡而奪衆，薰貞行微，而掩玄素，詠嘆之作焉，能翳彼幽音，知樂之倫，方復揚斯孤奏，千載之竟，尚申悲於王弼，一時之論，寧有恨於劉歆，故

知懷絕俗之見者不旁採於衆謀守獨定之說者不遍
諮於道路必若飛響迅發逸調間起排黃雲而儷曲度
幽蘭以齊潔荆人見之而屢驚鄭客望焉而却走矣

謨

爲英布答隨何

隨生以口舌名然所以說九江王者不知何以
動之殆布故驪山徒無以折其辯故爲所給耳
因代爲之答

亡之漢一
匹夫耳痛
映極矣

英布曰先生幸教寡人甚善然先生爲漢王則可矣未
達寡人之心也且寡人所以託國者豈獨爲楚強哉夫
親裂地而定封者項王也視其強弱而改圖者市人之
行也非南面而君國者所忍爲也重德楚而輕背之無
故仗劍獨走漢雖漢王亦寧不虞其反覆乎且生謂項

王身親伐齊之勞寡人安臥淮南不助楚者又不然也
生視齊寧足爲楚患者寡人不幸有大馬之疾即少發
兵舉齊可萬全夫彭城之役項王未返寡人先期會戰
漢王必舍輜重跳驅遁耳寧得壅睢水不流殲十萬衆
於彭城下哉此寡人所以厚託楚也顧謂提空名生殆
不知所以戰也又安能知楚漢之強弱乎漢以義帝歸
罪於楚夫義帝楚之所立也豈有意廢之哉然而鑒鉅
鹿入關中定天下者項王與諸將力也義帝所有者故
地耳即不幸於楚何負且與彼置父祖上不顧者何如
也漢王譎諸侯使從已自強即無與楚遇遇即奔敗其

其語

亡、失、生、所、知、相、拒、滎、陽、成、臯、間、尺、寸、不、得、進、父、子、暴、骸、
中、野、丁、男、幼、弱、悉、發、尚、不、補、卒、乘、缺、轉、輸、蜀、漢、之、粟、率、
十、鍾、而、致、一、間、繞、梁、地、楚、輒、覆、破、之、閉、壁、不、敢、下、一、決、
以、此、爲、漢、強、殆、誰、欺、乎、夫、君、之、視、父、奚、若、漢、王、棄、其、父、
若、敝、履、於、義、帝、何、有、而、爲、之、編、素、惑、諸、侯、且、楚、分、王、列、
國、與、天、下、約、已、定、而、漢、王、無、故、敗、約、首、舉、兵、攻、奪、諸、侯、
地、苦、天、下、以、兵、革、不、休、生、以、爲、人、共、患、楚、耶、患、漢、耶、生、
謂、非、以、淮、南、兵、足、亡、楚、則、何、煩、千、里、來、辱、乃、欲、留、項、王、
資、漢、取、天、下、若、失、地、則、與、生、亡、走、漢、復、分、以、地、而、封、耳、
使、寡、人、棄、王、者、之、顯、號、爲、亡、虜、捐、已、成、之、業、復、冀、分、於、

漢誤矣夫亡之漢一匹夫耳漢何愛於一匹夫而王之
假令聽先生之計於漢誠利矣亦危哉所以爲吾國社
謀也況項王爲人義而慈仁得漢王家屬不加害善遇
之漢王怛中而多猜損非其有以與人雖多不吝然可
乘還奪之耳故爲先生擇主不若主而事項王并力令
漢無東天下可以少安於先生何如

雜文

讀李于鱗集

附其愛之
更以親之

李生自謂命世才即子長不啻過之橫驅千古以蠅勁
自憙其文連類廣肆要不出左語國策太史書屬辭緝
綴奇奧靡靡不絕叙一事數百言未究而其意不過爾
斯則一語可了故爲棘澁咀晤然且使皆自己出何不
可者必剽襲古語聯貫絡繹以攬摭矜銜爲累百篇如
一機構或援左國以入於史牽經義以附于傳鎔鑄以巧
冶若泯合無有釁兆者幾天工哉可以爲難矣而未可
爲至也夫文者必引繩墨隨短長效之即左語即國策

即太史無不各自爲家譬美好者其骨法相近而精彩
神色則不可同也御者執策雖同而輪轍馳驟豈必盡
掩前跡哉今連類爲之固不可即可矣如牽附何孔子
蓋述而不作然易詩書則犁然辨矣豈必混爲一塗哉
至其所自爲者又奚必曰古語有之乎且李生自以無
一語不範於劍可也而無所取裁因其淵幾假其成器
必將至襲累陳厭拾弃餘以爲新異即韓愈氏抑且不
爲而能免於後來者誚乎使李生之才獨以意切劘之
盡去其舊而新是圖刻除子史刊落傳記掎擊往者不
本事不援跡不宿構體不預設變有謂無謂有待無待

出意慮之外游涖溘之表奚患李生不能哉顧使論者
推高一代猶有軌軌之疑奇氣軼發而當其無有則機
用可窺也謂北地始開草昧未窮情盡勢極溹渺之觀
關中湔滌雕飾而傷直致率易無宏濠淵蔚之色且今
使蒙莊削牘則必盡舍逍遙而博議子長當著記之任
未必謂無世本國語遂絕簡不載筆也若之何謂神用
而有所藉患雄才不能自恣也哉

木以隨輪則本固鼎豈辨前不其華也昔多使隨轉則
卦蓋其固則限與盡舍此而此則其利當益其文也
關中而新輶輪而利直廷率思應之繼隨旗之可且今
用而實身隨其利故明草相水靈靜素楚射源捕多變
卦高其升而亦輝輝之故音屏輝發而當其無竹以射
出意實之依故氣盡之未與我率之不細其而射備其

表

爲蚌謝上表

臣蚌言

臣蚌言伏見除書以臣爲長水將軍曹丘校尉行醴泉令醢如故臣聞

命跼蹐蹙頞知懼篚頒祗辱絨口何辭念臣介族卑品
么膺陋質劣慙蚌蛤之微瑣負蠅蠅之議輪菌無寄安
能磊砢蛄蠃徒爾豈曰閑藏是以轉側汗瀦分絕清塗
縮胸泥沙託言獷殼不意過私猥加漸植旣其種類曲
不滲漉含育逮茲顧外有米稜中殊混沌惟多褻積誠
何氣味而得濫預八珍叨陪五鼎腹腹焉取骨髓奚堪

方當、泔、以、醢、沸、柔、以、挫、糟、僭、調、羹、於、辛、樛、竊、僭、箸、於、鹽、
豉、眇、斯、蜆、醢、以、間、脚、臙、未、忍、腥、菹、去、同、乙、醢、擘、江、珧、之、
房、膏、流、食、指、齏、紫、貝、之、胃、飫、厭、車、螯、銜、澤、及、膚、噬、恩、滅、
頂、固、將、腐、爛、爲、期、非、復、糜、碎、所、答、輒、不、勝、戰、栗、董、窮、甚、
盤、匱、拜、表、以、聞、詔、答、曰、卿、著、姓、會、稽、策、名、海、錯、脂、韋、所、
便、肥、甘、是、悅、故、斯、簡、授、以、待、和、滋、爾、其、折、衝、樽、俎、毋、
鼎、鑊、勿、庸、讓、也、

書

與季朗書

聖人是秦
人之骨只
是多讀書
精練格若
以記溫博
孫求之幾
矣先生

與兄從事最久情無不相悉然僕多忽忘願請者數復
不記憶去歲淮北遊時繫念況從此浩不可期中夜思
之驚嘆不寐所共厲者文兄才雄倬衍麗非僕所望若
其精理覈詣僕嘗得質疑焉不可一日離舍此遠去此
私所悵快慨惋不自適者也所欲有謁且撫一二夫經
傳周秦間書此詮言之軌然意所向何古之法萌動於
中茫昧未顯非所思存譬水之浸淫因導之流故辭假
之手少復綜緝而已使坎未盈豈能強決意未蓄手能

爲之辭乎。故肆意而作緣手而奮者善文也。規以揣裁
合變赴會融絡構治連類錯繪者文之牽泥未光也。所
以力去陳襲剗剗雕鑿必直致颺舉雲駭霆疾而含混
悠遠英慨靜摯未嘗有意而法度在焉。若莊氏綜辭且
無所謂而縱橫數萬言無不燦亮瑩潔秦儀雖澤立談
頃刻奇辨藻辭勁氣逸彩豈思構組撰哉。肯自然得之
故敏速倉猝應機遙涌其斯之貴。若其淹緩研喙采摭
按覆則雖肆麗而典峭越以譎尚不足難。而況彼弛解
稱淡散亂拙弱若今之所爲者何算也。且兄與僕力開
新體首闢莽翳何有所藉。寄假待而小人大言過不自

愧翻謂穿綴又謂多故實夫不能解而妄詆猶之可也
謂之易而不爲抑何罔之甚哉且假能爲何不爲僕輩
奇恣佚宕而乃守彼區區不足一笑而自謂能將誰欺
哉故實者據事陳義固必及之初非藉此而工彼自不
學而患其與僻則必如彼而後善歟僕往爲詩頗咨淳
父未嘗忘彼小人者僕輩誨導之多矣每操戈彎弓何
鄙之甚兄自今冀共閱之勿輕語人也今天下半爲王
氏學豈王氏才勝兄與僕哉故藉勢位耳兄邇者立致
青雲駕說海內當復爲魏氏學不久矣魏氏學行亦何
異僕哉竊所憤悵不平欲一洩曾抱以寄之無窮者不

惜重言之夫涉世取位隨時屈伸兄之篤密亦似太甚
雖鑒僕疎誕遭尤招嫉是矣事有固然無足深慮機變
權畧辨識籌計神鬼隱幽世豈有能出僕輩度內者哉
然不能兼得斯亦非慮之所及矣侃侃正議莊色峻嚴
敦重風望不少假狗彼終何所爲蝎螫哉得失有分非
人能爲煦煦和謹徒使喋惡恣嫚悔耳幸無爲鑒之過
苟未然者願有所復無惜

書

擬謝交游書

劉鳳

除却名利
心自有真
氣類○悍
到底不是
尚辟

召聞誠無不入義不自疑謂在委心當無復間乃今觀
之事何大謬不然管田光伏劍以成死士之氣侯羸自
刎以奉公子之事夫狗身何易知人何難籍令髮不指
於冠上眦不裂於璧下豈不終受嗤於燕魏哉今申以
國士定以石交利微毫末釁成丘山是使輕生者銜悔
而論交者泚顏也願君其熟察之昔戎夷如魯解衣而
僵紀公善藝剗肉而泣是以華元不憾於御者司城舍
怨於從亡知不可以隘已遂怒也故願君之毋忘後門

之不肖而先衛人之未行使羊斟子韋復有醜於千載
吾聞樛里貿首公仲腐心事一至此私爲痛之願君之
深計無自蔽焉語有之曰怨不在小惠不在大期於時
與不時而已矣故越王憑軾而武士奮矜荆君拊循而
三軍挾纊夫蟲象非作氣之資虛辭無禦寒之備也所
以成霸越服強晉者義激於感憤利借於嗟嫗也是以
隼忻水斷蛟蜺而意折於要離田開力格虎兕而命殞
於樽俎何則誠有以中之也甘茂去秦道遇蘇氏而二
國迎之以上卿公叔爲將戰勝韓趙而君賜爰起田二
十萬何則利謂有所不可忘功謂有所不可居二子誠

明於計審於事豈背利而節讓哉故同利者爭而分功
者在後也同美者嫉而後來者居上也昔召忽任子以
圖難鮑叔奉令而出傳夷吾重生以全國此三人者猶
鼎足之並立懷霸王之明畧信執已之獨道故異行而
相濟也是以成安君身刺於泚水之上孫臏名顯於走
魏之師彼其初私相慕以死因嫌妬之跡重相夷之禍
雖携手而游不旋踵而敗故東郭一言而西門忘其榮
辱于木偃蹇而繆侯締以素交此其人者豈以名位爲
軒輊富厚爲媒梯而相與乎尋丈之間哉閭廓深遠邈
然自得志意之孚不見其際夫何有於讒慝之人哉故

賢者潔行以振疑。智者究理而長慮。昔申胥流感於宰
嚭。子產不全於鄧析。夫處二子之間。異者不得而強。同
危者不得而苟免。何則。心怵於兩端。而勢迫於侵殆也。
蘇秦將合從於六國。召張儀而激之。使西入秦。甘氏將
收地於宜陽。使向壽而返之。使重要其主。此挾傾狡之
變慮。因間以執讒口。由置構之爭事。而固結以強主心。
卒之形反而勢禁。萌寢而患銷。故智軌者相示以色。季
子之使張儀。所以侮而易之是矣。交踈者明誓以信。甘
茂之於息壤。所以無攻其後是矣。今夫二子之明。而中
反覆之計。恐開塞之途。未容濡足。決蹕之恥。禍理屬然。

豈及其身而能止之哉。是以君子敦道後黃歇之聽而不悅。瞿氏之賓申如蘭之契收比德之好不貽玷於充。訕何則爲益無厭也。夫審威嘆喈爲仲甫之舌。鄭僑一言而見然明之心。何則匡政平俗小稱而遠謀同底於濟。不可以諛行合也。至夫佞巧凌諄駕說以游而不相見。情便辟謹諛怯疑並驚以逞其捷術。傾而氣制自以爲辨。智微才滑稽無厭。是以陽虎樹人於魯。亡未出境而襲逐拘執之矣。董叔繫援於范氏。求以自託而紡於庭槐。今之爲交誠能破胸臆出腸腎。厲苦口進逆耳。效懇款抒切直。終與之竭盡無愛於情。則左桃可使餒死。

而不辭荀伯可使觸刃而無悔何況作色於簞食之微
睚眦於盃酒之間乎然則虞卿捐印於魏齊祁奚無德
於叔向又何足爲道哉且吾聞士不虛附名不虛立誥
然其口橫鼠璞以士襲混魚目於照乘莫不望而珥之
者何則鯁人恥而周客走也首山之銅若耶之錫而爲
萬世寶者以陶冶鑿錯而出其精光也故士屈於不知
已而伸於知己者安意希冀則燕石珉珎祇開罪於子
春俯就鎔範則朽秘腐樨風胡薛燭方接踵而翱翔耳
今夫閭巷之雄布衣之傑挾王公之權怙青雲之勢仇
景雲叔佗羽公子賓客從橫遊揚爲譽人慕其聲轉相

傾動是使恬退揖讓之士不得雍容高步雖欲責善忠告必將效拉骨折齒于范雎說難孤憤於韓子而未有能迴視改聽革心易慮者矣是以君子盛飾潔廉獨出於名譽之外而不牽於流俗之蕪穢以自疏擢乎滄淖之中故迫窮而相拯恤無社號呼於叔展患害而重除怨楚子劍及於室皇許人而不訖於威解揚死言於無實居平顧以庇私范宣朝夕於訾祐臨利而能推引文子不奸位而受名相先以含垢則疾驅而分謗桓子離閔而不疾則指楹以平憾季孫故曰君子淡以成小人甘以壞何則以其思游於霄霓之野而并包於區域之

外獨開曠蕩之觀也。今壅優愛孺子之見，沉容悅側媚之習，居同閨而猶詬視長者，易嚴重而驕色，使貞介之士與柔佞比肩，此原憲所以謝於端木子方，所以肆於魏擊寧，忿於世而孤游也。吾聞疾於利者毀其信，傷於行者危其身。公孫不謀於同乘，而師以敵撓；燕人涕泣于丘隴，而言以譎效。子木背信於齊盟，而躬以逢殆；駟帶無質於要誓，而世以不逮。今使篤道履素之士，捨其馨烈之性，甘於腥腐之逐，瞋瞞於勢貴，誘奪於名途，顛厯望拜以爭鼠肝蟲臂之獲，而自伏於糞壤之下，則士有鬻剝巾幘婦飾而逃焉耳。安有張日出氣而猶強顏。

對朋友者哉

地志

卷之三

六

地志

